

DYAMBWIBWA

...dyâpà dyà muneemu mu—mu Yuma, ndyèsè dinène
dyà kupeta dibììkila edi bwà kwalukila cyàkàbìdì. Tuvwa
bapicile mu cikondo cyà dicyònkomoka cilenga cyà dikèma,
musangu mushààle mwaba ewu. Ne pashìishe pângààlu
kuumvwa ne mvwa ne cyà kwalukila cyàkàbìdì, kungenzabi
bilenga byà kacya, bwà kuteeleja majaadiki ne mèyì malenga a
kùdì bantu aa, ne ciine aci's cidi cikukankamikaku ndambù.

² Billy mmungambile ne mwanèètù wa balùme wa ku Las Vegas awu, wa bwena uvwa ujinga disangisha mu dyâpà kampànda kwôkò aku awu, amumone dyàkàmwè paanyimà pàà disangisha dimane kujika kaaba aka. Tudi ne cikondo, mudiye wàmба, citùdì mwà kuyamu, mu ngondo wa kumpàla amu, kumpàla kwà disangisha dyà mu Phoenix, nwamònú's, bwà kulwa ku Las Vegas. Pa nànkú twétù biine's tutu ànu misangу yônsò bajingejinge bwà kukufika.

Ngeela meeji ne Mwanèètù Art Wilson uvwa musòmbèle kuntwaku, kukaadi ntàntà mule, anyì udi mwà kwikala ucidiku. Nenku yéyè—yéyè uvwa mundombe bwà mêmè kukuya, yéyè ne Mwanèètù wa bakàjì Wilson. Ncyàkapeta mpùngà to, nànkú pàmwäpa eci ki cììkalà cikondo cyà mêmè mufwányine kulwa.

³ Monanganaayi ànu ne Billy Paul anyì ne Mwanèètù Roy Borders. Ngeela meeji ne yéyè udi kaaba aka mu mwaba kampànda. Muntu mukwàbò uvwa wàmба ne Mwanèètù Roy uvwamu. Mwanèètù Pearry, Lee, anyì umwe wa ku bôbò abu, nebiìkalè ne mùshindù wà kukwambila. Longololaayi ànu matùkù a ngondo a twétù kulwa.

⁴ Mpindyewu, ngämònu bambi bâàbûngì mwab'ewu, kwënji katancì, bwalu's ndi ne disàンka dîngì dyà kutwilanganaku ne bânà bètètù. Mvwa mwà kujingaku bwà kupeta cikondo, cyà kuya neenù ku mèènù, bwalu ndi mumanye ne nudi ne balàmbi bâà byàkudyà batàmbe bwîmpè bàdìku mu ditunga emu. Aci's ncîmpè.

⁵ Nènku mpindyewu, Mwanèètù Pearry mmupetè bushùwà maalu àbìdì, dilòlò edi, à dimudyula naawù patuùdì twakulangana apa. Bùmwè bwà ku ôwò, mmukòse cikolokolo cyàcya, cìdì aku aci. Dîbà adi, wéwè ngudi—wéwè ngudi mwambule dipììlà dyà bwalu abu, Mwanèètù Pearry. Ncyêna ngeela meeji ne wéwè nguvwa menemene mupiìle to. Kadi wéwè... Muntu kampànda ukaavwa mudilongolole bwà kwakula. Aci kaayi's cìvwa cilenga.

⁶ Nènku ki pashìishe, cyàkàbìdì, kuyaye kwàka ne ukaavwa munkaci mwà kwakula. Kwambaye ne: “Aambaaku tûng!” Mwikale wambila Mwanèètù Collins anyì umwe wa ku bôbò

abu. Yéyè ne: “Didyà dyà dilòòlò’s dìvwa dilenga. Kàdi,” mwàkambaye, “nya nkhwambila’s,” yéyè ne, “muntu awu udi ne cyà kwikala mwena Espagne, anyì cintu kampànda, anyì mwena Mexique. Wàwa’s uvwa nndungù mutàmbe kutwà wa kacya mêmè ngâlabula ndungu’s.” Utungunuka mùshindù awu, pèndè mwikale wàkula ne mulàmbi mwine’s.

Awu ne: “Mêmè’s ki mulàmbi awu.”

⁷ Aci’s ncyena Texas, bwènù nwènù. Twêtù netùmulongòlòle, muneemu mu Arizona, paanyimà pàà cikondo, (kî mmwômò anyì?), bu yéyè mwà kushààla ku luseke lwètù.

⁸ Mbilenga byà dikèma bwà kwikala kaaba aka! Ne ndi ngeela meeji ne abi kabiyèna bìmèwèka bu bilèlè twela to, kàdi mmapikù. Bwalu, Mukalenge Yéyè mwine’s ùvwa wèlaku mapikù, nudi bamanye’s. Wàkamba: “‘Helòòdè,’ ne ndaayi nukambilè mukenge awu,” nwamònou’s, “leelù Ndi ngiipata—ngiipata badémons; mààlabà Ndi muvwijiibwe mupwàngànè.” Pa nànkú, Yéyè ùvwa wela mapikù. Èè, aci kacyàkutwenzela bibì to, ncyêna ngeela meeji nànkú to, ku musangu ne ku musangu.

⁹ Nènku mpindyewu dîbà dikaadi dipìteku ndambù. Nènku, pa ciibidilu, ntu–ntu nyiisha mèbà matwè ku ànaayi. Pa nànkú, bu mûndì mumanye nsòmbelu wa bùkàlàngà wa mwanèètù wa balùme ne mwanèètù wa bakàjì kaaba aka, mu dyâpà edi, netùkòsolojeku maalu bikolè, bwà dilòòlò edi. Nènku ànu... Mvwa mwamble Terry. Mvwa mwambe...

Yéyè kwamba ne: “Ncinyì... Ngeela mukàbà wà mèyì wà mèbà àbìdì anyì?”

¹⁰ Mêmè ne: “To, Terry. Eci’s—ndifestò’s.” Mêmè ne: “Ànu tusunsa tutwè ku makumi àsàtù anyì makumi ànaayi cyanàànà, bwà kwambila bantu cintu kampànda.” Bwà ne, ndi muwfànyinè kuteetakù, nànsha nànkú, musangu wônsò, bu mûndì mumanye cyôcì aci.

¹¹ Pâncìvwà mwânà mutekète, bantu bàvwa ne ciibidilu cyà kulwa kuntèèleja bwalu mvwa myiishi wa citende, mucikàle ànu nsongààlùme’s, wa citende. Nènku bàvwa mwà kwamba ne: “Èè, Billy Branham, nudi bamanye’s, ùcidi ànu mwânà’s, kayiku mupicile mu tûlaasà to, kayiku ne dilonga nànsha dikesè.” Kàdi bàvwa bâlwà kutèèleja myâku yànyì mikòsòlòkè ayi, wanyì Anglais wa cyena Kentucky awu, nènku–nènku pa nànkú bôbò... byanyì byà ne “hits,” ne “hain’ts,” ne “totes,” ne “carry” abi.

Byenze bu mu dìmwè dyà ku masangisha muneemu emu ànu àbìdì àdì panshi aa, kwambabo ne: “Netùjuukaayi bônsò kuulu bwà twêtù kwimba musambu wà ditunga.”

¹² Mêmè kujuuka kuulu e kwamba ne: “Bwà nzìbu wanyì wa kale wa ku Kentucky kule kwaka.” Ki ditunga dìmwèpèlè

dîmvwàku paanyì mumanye ndyôdì adi, nènku ki cyôcì aci cìvwà musambu wà ditunga, bwà ku dyanyì pàanyì dimanya.

¹³ Nànku mpindyewu, paanyimà pàà wêwè mumane kwikala mutun mukolè, nànscha nànku, mònà's, twêtù...wêwè ubwela, bikèngela wìkàlè ne cikwàbò cintu kampànda cyà cipite aci's. Nwamònú anyi? Tudi twangata...Pôlò wàkamba, ne: "Pâncivwà mwânà, mvwa ngààkula bu mwânà ne ngeela meeji bu mwânà." Udi wenza maalu bu mwânà's. Kàdi paùkaadi wenda ukola, dîbà adi udi ubanga, kuumukila ku dyambula dyà makàsà èbè à kumpàla, nènku utétuka udishinda, ne ujuuka bwà kuteeta cyàkàbìdì. Pashìishe wêwè, paanyimà pàà cikondo, udi ufika mu mùshindù wà ukààdi wenda ulonda mulongo mululàme. Nènku cyôcì aci ki cìdi cikèngela bwà twêtù kwenza, bu màsàlaayi à nkùrusè. Mpindyewu ki cikondo cyà kwenda kulonda mulongo mululàme ncyôcì eci, twenda tupweka buludi mu cibeeba ciyaayà ku Butùmbi aci.

¹⁴ Ndi bulelèlè ngiitabuuja ne tukààdi ne mwoyi mu bikondo byà ndekeelu byà maalu malonda à buloba ebu. Mêmè ndi cyà bushùwà ngiitabuuja ne Dilwa dyà Mukalenge dìkaadi disseemène bikolè, pàmwàpa, kupita mutùdì twêtù twela meeji. Nànku mpindyewu, ànu mu tusunsa tutwè ku makumi àsàtù twà dîbà dyènù, anyì cintu kampànda, ndi muswè kukòka ntéma yènù ku Mufundi wûndì muswè kukwàta naawu mudimu bu cyena bwalu, ne—ne kwikala kuteelaku mikwàbò kàbìdì mwaba ewu. Mvwa...

Musòmbe kwanyì kumbèlu, dîngà ditùkù, mvwa ngeela meeji pa miine meeji aa. Pashìishe mêmè kudyàmbidila ne: "Èè, ncyêna mumanye, pândi ngààkula pa Mufundi wônsò ewu. Nêngàngatè ànu citùpà cyàWù, ànu bwà tuumasangisha tukesè twípì twà bwena tutùdì bafwànyìne kwenza dilòòlò edi etu." Ndi njinga kwamba cintu cîmwèpelè, panùcìdì munkacì mwà kubuulula mu Misambu apu. Yà—yà kumpàla...Musambu wa 27, ndi muswè kwangata mvensa yítaanu yà ntwadijilu ayi, bwà kubala.

¹⁵ Ndi muswè kwambaku nùnku ewu, bwà bìdì bìtàngila mâpà a Beena Kantu-ku-Byanza bàà Evanjeeliyo mu Kaabujimà aa.

Mwanèètù Pearry ùvwa wàkula bwà mikàndà, ne bikwàbò, ne bwà mikàndà mipyamipyà yìdibò naayi. Mbanganyì bâdì bavuluka patwàkenzà mukàbà wà mèyì awu, ne patwàkaciyyiisha muneemu mu Phoenix emu, ku umwe wa ku mpungilu, pa ne Bakalenge, Tudi Dîbà Kaayì? Mpindyewu, aci cìwà ntwadijilu wa mukàndà awu, nudi numònà's, dîbà dìvvà byôbì ebi... dyàkenzekà cyôcì eci.

¹⁶ Kudi dishìndika dyà ditambe-mfukilu dipìtèpítè bûngì dyà Dîyì difunda dyà Nzambì, dyà dîbà edi, bwà cintu kampànda kaciyyikù mwà kwikala ciseemena pabwípì neetu mpindyewu to. Tudi ànu...Ncitàmbe kwikala cyà bushùwà. Bintu binudi... Mbifwànyìne kwikala byà bìkèmesha, bwenu nwénù, ànu bwà

kunumanyisha ne ncinyì cìdì munkacì mwà kwenzeka. Bâàbûngì bâà kunùdì, nwêñù beenyi, pàmwäpa, nudi numvwa bantu aba bajuuka bàmba—bàmba mâyì aa, bàmba ne: “Mukenji wa dîbâ edi,” ne bikwâbò. Cidîbo bàswa kwamba aci, mmulayi wà Nzambì wa dîbâ edi, wàkalayàYe bwà cìvwàYe mwà kwenza. Ne nyewu tuMumònà ushindika bilondeshile Mifündu ànu menemene cyàkambàYe ne Yêyè neenzè, mu mùshindù umweumwe awu. Bidyànjila kwamba, byenzeka ànu menemene mu byôbì, musangu wônsò, bwalu Nzambì ngudi ubyàmba.

¹⁷ Muntu yêyè, nânsha mwikale nganyì, bu yêyè mwà kuteeta kudyànjila kwamba dîyì dyà mùshindù awu, bidi mwà kwenzeka musangu umwe pa miliyô dikumi. Bu muntu mwà kukwambila ne *cintu kampànda* necyènzekè, ne ncifwànyìne—ncifwànyìne kwenzeka pa *dîbâ kampanda*; musangu ùmwè pa miliyô dikumi. Ne pashìishe *mwaba* mwine wìkalaci ne cyà kwenzekela, ncifwànyìne kwikala musangu ùmwè pa miliyô lukàmà.

Ne pashìishe *dîbâ* dìdici cifwànyìne kwenzeka, biyaaya ànu kuya, ne mùshindù wenzekaci, ne cyènzekà ciine *ncinyì*, ne bikwâbò, s’ciyaaya mu mùshindù wa muntu kayi mwà kubùka cyanààna to. Patûdi tucimònà cipwângâne ànu menemene, kantu ne kantu ne musangu wônsò, pa dîbâ adi’s n’Nzambì.

Ne pashìishe tudi twalukila buludi mu Mifündu. Ncifwànyìne kumweka cyenyi kutùdì. Kadi twalukila buludi mu Mifündu, katûyi nânsha bamanye ne pàà kutangila pine mpenyì to, kâdi Nyumà Mwîmpè ûcipatula patòòke ne ùtwângaja ànu Dîyì dyônsò pàmwè, wenza cimfwànyì mwaba awu bwà kutuleeja ànu dîbâ ditùdì ne mwoyi. Tudi munkacì mwà kushintulula bipungu.

¹⁸ Tudi—tudi pa ditumba kampànda. Mbipeepele pàdì muntu wibaka ditumba, bwà mwibaki wa ne màdyôtò, wibaka ditumba. Ùdi ûbanga, bantu bônsö batèeka màdyôtò ànu mu mulongo ùmwèùmwè awu, byenze mùdì dìngumba kampànda dibanga, ne dibanga kulonda mulongo, bìdi ànu bîmpè. Kadi, panùkaadi nukafika ku matumba awu, kùdi kùkèngelà bwà nwêñù kukùdimuka ne kutangila luseke lukwâbò aku’s!

Kadi, cidi Nzambì munkacì mwà kwibaka kî ncimanu to. Yêyè udi wibaka nzùbu, nwamònù’s, nènku kùdi bikosolwedi ne matumba byàbûngì bïkaavwàYe mudyànjile kwamba mu Bible emu. Nenku matumba awu, muntu kana yônsò ewu mmufwànyìne kuteeta kwenza ditumba, kadi’s bidi bïkèngela diikale bilondeshile dizola. Kabiyì nânku to, bïkèngela bwà bôbò kucyùpula cyàkàbìdì.

¹⁹ Pa nânku tudi—tudi tutumbisha Nzambì bwà bwîmpè Bwèndè ne bwobùmwè bwènù nwêñù aba, ne biibi byunzulula bìdi Mukalenge mutupeeshe, biine abi nku beena kantu-ku-byanza aba. Nkaadi misangu yônsò mulwâlwâlwé mvitâ bwà kwamba ne mêmè—mêmè ncitu ngitabuuja . . . ntu ngitabuuja

bantu bàdì mu màngumba. Kadi ncitu ne dîbà dyàbûngì dyà kukànkamika màngumba to, bwalu dyônsò dyà kudiwu didi dyàsa lupangu ludinyungulukile dyôdì nkàyaadi.

²⁰ Nènku—nènku mbyenze ànu bu, ngeela meeji, cìvwà nkaabwalu kakesè kàtù Mwanèètù David mulonde, kaa mùvvwàye ùmuna mabata, ne kwambaye ne musulu kuulawu. Nènku dibata dyônsò, nudi bamanye's, avwa ajinga bwobùmwè ne dibata naadi, kadi kaàvvwakù mwà kubùpetà to bwalu bavwa ànu baàkàngile ônsò mu mpangu. Kàdi mâyi mmenze ànu àbànda kuulu menemene anyì, kàdi kulelemijawu mabata awu ne kuàpàtulawù mu lupangu.

Pa nànku mêmè—mêmè ndi ngeela meeji ne mùshindù awu ki ùdì ùkèngela kucyènza. Mpadi ànu mâyi àbànda kuulu, nwamònou's, nènku tudikù mwà kupeta mùshindù wà kupàtuka mu lupangu ne—ne wà kubwela mu bwobùmwè muntu ne mukwèndè, nudi bamanye's, kwikalaku ne dinanga dilelèlà dyà Kilistò munda mwà myoyi yètù.

²¹ Nènku Beena Kantu ku byanza bàà Èvànjetiyò mu kabujimà aba bàtu di—dijiba dyà mâyi mu cipèèlà bwànyi mêmè. Bwalu, misangu yàbûngì... Ntu ne bâna bèètù, bâna bèètù bàà maalu mîmpè, ngeela meeji, mu dìngumba ne dìngumba dyônsò dînkadìku mutuutakeenè naadi: ba-Presbytériens, ba-Luthériens, ba-Baptistes, beena Mpenta, mìshindù yônsò mishiileshialangane ya beena Mpenta, Èglise de Dieu, ne ba-Nazaréens, ba-Pèlerins de la Sainteté. Bâna bèètù bàà maalu mîmpè, myaba yônsò. Kàdi, misangu yàbûngì, kabatuku mwà kungiitabila mu cisùmbù cyàbò to, bwalu, nwamònou's, kî nne kabeena bacìtabuuja to, kadi, nwamònou's, ncifwànyìne kubàkòsolola ne dìngumba dyàbò. Ne paùdì wenza nànku, mu bushùwà bwà bwalu, aci's—aci's ncimana bwalu.

²² Mwaba ewu àbìdì adi pansi aa, kuvwa Mwanèètù wa ba-Méthodistes mulwè kündì, ncyàkuteèla dînà dyèndè to. Muntu wa maalu mîmpè, uvwa ufunda mukànda wà cibungu pa bìdì bitangila dyondopa dyà kùdì Nzambi, ki kulwaye kündì bwà mu—muyiikì kampànda. Twétù kusòmba ne kuyiikila ndambù. Yêyè kwamba ne: "Twétù cintu cìmwèpelè citùdì tukubèngela, utu ànu mulamakanangane dîbà dyônsò ne beena Mpenta abu."

Mêmè ne: "Nànku, enzaayaaku's bwà èkèleeziyà wa ba-Méthodistes acituudile mfranga. Nêndwe."

Apu ki ngònyoonyi kwandamunayi myadi's. Nwamònou anyì? Yêyè—yêyè kwamba ne: "Ee, mu bushùwà bwà bwalu, kî mmêmè—mêmè udi èkèleeziyà wa ba-Méthodistes to. Mêmè ndi ànu wa ku bôbò cyanàànà."

²³ Mêmè ne: "S'ki bwalu mbwôbò abu. Wamònou anyì? Bôbò abu, beena Mpenta biine abu, ki badi bunzulula biibi byàbò. Wamònou anyì? Bôbò ki bândiku mwà kufika kùdìbo. Nenku

bûngì bwônsò bwa biibi bunzululabo abu, mona's, twêtù tudi badilongolole bwà kubwelamu."

Mbyenze ànu bu mu Bwàkabuulwibwà, nshapità mwi3, mbambe ne: "Ndi mwimane ku ciibi nkòòkola. Muntu kana yônsò yéyè munzulule ciibi, Nêmbwelè ne nêndye didyà dyà dilòòlò." Ne mwine awu's uvwa n'Yesù. Bwônsò bwetu tudi bamanye ne ùvwa n'Kilstò, ne Yéyè udi Dîyì. Neyà bushùwà. Yéyè ùdi Dîyì.

²⁴ Nenku Beena Kantu-ku-byanza bàà Èvaànjeeliyò mu Kaabujimà batu bu dijiba dyà mâyì mu cipèèlà mutùdì mwà kudisanga. Èkèleeziyà nànsha umwe katu ucítuuñila mfranga to. Bôbò bwônsò, pàmwè, ba—bantu bafùmìne mu maèkèleeziyà, nènku tudi tudisanga ne twenza bwoñumwè, buloba bujimà, mu nyungulukilu myaba yônsò.

²⁵ Ne mêmè ewu nkaadiku mwambulwishe ku dijuula dyà mâtà àbûngì, àbûngì menemene pa buloba bujimà, à Beena Kantu-ku-byanza baa Èvànjeeliyò mu Kaabujimà. Ndi ne kusakidila bwà mpùngà uvwabò bampèshe awu. Mwômò amu, beena kantu-ku-byanza nebàcìtùüdile mfranga. Dîbà adi, èkèleeziyà yônsò, mmi—mmiswè kulwa, nànsha bishi.

Kàdi, dîbà adi, pàdïku... Mêmè ncitu musweku kuteeta kukoka muntu kampànda bwà kumuñumusha ku èkèleeziyà wendè to. Wêwè shàala ànu mu èkèleeziyà webè awu kàdi mwangalaja Bukénkè. Nwamònou anyì? Ikalala mwena Kilistò mulelèlè. Mpaasàtà webè neàkwanyishè. Munsantu mulelèlè, wa lulamatu, mushùwashùwàlè, muntu kanà yônsò udi witabuuja Nzambì neànyishe muntu wa nànnku. Èyowà.

²⁶ Mpindyewu, ndi ngeela mwanèètù ewu twasàkidila, ne mukàjèndè, ne dyâpà edi, bwà mpùngà ewu. Nènku dyâpà edi didyundeku. Mabènesha à Nzambì ikalèku pa dyôdì, ne dyôdì diikalèku cyamu cyà mudimu mu byanza byà Nzambì, bwà kusùngila nkàmà ne nkàmà ya bantu kumpàla kwà Dilwa dyà Mukalenge; ne nwêñù bônsò beena mâtà makwàbò anyì baaminyàmpalà bàà mâtà bàdi kaaba aka aba.

²⁷ Mu Mukàndà wà Misambu, mpindyewu, ndi muswè kwakula pa cyena—cyena-bwalu cyà pabwàcì menemene, dilòòlò edi, ànu bwà katancì kakesè cyanàànà. Ndi ne ndambù wa Mifùndu mifùndu kaaba aka. Nènku—nènku mvwa mwele pàmwápà meeji ne, dilòòlò edi, mvwa mwà kwakula pa cintu kampànda cyà cishìllàngànè. Kàdi, pa kumònà mùdì dîbà dyènda dìya, mònà's, ncivwa muswè kushààla ntàntà buleyi nànnku awu to, nànnku ki mêmè kubuulula mwaba ewu ne kupeta ndambù mukwàbò wa Mifùndu. Nènku ndi muswè kwakula pa cyena-bwalu eci: *Dyambwibwa*. Nwamònou anyì?

²⁸ Mpindyewu, twêtù tudi twitabuuja ne nekwíkalè Dyambwibwa. Beena Kilistò bônsò bàdi bììtabuuja aci,

bàdì babadi bàà Bible abu, bàdi bììtabuuja ne nekwìkale Dyambwibwa.

²⁹ Nènku mpindyewu bwà kubala bwà kupeta mwaba wà kushindamijila bitùdì twamba, tudi tubala Musambu wa 25. Ndi muswè kwamba ne... Numfwileku luse. Musambu wa 27, mvensa 1 too ne ku 5.

MUKALENGE ùdi bukènkè bwànyì ne lupàndù lwànyì; üngààcìnà ki nganyì? MUKALENGE ùdi dikàndà dya mwoyi wànyì; üngààpetelà bwôwà ki nganyì?

Beena lwonji, nànsha beena lukuna banyì ne balwishi banyì, padibo bandwila bwà kudyà mubidi wànyì, bàdi batetuka ne bàdishinda.

Nànsha bu ne cilwilu mwà kwasa citùùdilu cinniyungulukile eku ne eku, mwoyi wànyì kawàkucìna to: nànsha bu mvitâ mwà kunjuukila, mu cyòcì eci ki mûngììkalà mweyèmène.

Cintu cìmwèpelè cíntu ànu mujingèjingé cyà kùdì MUKALENGE, ciine cîngììkalà ngenda nkebangana naaci; mbwà mpeteku mwà kwikala musòmbèle mu nzùbu wa MUKALENGE matükù ônsò à mwoyi wànyì, bwà kwikala kubandila bulenga bwà MUKALENGE, ne kwikala kulòmba mu ntempelu wende.

Bwalu mu cikondo cyà lutàtu yéyè neànsokòke mu kazùbù kàà ciikishilu: ne mu mwaba musokome wà ntenta wendè wa kusambakeena ki mwànsokokàye; yéyè neànsikike pa lubwebwe.

Mukalenge àasadileku mabènesha Èndè ku dibala adi dyà Dìyì Dyèndè.

³⁰ Mpindyewu, leelù ewu, mu dyakula dyà pa cyena-bwalu eci, mpindyewu bìdi mwà kwenzeka ne bámwè beenu bììkalè ne mmwènenu mushììlàngànè, ne-ne misèsù yíndì ngangata bwà kulonda. Kàdi mbanganyì munda emu bàdi bììtabuuja ne Bible ùdi ûlongesha ne nekwikaleku Dyambwibwa dyà Èkèleeziyà? [Disangisha dìdi dyàmba ne: "Amen."—Muf.] Èyowà's, mukalenge. Ncyà bushùwà, menemene, dibakula dyà Èkèleeziyà ne diya nendè. Nànsha wèwè mwikale Méthodiste, Baptiste, Presbytérien, anyì ne udi nganyì, mwena Mpenta, nekwikale dibàkudiibwa bwà kuya.

³¹ Nènku ndi ngeela meeji ne, mu dyakula, mêmè—mêmè ncyêna nteeta ànu bwà kujuuka kwimana mwaba ewu bwà kwamba cintu kampànda cíndì ngeela meeji ne ncifwànyine kusànkisha bantu to. Kacya ncituku mwanji kwambula dipììlla dyà bwalu abu to. Mêmè ndi muswè kujuuka kwimana mwaba ewu bwà kwamba cintu kampànda mu mùshindù wûndì ndyumvwa mulombòdìibwe bwà kucyàmba, cíndì ngeela meeji ne ncifwànyine kwikala dikwàcisha kunùdì, cintu kampànda

cidi cifwànyìne kuyiisha dilabula dyèbè ne Nzambì kumpàla, pawikala mwena Kilistò; ne pawikalà kùyì mwena Kilistò to, cikùfikishè ku didyùmvwa wêwè mwine bundù be, bwà wêwè kulwa mwena Kilistò. Nènku mu kiipacila aku ki mûntù mêmè misangu yônsò nteeta bwà kuteeka meeji ànyì mu mulongo, mu mùshindù udi Mukalenge mufwànyìne kundombola awu.

³² Mpindyewu, tudi badìmwijijiibwe, bu mùdìbi ne mu Dilongesha dyà Cyôcì eci mu matùkù à ndekeelu necisekiibwè. Panwikala baswè, twänjàayi ànu kubala Cyôcì aci, katancì kakesè cyanàànà. Cidi mu Peetèlò Mwibidì, nshapitâ mwi3. Twänjàayi kubala ànu katancì kakesè cyanàànà pa cyôcì eci. Nshapitâ mwi3, ku mvensà mwi3 ne mwi4. Tumònààyibi cyôcì eci ní kí ncyà bushùwà.

Badyanjile kumanya eci ne, nekùlwe baseki mu matùkù à ndekeelu, benda bilondeshile nkùkà yàbò,

Biikale bàamba ne: Mulayi wà dilwa dyèndè ùdi penyi?...kacya baataatù bëëtù bààlìàala tulù, maalu ônsò mmatungunuke ànu muvvawu kacya ku cibangidilu cyà bufuki amu.

Bwà bwalu ebu bôbò bâdi bapanga kumanya cyôcì aci ku bukolè ne, nku dîyì dyà Nzambì kuvwa maulu à kale, ne buloba bupàtuke mu mâyi ne mâyi-...ne mu mâyi:

Ki bwà cinyi buloba bùvvàku abu...abu, bu mwàkabwikipidiibwàbu ne mâyi, bwàkabutuka:

³³ Mpindyewu tudi tumònà ne, kabingila kàdì kenza ne cyena-bwalu eci bâdi bàcikèèka, mbwalu mupròfetà mmwâmbé mwaba ewu ne mu matùkù à ndekeelu aa baseki aba nebàlwé bàamba byôbì bintu ebi. Nwamònù anyì? Cyàkadyànjilà kwambibwa, kabingila kàdì kënza ne bantu biikale bènza maalu leelù ewu mùshindù ùdibo bènza ewu. Mònà's, nwénù's nudi bulelèlà bacïndile, bwalu Bible ngudi mwâmbé nàñku. "Mu matùkù à ndekeelu nebìikale bapape mitù, badibàndishi, banangi bàà bisànkasanka kupita kunanga kwà Nzambì; bashipi bàà bipungidi, bashiminyinyanganyi bàà maalu, kabàyì ne kudikànda, badyombodi bàà aba bâdi bîmpè; biikale ne mmwènekelu wa difwàna dyà Nzambì, kàdi bàvila bukolè bwàdi: tapuluka ne bàà nàñku awu abu." Netùmonè ditentula dyà Bulelèlà anyì? Èyowà bushùwà.

³⁴ Pààkapweka Môsà mu Ejiipitu, bwà kusùngila bânà bàà Izàlèèlà, mwikale ànu ne dikombo mu cyanza cyèndè bwà dishindika, mwikale ne Nzambì wa mu Dyulu paanyimà pèndè, yéyè wakenza cishimà. Kwàkalwa batentudi paanyimà pèndè, benza cintu címwècímwè cyàkenzaye aci. Nwamònù anyì? Mpindyewu, bôbò bààkalwa biibidì, paanyimà pà yéyè mumane kucyènza wa kumpàla. Pashìlshe bôbò abu kulwabo, bwalu bàvwa bôbò batentula cìvwàye mwenze, batentula cyà ku muji. Ki citùdì tusangana ncyôcì aci.

Nènku mpindyewu wêwè udi wamba ne: “Èè, aci’s cìvwa mmu matùkù à Môsà.”

Kàdi Mifündu yìmwèyìmwè ayi’s nyidi yàmba ne nebààlukilè mu matùkù à ndekeelu. “Ànu mùvwà Yambele ne Yane bakàndàmeeene Môsà amu, ki mwìkalàbi kàbìdì bwà bantu aba bàà meeji moonèke pa bìdì bìtàngila Bulelèlè.” Nwamònu anyì? Dítentula, bintu byà mìshindù yônsò bwà kulùndula bantu. Ne pashìishe piìkalàbi ne . . .

³⁵ Dyambwibwa dììkalà mwà kwenzeka edi, ne cyônsò cìdi Nzambì naaci mu njila wa Dìyi Dyèndè aci, kùdi misangu yônsò ànu cintu kampànda cìpàtuka bwà kutonkola Cyôcì aci bu bôbò mwà kupeta mìshindù. Cìdi—cìdi—cìdi nkiipacila kàà Sàtaanà bwà kwenza nànkú awu.

³⁶ Bu mùdì mwanèètù wa balùme ewu, wa ku disangisha dyà mu Las Vegas dyàdyà, ùvwa wàmaba ne: “Sàtaanà wàkamba ne buloba ki mwaba wèndè wà bukòòkeshi, ne—ne cyèndè ciimamwéndè wa bukalenge cìdi kuntwaku.”

Ndi mumanye ne Sàtaanà ki nzambì wa buloba ebu. Dítunga ne ditunga dyônsò mwinshi mwà dyulu emu ndikòntònonyìlbwe kùdiye. Menemene. Buloba ebu mbwà Sàtaanà, kàdi Yesù ki wângata bukòòkeshi bwàbù. Yéyè wàkaMulambulabu díngà ditùkù. Kàdi Yéyè kubùbenga, kàdi, kwamba Ye . . . bwalu Ùvwa mumanye ne Yéyè ki uvwa ne cyà kulwa Mupyànyi wabù mu matùkù àcilwalwà.

³⁷ “Baseki.” Twanjì tushaalààyi ànu katancì pa mwâku ûmwèpelè awu, kumpàla kwà twêtù kuya kule. Baseki!

Mvwa mbala cibejibeji kampànda, kukaadi mbingu mitwè ku yìbìdì nànkú awu, mu Tucson, mwaba uvwa muntu mulùme wa ba-Anglais wa mu Angleterre mwambe cishìmbì díyi kampànda. Cìdi mu mutù wa bwalu wa mu cibejibeji aci, ne dipoopediibwa dyà pa nkùrusè dyà Mukalenge wetù Yesù Kilistò adi dìvwa ànu difwikakaja cyanàànà bwà kushimakajangana, pankaci pàà Pilaatù ne Yesù, bwà ne Yéyè wàkalwa bwà kwenza . . . ànu bwà kuDivwija cintu kampànda. Ne kakwèna mìshindù wà twêtù bafwànyine kubàjaadikila ne kí ncyà mafi to, bwalu bìdi bìkèngela bwà bintu byônsò byà Nzambì bìitàbiibwe ku diitabuuja. Twêtù butùdì naabu mbwà kuciìtabuuja. Mpindyewu, ki kutungunukaye ne kuumvvija mìshindù ùvvà cyôcì aci cifwànyine kwikala cyenjìibwe.

³⁸ Àbìdì àdì pansiì aa, mu ditunga dinène adi, Londres, mu Angleterre, éyowà’s wè, mwine mùvwà John Wesley ne Charles, ne bayiishi banène bààbùngì bàà mu matùkù à mbangilu abu, Spurgeon ne bakwàbò, bayiishile Èvànjeeliyò mu bisalu byà bisoosà byà kwelela nyama ne myaba yônsò kwine kuntwaku. Bâàkadyombola mukenji wa ditùkù dyàbò awu, kàdi tàngilààyi numòne mmwènekelu ukààdibo nendè mu ditùkù edi.

Ki mwaba ùdì Mwanèètù Williams ne bakwàbò abu basanganyiibwa dilòòlò edi. Ndìmwè dyà ku matunga adi matàmbe kwikala mapwekèshiibwe milongo pa buloba. Nkaadi mwendèndè pa buloba bujimà, kàdi ncyéna mumanyeku cintu cìdì kaciyi cyanyishìibwe kùdì mikenji bu Angleterre to. Ùdi... Billy Graham ùtu mwambe pèndè cintu cìmwècimwè aci. Mònà's, byàkakèngela bwà kuumushaye mukàjèndè mu lupangu lwà dipicishila kapeepa amu, mùshindù ùvvà dya—dya—dyangatangana dyà balùme ne bakàjì dyenzeka's, bantu bitangile, mu mpangu yà dipicishila kapeepa mwine amu. Pâmvwà kuntwaku, ncyàkamònaku cintu cìvwà cifwànyine kupanda mwoyi wa muntu kupita bïvvà byènzenka mu Angleterre amu abi to; yéyè wa bwena wâkapeta mpùngà, ne, musangu kampànda, mulombòle buloba mu dilongolola awu. Cìdì cileeja ànu mùshindù wùdici mwà kudishinda.

³⁹ Kàdi, nudi numònà's, cìdì cyènza cyôcì aci, mukenji wàkapàtukà mwine musangu awu awu, ba-Anglais bâdi bateeta kwikala balame mukenji ùmwèùmwè awu bwà leelù ewu. Awu kawàkukùmbana leelù ewu to. Kawàkukùmbanaku to. Mmunyì mùdibi bifwànyine...

⁴⁰ Ambaayi tûng bu ne Môsà wàkalwa, mufwànyìne kulwa, mutwàle mukenji wà Noà ne: "Netwìbake bwâtu bwà twêtu kulelema twenda tupweka ne Nil"? Nùnku kî mbikùmbànè to. Kâbìdì nànscha Mukenji wa Yesù nùnku kî mmukùmbànèku mu cikondo cyà Môsà to. Nènku nànscha mukenji wa Wesley kawàkukùmbanaku mu cyà Luther nànscha; anyì wà Luther mu cyà Wes... mukenji, wa ewu anyì wa wàwa to.

Nènku leelù ewu, twêtu, dilongolola dyètù dinène dyà ndekeelu dìvwa m'Mpenta. Kàdi leelù ewu tudi twenda tuseemena kule ne cyôcì aci. Ne mukenji wà beena Mpenta kawàkusambakana ne Ewu to, bwalu nditükù dikwàbò. Cyônsò aci n'Diyi dyà Nzambì, kàadi diikale dìdiibaka. Ànu mùdì makàsà, mabòko, cyenda cìbànda, cìdì cyenda cìfwìmba Mukàjì-musela bwà Dyambwibwa. Nwamònú anyì? Kanuumushi—kanuumushi bantu bàà paanyimà pààpa bàba pa kaaba kààbò to; bôbò abu bàvwa ne mwoyi ku wàbò mukenji. Bônsò abu nebàpatukè, bàvvà mu Mukàjì-musela abu.

Mbyenze ànu mùdì mwoyi ùpicila mu cikolakola cyà blé. Ùdi wumuka mu blé, mu cizubu, kàdi blé ùdïfimba mu mmwènekelu wa lutete lwà blé lwàkayà mu buloba alu.

⁴¹ Ànu àbìdì àdì pansiì aa, mvwa mbala mukàndà ùvvà mwena Allemagne kampànda mufunde, bwà kudyula. Ùvwa wamba ne: "Ku ba—bakoleshi bàà maalu bônsò bàà pa buloba, ku bwônsò abu William Branham kàdi's ki watòkolu." Yéyè ne: "Mònà's, yéyè kéné cîngà cintu to ànu... Yéyè's mmwena—yéyè's mmwena majìmbu. Ùdi wenza bintu ebi." Nwamònú's, muntu awu, kàyì mumanye to.

⁴² Ne, pashiishe, muntu awu ùvwa mmudyûdi. Kàvwa nànsha mwitabùuje Nzambì to. Wàmба ne: “Nzambì kaayi pèndè’s uvwa mwà kwikala kacya wàsòmba mu bikondo byà mìdimà byàbya, ne mabòko Èndè mavungila mu difù Dyèndè, useka musùmbà wà beena Kilistò abu; biikale baamaamù, ne bayiidi Bèndè Yéyè mwine, mùvwàbo ne cyà kwikala’s; baamaamù ne twânà tutekète ne bikwàbò, kàdi ulekela nyama yà ntambwe yìbàdya; kàyi mene mwà kujuulaku nànsha cyanza to.” Nudi numònà kùdì meeji à musunya, mwaba ùdi dilonga dyà tùlaasà ne bikwàbò, kabiyì mwà kubàkula lùmònù anyì?

⁴³ Bìvwa bìkèngela bwà lutete lwà blé alu kumatalu mu buloba. Ànu mùvwàbi bìkèngela bwà Yesù kumatayè, bwà kujuuka cyàkàbìdì, ki mùvwàbi kàbìdì bìkèngela bwà èkèleeziyà wa mpenta kumatayè. Bìvwa bìkèngela bwà kuyaye mu buloba, bikondo byà mìdimà abi. Blé yônsò udi... Lutete lwônsò lùdì lùya mu buloba elu, lùdi ne cyà kushààla mu cikondo cyà mìdimà aci, bwà kuvulanganalù.

Kàdi lwàkabanga kupatula kabeji mu Martin Luther. Kulwa kupicilalu mu Wesley. Kutùngùnuka e kubwelalu mu Mpenta. Mpindyewu kubwelalu, bwà kupàtukilalu mu lutete. Nènku mpindyewu ndongolwelu yà cyena màngumba yìvvàbo bashiye paanyimà ayi, yìkaadi bikolakola, kwàjiki. Üdi ne cyà kwoshiibwa, ndongolwelu mwine wa cyena màngumba awu. Kàdi lutete lulelèlè lwà blé lùvwa lupatuke mu dìmwè ne dìmwè dyà ku malongolodi awu nelwàmbwibwè mu Mukàjì-musèla awu. Yônsò ayi pàmwè ki yènzà Mukàjì-musèla.

⁴⁴ Mpindyewu tudi tusangana ne, mu Angleterre mwàmwa, bàwwa biidikija dipoopediibwa dyà pa nkùrusè, àbìdì àdi pansi aa, musùmbà wa biine bantu abu, bàà baleepa abu... bânaà bàà nsukì mile abu ne bikwàbò, benda beela mikunda, bàbìkila Yesù ne “tonton” ne bintàkanyì byônsò abi. Dipota dyà kacya!

⁴⁵ Mpindyewu wêwè udi wamba ne: “Amu’s mmu Londres, mu Angleterre.”

Tàngilààyi numònà cìvwà mu cibejibeji lumingu lushààle elu, muneemu mu Amèrikè. Docteur kampànda munène mu bunzambi, wa mu cilongelu cilenga, ùvwa wàmба ne di-dipoopediibwa dyà pa nkùrusè divwa ncintu cifwìkàkaja bwà kushimakajangana. Kwambaye ne: “Yesù nguvwa muteete ànu bwà kuDyenza cyôcì aci; ne Yéyè ùvwa munwè bisoosa byà katadyamba mukwacike.”

Nènku tudi tucìsangana mu Genèsè, mwaba ùdìbo bàcyàmba. Ncisoosa bu mìdì dyamba dyà marijuana anyì cintu kampànda. Cidi cìsanganyiibwa ku Mubàndù kwàka. Nènku wêwè ànu mucinwe, necikulààdikè tulù. Pàmwàpa... Nènku udi mwenze ànu bu ne udi mufwè, mudyüpstile pansi, ne bikwàbò byônsò, munda mwà matükù àbìdì anyì àsàtù malondangane.

⁴⁶ Kwambaye ne: “PààkaMupèeshàbo mvinyò wa bwanji ne tunyòngà twà bululu apu, bìdi ànu mwà kwenzeka ne byónsò abi biìkalè bisoosa byà katàdyamba. Nènku pààkenzàbo aci, pààkaMupèeshabo cyôci aci, nènku Yéyè wàkadyupwila mu tulu byenze bu ne Ùvwa mufwè. KuMwelabo mu majambu, ne kuMulààdikabò muntwamu. Paanyimà pàà matùkù àbìdì anyì àsàtù, cyà bushùwà, pààkaalukilàbo kuntwaku, dîbà adi Yéyè's ùkaavwa mubìïke cyàkàbìdì, mwikale ànu bîmpè.” Yéyè ne: “Kuya Yè mu Inde ne kuya kafwìlaye mu mwaba kampànda, lufù lwètù ànu lùfwafwà bantu bwônsò elu, kàdi kuteeta bwà kufwìkakaja ntèndeelu kampànda bwà kushimakajangana.”

Dyàmbedi, mudyudi awu, mbwalu kaayi ebu ne bantu's? Nwamònù's, cìdi ànu nditùkù edi ditùdì ne mwoyi, baseki, nwamònù's, ditùkù dyà kuuja cipròfetà.

⁴⁷ Nzambi mmwabanye Dîyì Dyèndè mu cikondo ne cikondo cyônsò, nènku bikèngela bwà cyônsò cyà ku bikondo abi cimwèneshè Cyôci aci. Ne Yéyè ùtu kàbìdì mudyanjile kulongolola bantu kampànda bwà ciine cikondo aci, bwà kuuja Dîyì adi. Musangu wônsò ûvwà Ye wabanya Dîyì Dyèndè, Ùvwa ulongolola muntu kampànda bwà wôwù musangu awu. Pààkabanya Ye cikondo cyà Môsà, Wàkalongolola Môsà bwà cyôci aci. Pààkabanya Ye cikondo bwà kulediibwa kwà Mwâna wa Nzambi, WàkaMulongolola Yéyè bwà cyôci aci. Cikondo ne cikondo cyônsò, Yéyè ùtu mulongolole muntu Wendè, mudyanjila kulongolola, bu mùdì Bible mwâmbe. Cintu nànsha cìmwè...

⁴⁸ Piìkalàbi ne Nzambi ngwa kàiyì mikalu, Wa bukolè bwônsò, wa ngulu yônsò, mwikale myaba yônsò, mumanyi wa byónsò, mònà's, Yéyè's uvwa mumanye bintu byónsò kacya ànu ku cibangidilu aku. Pa nànku, Yéyè ùvwa mumanye. Kakwèna cintu nànsha cìmwè mu cìncyompancyòmpa to. Bàdì ànu ntwêtù bàdì beela meeji ne ki mù dici. Ki mùdì bintu byónsò byènda nànku. Alujaayi dîsù mu Dîyì Dyèndè bwà nùmonè cìdi Ye munkaci mwà dyenza, pa dîbà adi netùpetè luumvu.

⁴⁹ Mpindyewu, anji elààiyìbì meeji. Dyàmbedi, bu mwambi awu mwà kwikalaku mwêlè meeji, pààkaMwelabo mvinyò wa bwanji ne tunyònga twà bululu atu mukana apu ne, Yéyè's wàkabitwila. Yéyè kààkabìnwakù to, twamb'eku twamb'eku. Nwamònù anyì? Mbaseki bàdì ànu munkaci mwà kujuuka's! Cikwàbò cintu, mmunyì mùvvà Yesù wa ku Nazàlèéta ewu, mmunyì mùvvà nsòmbelu Wendè mukumbanangane ne cipròfetà cyônsò cyà Dipungila Dikulukulu? Bivwa mwà kwenzeka nànku munyi? Kabivwa mwà kwenzekaku to bu ne kabivwa bimana kulongolola kùdì Nzambi. Nsòmbelu Wendè ùvwa mukumbanangane ne cipròfetà cyônsò cyà Dipungila Dikulukulu. Cikwàbò cintu, piìkalàbi ne bayiidi abu mbàvwa bafwìkàkaje bwalu Bwèndè abu mùshindù awu, bwà cinyì muntu ne muntu wa kùdibo wàkafwà lufù Iwà muntu mufwile diitabuuja? Nànsha mene mùpostòlò Peetèlò

wàkamba ne: "Nkudimunaayi nwinyikè mutù wànyì pansi. Ncyéna mukumbànyine kufwà mwàkafwàye Yéyè to." Mùshindù wàkangatàbo Andele ne kumukudimunabo mutàngile ku luseke pa nkùruse. Bôbò, muntu ne muntu, s'bààkatwà cítampì ku bujaadiki bwàbò ne mashi abo sungasunga. Bôbò bavwa baMwitabùuje ne baMunange, ne bààkafila myoyi yàbò bwèndè Yéyè. Piìkalàbi ne Yéyè uvwa mufwìkàkaji wa maalu bwà kushimakajangana, mmunyì mùvvwàbo bafwànyìne kwikala benze nànku? Nwamònù anyi? Ngangacilu wa mu nyumà, bantu kabèèna babyùmvwakù to.

⁵⁰ Kuvwa muntu munène kampànda mwaba ewu, ànu àbìdì àdì pansi aa, laabì munène kampànda wâkafunda ne: "Môsà, pàvwàbo bàpicila mu Mbû Mukùnze apu," yéyè ne, "mu bushùwà bwà bwalu kacivwa mâyì to. Mâyì kaàvvaku mabànda e kwenzawu cimanu nànsha." Yéyè ne: "Bwalu bùvwa ne, kwaka nàka ku luseke lukwàbò lwà Mbû Mufwè aku, kùvwa cikutukutu cyà malèngà. Nènku wàkapícila mu mâyì à malenge, malèngà à mu mâyì. Kamuvwa mâyì muntwamu to. Cívwa ànu cikutukutu cyà malèngà, mu mbû wa—wa malèngà ki mwàkapicilàbo." Ne balombodi bààbùngì bàà ntèndeleelu bátu bàciìtabuuja, bôbò, ne bàciìtaba.

⁵¹ Mwaba ewu ànu àbìdì àdì pansi aa, pààkabàndà mubàndi wa mu mabùlùnga wa kumpàla ewu, wàkaalukila, ne kàvvwa mukamònemu cintu nànsha címwè cyà Nzambì to. Aci kàdi kunyungululaci too ne mitù yà bambi. Bôbò bavwa bàdyèlèla meeji ne Nzambi ùvwa musòmbèle mu mwaba kampànda muulu amu, mu butùmbùke bwà kilômèëtà nkàmà yìbìdì ne makumi ànaayi.

⁵² Mòna's, ekèlekèlé, mùshindù mwine ùdì dilonga dyà tùlaasà ne lungenyi lwà pa buloba ebu bikùdimune èkèleeziyà bimuvwijje cikùtùkùtù cyà bisoosà bibì's wè! Kùdì... Dilonga dyàbò dyà tùlaasà ne ndongolwelu wa bulongeshanganyi, maalu à mamanya ne dishidimuka, s'mbyà dyabùlù. Ndishidimuka dyà dyabùlù. Ki mùdì Bible mwâmbe nànku.

Kàdi dyètù Dishidimuka dìlwàlwa kadyàkwikalakù ne kantu nànsha kàmwè kàà kàpetangana ne edi dishidimuka to, nànsha kakesè. Kadyèna ne kantu nànsha kàmwè kàà dyòdì edi to, nànsha kakesè. Nekwìkale Dishidimuka dishììlàngànè, dishììlàngànè ne dishidimuka edi ne byà maalu à mamanya bitùdì naabì ebi. Patùdì tutàmba kubwela mu maalu à mamanya, tutàmba kulwa beena maalu à mamanya, tudi tutàmba kuya kule tukabwela mu bintu byà lufù, mateyi bwà kushipangana, ne bikwàbò byônsò. Mu Dishidimuka dipiyadipyà adi, kamwàkwikalaku ní ndufù, ní mmabèèdì, ní ntunyinganyinga, anyi ní mmikenyi ya màsaamà to. Nènku edi dishidimuka nebìkèngèle kudìbutula, bwalu ndyà dyabùlù.

⁵³ Tudi tusangana ne, mu Genèse 4, beena Kaayina mbàvvà babange dishidimuka, bìibaka bimenga ne nsesa, ne bikwàbò, ne byombelu byà mijikì, ne bààkalwa beena maalu à mamanya. Ki bantu kuyabo kule menemene ne Nzambì, cibì batènadleedi. Kàdi pààkalwà beena Seta, pààkabangàbo bôbò kulwa, bààkasoka Dînà dyà Mukalenge.

Kaa, nwénù bàdì bàmba bwà mudìmùke's!

⁵⁴ Ncyêna mwaba ewu bwà kutàpa muntu ku mwoyi, anyi kwamba cintu bwà èkèleeyiyà kampànda to. Nènku pawìkalà kaaba aka, mwikale mwena èkèleeyiyà ewu, ncyêna ngàmба cyôci eci bwà kukutàpa ku mwoyi to; bwalu kùdi bantu bîmpè bààbûngì mwômò amu, ànu mùdibo mu èkèleeyiyà mikwàbò amu. Kàdi mvwa mbala mu Shreveport lumingu lushààle elu, mwaba udi èkèleeyiyà wa Kàtòlikè mwambe cishimbì dîyì kampànda.

Kàdi tudi tumòna mwaba ùdìbo bâlwa kudisanga bônsò mpindiyewu mu nsangilu munène wa bukwàntèndeelu, ne bikwàbò byônsò, biikale buuja ànu menemene cidi Bible mwâmbe ne nebénzè aci. Ànu menemene's.

⁵⁵ Mpindiyewu tudi tusangana ne bôbò mbâmbe ne: "Mònà's, Bible..." Bàmwè bàà ku beena Mishòonyì mbaswè kwikala bakwàte ku Bible awu. "Mònà's," mùdibo bambe, "Bible's ûvwa ànu mukàndà wètù ewu, bwalu bulonda bwà èkèleeyiyà, ne kabàvwa nèndè mu difûnda dyà mikàndà to ànu kukaadi bidimu nkàmà yìbìdi ne makumi ataananu. Cìtu misangu yônsò ànu èkèleeyiyà." Bôbò ne: "Èkèleeyiyà nguvwaku, kî m'Bible to, ne Bible ùdi ànu bwalu bulonda bwà bìdi èkèleeyiyà mwenzè." Mashimi kaayipu à budîmu's wè! Mònà's, s'tudi ne Bible kùkaadi bidimu binunu bisâtù. Dipungila Dikulukulu's dìkaavwa difundiùbwe mu Mifùndu, munda mwà nkàmà ne nkàmà yà bidimu kumpàla kwà dilwa dyà Kilistò. S'cìdi ànu cintu cyà budîmù cyà dyabùlù!

⁵⁶ Kàdi nyawù tusangana mu ditùkù edi, mùdì diseka dinène ne dyelulwila dyà Bible edi, ne biikale bâteeta bwà kuMusaka pambèlu, bìkèngela bwà Nzambì alumbulwishes èkèleeyiyà ku cintu kampànda. Yéyè kêna mwà kwikala mujaalàme . . .

Kabèènakù mwà kupweka mu mùsèèsù emu ne kunkwàta, ne kwamba ne ndi nyeemesha màshinyì lubilu lwà kîlòmèètâ makumi anaayi ne mwandamukùlù ku dîbà mu mwaba ùdì ùkèngela kunyeemesha lubilu lwà kîlòmèèt makumi asatu ne yìbìdi to, amba ànu kwikâle cintu kampànda mwaba awu bwà kungambilà ne ndi ne dyanyisha dyà kunyeemesha ànu lubilu lwà kîlòmèètâ makumi àsâtù ne yìbìdi. Bìkèngela ciìkalèku.

Kàdi Nzambì neìkale mwà kulumbulwisha èkèleeyiyà, neàlumbulwishes bantu, dîngà ditùkù. Aci kaayi tudi bamanye. Kùdi Cilumbulwidi ciìkalà mwà kulwa. Pa nànkù piìkalà Ye mwà kumulumbulwishesila ku èkèleeyiyà wa Kàtòlikè,

ng’èkèleeyiyà wa Kàtòlikè kaayì awu? Piìkalà Ye mwà kumulumbulwishila ku wa ba-Méthodistes, ba-Baptistes’s mbajimìnè. Yéyè mumulumbulwishile ku ba-Unitaires, ba-Binitaires’s mbajimìnè. Nwamònù anyì? Yéyè neìkale mwà kumulumbulwishila ku cinyì? Yéyè mmwambe ne Neìkale mwà kumulumbulwishila ku Kilistò, ne Kilistò ùdi Dîyì. Nènku nku Dîyì dyà Nzambì, ki kwalumbulwishila Nzambì. “Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì. Ne Dîyì dyàkavvijiibwa mubidi ne dyàkasòmbela munkaci mwètù. Umwèumwè awu makèèlèlà, leelù, too ne kashidi.” Nwamònù anyì? Pa nànkù, Yéyè neàmulumbulwishile ku Dîyì Dyèndè.

⁵⁷ Nènku mpindyewu tudi tujandula mu ditùkù edi ne, pàdìbo bateeta bwà kusakila Bible pambèlu apu (“Itabaayi èkèleeyiyà!”) Bible awu: kí mbaMusweku to. (“Èkèleeyiyà!”) ànu bwà bààmònaku pààkukwàtàkajilabo mùshindù kanà wônsò wà twitabààyi anyì cintu cikwàbò kanà cyônsò, kàdi kwikalabo bëndela ku cyôcì.

⁵⁸ Èè, bu mûmvwà ngààkula dilòòlò dikwàbò mu Shreveport. Mu mèè—mèèsà à Mukalenge, pàdìbo bashipa mwânà wa mùkòòkò wà mulàmbù awu, kabivwa bìkèngela bwà kwikalaku “lwevènyì nànsha lukesè munkaci mwàbò to, mu bule bwà matùkù ônsò mwandamutekète awu,” kakuyì lwevènyì to, kakuyì mâmpà meela lwevènyì to. Bivwa bìkèngela bwà cintu cyônsò kwikalaci kaciyì ne lwevènyì to. Aci cìvwa cileeja bikondo mwandamutekète byà èkèleeyiyà bitùdì naabì mu mukàndà mwaba ewu ebi, nènku kakwèna lwevènyì to. Cinyì? Ncintu kampànda cidi cisambakaja Kù. Nènku tudi tusambakaja twitabààyi ne dingumba, ne bikwàbò byônsò, ne Dîyì, kàdi kutungunuka ànu ne kuteeta kucibìkila ne n’Dîyì. “Kamwìkadi ne lwevènyì nànsha lukesè to, biikale nànkù mu matùkù ônsò mwandamutekète awu.”

⁵⁹ Nànsha cìdì cìdìibwa leelù ewu eci, kanùteeci kucìlama bwà mààlabà to. “Nûcyoshè mu mudilu, kumpàla kwà dîbà kupàtukadi,” bwalu kùlwalwa Mukenji mupyamùpyà, ne cintu cipyacìpyà. Nwamònù’s, bateeta kucilama, kàdi aci’s ki lwidi lùdì naalù èkèleeyiyà. Ditabuluja dipàtuka, katancì aka, mu bidimu bitwè ku bisàtù, bàbangilapù bulongolodi kampànda. Dingumba didi dibanga, bulongolodi.

Kàdi nukààdikù bamònè anyì? Eci cyôcì cìkaadi cipaasalale eku ne eku munda mwà bidimu makumi àbìdì patùdi twakulangana apa, kàdi kakuyì bulongolodi nànsha bùmwè to. Ne bwôbò bwine kabwàdyàkwikalakù to. Eci nndekeelu. Blé ukaadi mwalùkile cyàkàbìdi ku blé. Blé ukaadi mwalùkile ku lutete lwèndè. Cizubu cìkaadi cidìkoke cyumùkekù. Nènku blé ùdi ne cyà kushààla mu Bwikadi bwà Mwânà, bwà kubobeshiibwaye.

⁶⁰ Kî ncintu cyà pabwàcì anyì, pàdìbi ne, àbìdì àdì pansi aa, ku Côte Est eku, nkwenzeke difiikishiibwa dinène dyà fitùtù? Kabàvwakù bafwànyìne kucyùmvwa to. Texas mufiikisha fitùtùù, lumingu lushààle elu. Kabèèna mwà kucyùmvwa to. Kanwènaayikù nufika ku dyumvwa ne cyôcì aci ncimanyinu anyì? Kanwènaayikù bamanye ne matÙngà adi munkacì mwà kukòsoloka anyì? Izàlèèlè ùkaadi mu buloba bwèndè. Ne bimanyinu ebi bìdi bîleeja ne tukààdi ku nshìikidilu. Cikondo cimwècimwè aci kùdi difiikishiibwa dyà fitùtùù, kanwènaayikù numanya ne ki cimanyinu cyàkambà mupròfetà aci anyì? Èyowà's. "Kàdi nekwikale Bukênkè lwà pa ibaamulòòlò," bwà ne nekùlwé Bukênkè kampànda mu cikondo cyà dildòlò, pìlkala difiikishiibwa dyà fitùtù ne bikwàbò mwà kwikalà byenzeka mùdibi byènzekà mpindyewu emu.

⁶¹ Tàngilààyi ànu numònà mùdiku difiikishiibwa dyà fitùtù. Paapà's wàfumu ku difika muneemu emu.

Vùlukààyi ne, ku tabernacle, pavwàbò... Nudi ne mikàbà yà mèyi ayi. Ngeela meeji ne, nwénù bônsò nutu nuyàngata. Mùshindù ùvvà Mukalenge muleeje kwôkò aku ditùkù adi, mu tabernacle amu, ànu menemene myaba yìvvà bikondo byà èkèleeziyà abi mwà kusanganyiibwa ne mùshindù ùvvàbì mwà kwikalà! Nkààvwa mêmè mucane kubìzola ku cibàsa aku, bikondo byà èkèleeziyà binùdi numònà bizola apa mu mukàndà ebi. Nènku bu ne Nyumà Mwîmpè awu kàvwa mutùùluke mu Dikunji dyà Kapyà dinène adi, ne tuyè buludi paanyimà pààpa ku cimanu kwaka mubizole to, Yéyè mwine, pàvvà bantu nkàmà yìsàtù anyì yinaayi basòmbe, biikale baDítàngile!

Nènku paapà mmwenze ànu wasa lwendu bwà kuvwila muneemu, ki ngondo ùmba ufiikishiibwa fitùtùù mu mùshindù kampànda. Ki kukwàtabò maafotô àbò mùshindù ànu ùmwèùmwè ùvvàbì bizòdiibwe pa cibùmbà cyà ku cyambilu awu. Nènku yéyè mmwenze lwendu lwèndè lwà ùpicila muneemu alu mu matùkù à ngondo dikumi ne àsàtù, mwendele pa bibàndilu dikumi ne bisàtù, mufile nkòmunyo kùdi bantu dikumi ne bàsàtù, kùdi ditÙngà dyena nomba mwikalà dikumi ne yìsàtù, ne difiikishiibwa dyà fitùtù diikale dyènzekà myaba yônsò. Kanwènaayi numònà mwaba ùtùkaadi anyì? Tukaadi ku cikondo cyà nshìikidilu.

⁶² "Baseki nebàjuuke mu ditùkù dyà ndekeelu, bàmba ne: 'Kakwèna dishììlangana pankacì pàà cikondo cìvwàku aci, ne cyàkalààla baataatu bèètù tulù aci to.'"

Kàdi panùdì numònà bintu ebi bìbangà kwenzeka, bândulukaayi, nûdilongòlole. Cintu kampànda ncifwànyìne kwenzeka pa dîbà kanà dyônsò, Kilistò uvwila Èkèleeziyà Wendè.

⁶³ Mpindyewu, bôbò kabèèna bacììtabuuja to, bwalu cìdi... cìdi... Bôbò, bâdi ne cyà kwi-... Kabèèna bàfika ku dyumvwa

ne bôbô mene ki bàdì buuja Mifündu ayi to. Bulelèlà bûdi ne bantu kabèèna bâfika ku dyumvwa ne, mu kwenza kwà bintu ebi ne mu kwàmba kwà bintu ebi, bàdi munkaci mwà kuuja Mifündu to.

Mùshindù mwine ùvvà Kaayifa, mwakwidi munène, ne baakwidi bônsò abu mu diine ditùkù adi, bàvvà bàseka bàMwelulwila abu, kabàyì batàmbe kumanya ciine aci, Nzambì mwine ùvvàbo bimba awu ne: “Nzambi wanyì, Wêwè wâNdekekì bwà cinyì?” Musambu wa 22: “Mbatùbule byanza Byanyì ne makàsà Àanyì.” Bôbô munkaci mwà dimba ciine aci mu ntempèlu, eku Yéyè pèndè munkaci mwà kufwà pambèlu pààpa ku nkûrusè. Kabàvva bamanye ne bôbô mbàvva munkaci mwà dicyènza to. Nànsha Yesù mwine wàkasambilà ne: “Taatù, ùbàfwilè luse. Ki mbàmanye cìdìbo benza to.” Bwalu, mu bushùwà bwà bwalu bôbô mbàkaavwàbo badyànjile kwamba, kùdù Mifündu ayi ne, nebiìkalè bampofo.

⁶⁴ Nutukù bamanye ne èkèleeziyà wa Mishòonyì ne wa Kàtòlikè mbàkaadibo badyanjile kwamba ne, mu matùkù à ndekeelu, nebiìkale bampofo, cintu cìmwècìmwè aci, pa bìdì bitangila Mifündu, ne Kilistò mwìkàle pambèlu, uteeta bwà kubwela anyì? “Bwalu wêwè udi wamba ne: ‘Ndi mabanji, ne ncyêna nkèngela cintu,’ kùyì mumanye ne udi mwena dikèngà, mupèlè, mukèngeledi wa luse, butakà, ne mpofo, kàdi kùyì mucìmanyè to,” Bwakabuulwibwà 3. Ki bwalu mbwàbù’s, baalükìla cyàkàbìdì ku bufofo, badyatakaja bintu byà Nzambì ku makàsà, byenze bu ne (byôbì) Cyôcì aci kacìvwa ne cìvwàci cìbàmbila to, baseka baCyèlulwila. Aci ncìdì Bible mwambe.

⁶⁵ Kàdi, bwà Èkèleeziyà, Mukàjì-musèla, Dyambwibwa ndibuulula bwèndè Yéyè. N’Dimbuulwila Yéyè. Bwà ne, dibuulula adi, Mukàjì-musèla mulelèlà wa Kilistò ki wíkala mwindile dyôdì dibuulula dyà Dyambwibwa adi.

⁶⁶ Mpindyewu, ndibuulula, bwalu’s dibuulula ndiitabuuja. Kwêna mwà kupeta dibuulula piìkalàdi kàdiyì diitabuuja to. Diitabuuja ndibuulula, bwalu ncintu kampànda cìdìbo bakubuulwile wêwè. Diitabuuja ndibuulula. Diitabuuja ncintu kampànda cìdìbo bakubuulwile wêwè, bu mwàkadibi bwà Abraham, yéyè ùvwa mwà kubìikila cyônsò cìvwà cìbèngangana ne cìkaavwàbo bamubuulwile yéyè aci, bu ne kacìvwa nânku to. Mpindyewu, diitabuuja, ki cidi diitabuuja ncyôcì aci, ndibuulula dyà Nzambì. Èkèleeziyà mmwibakila pa dibuulula, Mubidi wônsò mu kaabujimà awu.

⁶⁷ Muneeemu emu kukaadi ndambù wa mbingu, mvwa ngààkula ne mwambi kampànda wa ba-Baptistes wa maalu mímpè be. Ùvwa mulwè bwà kuyiikilangana naanyì. Kwambaye ne: “Ntu mukunange wêwè bu muntu, kàdi,” yéyè ne, “udi mu cibwejakaji cyà kacya.”

Mêmè ne: “Nànku, ndi ndomba bwà undongololeku,” (yéyè ne . . .) “ne Mifündu.”

Yéyè ne: “Kawtakukùmbànaku to, Mwanèètù Branham, bwà kutwàngaja bintu abi ànu twêtù batèèke Mwâku wônsò pa Mwâku, pa Mwâku, menemene ànu ne cyena Ngelika, ne bikwàbò.”

⁶⁸ Mêmè ne: “Kaa, mukalenge, wêwè’s udi mumanye bipite apu.” Mêmè ne: “Nànsha mu Nsangilu wa Nicée mwine, patùdì mwà kwalukila paanyimà menemene pààpa, bidimu nkàmà yisàtù kuumukila ku lufù lwà Kilistò, bacìvwa ànu bakokangana bwà kumanya ne mmumanyi wa dibàlà kaayi wa beena Ngelika uvwa mu bulelèlè. Wêwè’s udi mwà kumanya. S’ndibuulula, cintu cyônsò mu kaabujimà. Ncibuulul- . . .”

Yéyè ne: “Mêmè ncyêna mwà kwitabaku dibuulula to.”

Mêmè ne: “Pa dîbà adi udi mwà kwitaba Kilistò bishi?”

Yéyè ne: “Mònà’s, Bible’s mmwâmbe ne: ‘Ewu udi witabuuja ùdi . . . Yesù Kilistò, ùdi ne Mwoyi wà kashidi.’”

⁶⁹ Mêmè ne: “Aci’s ncyà bushùwà. Mmwâmbe kàbìdì ne muntu nànsha umwe kêna mwà kubìikila Yesù ne n’Kilistò to ànu ku dibuulula dyà Nyumà Mwímpè udi mumubuwlilecì.” Nwamònù anyì? Ki bwalu mbwàbù’s, kunyunguluka kàdi kwalukila cyàkàbìdì buludi, kupòna cyàkàbìdì ànu ku dibuulula’s. Bìkèngela ciikàle cibuulùdìlbwe, mu Bible.

⁷⁰ Kaayina ne Abèlè kabàvwa ne Bible wa dibalabo to, kàdi bààkacìbuulwila Abèlè, ku diitabuuja, dìdì diikale dibuulula. Abèlè wàkalàmbula Nzambì mulàmbù mwímpè kutàmba wa Kaayina. Ku cyôcì aci, Nzambì wàkafila bujaadiki ne yéyè uvwa mwakàne.

Pààkakonkàbo Yesù mwaba ewu, Maatààyì 16.17 ne 18. Katwèna ne dîbà dyà kucibala to, kàdi panwìkalà baswè kucifunda’s. Wàkamba ne: “Bantu bâdi bàmba ne Mêmè Mwânà wa muntu Ndi nganyì?”

“Umwe wa kùdìbo mmwambe ne Wêwè udi ‘Môsà, Eliyà, anyì bikwàbò.’”

Yéyè ne: “Kàdi nwêñù nudi nwamba ne Ndi Nganyì?”

⁷¹ Yéyè ne: “Wêwè udi Kilistò, Mwânà wa Nzambì udi ne mwoyi.”

⁷² Yéyè ne: “Udi mubènèshìibwe, Simona, mwânà wa Yona, bwalu kí mmubidi ne mashi bìdi bikubuwlile cyôcì eci to. Taatù Wanyi udi mu Dyulu ngudi mukubuwlile Cyôcì eci. Pa lubwebwe elu,” dibuulula dyà nyumà dyà ne Nzambì ùdi Nganyì, Yesù ùdi Nganyì. Ne Yéyè ùdi dibuuludiibwa dyà Nzambì, Nzambì muvvijiibwe mubidi ne mubuwlila bàà pa buloba.

“Yéyè ùvwa pa buloba. Nzambì ùvwa munda mwà Kilistò, mwikale upungisha bàà pa buloba ne Yéyè mwine, ubuulula ciwvà Nzambì, mu mubidi wà musunya.”

“Udi Kilistò, Mwela maanyì awu, Mwânà wa Nzambì.”

⁷³ Yéyè ne: “Kí mmubidi ne mashi bìdì bikubuulwile cyôcì eci to, kàdi Taatù Wanyì udi mu Dyulu ngudi mukubuulwilecì. Pa lubwebwe elu Nêngìibakilepu Èkèleeziyà Wanyì, dibuuludiibwa dyà Dìyi mu muvù wàDì. Nêngìibakè Èkèleeziyà Wanyì, ne biibi byà iferno kabyèna mwà kuMutàmba bukolè to.”

⁷⁴ Mukàndà wa Bwàkabuulwibwà ki Mukàndà wà ndekeelu wà Bible. Mmutwà citampì bwà beena bupidyà. Mwômò amu, Bible ùdi wàmba, mu nshapità wa 22 ne: “Ewu yônsò wíkala mwà kuumushila Ku Dìyi dìmwè, anyì kusàkidila Ku dìyi dimwè, Nêngùùmushè cyèndè citùpà ku Mukàndà wà Mwoyi.” Tudi tufika ku dyumvwa, díbà adi ne, cyônsò cijimà civwa cifidìlbwe bwà beena kwitabuuja. Ne Cìdi cikàngula Mukàndà wà Bwàkabuulwibwà ne cìbuulula ne Mwena Mukàndà ewu mu kaabujimà ùdi Nganyì. “Bìdi bìkèngela kuMutàngila bu Alpha ne Omega,” kuumukila ànu ku Genèsè too ne ku Bwàkabuulwibwà, Yesù Kilistò ànu umwèumwè awu, ku ntwadijilu too ne ku ndekeelu. Ne cìbuulula bwalu busokoka Bwèndè bwônsò nkòòng bwà Yéyè mwine, ne bwà mpàngù Yèndè bwà bikondo Byèndè byà èkèleeziyà bìlwälwà, ne bìvwa bitwìbwemù citampì ne Bìtampì Mwandamutekète.

⁷⁵ Mpindyewu, Mukàndà wàkafundiibwa, kàdi pa díbà adi, nwavùlukaayi ne, Wòwò ùvwa mukàngà ne Bìtampì Mwandamutekète. Ne byòbì Bìtampì Mwandamutekète ebi kabìvwa ne cyà kukàngùdiibwa to (Bwàkabuulwibwà 10) ànu too ne ku dyela dyà mpungi dyà mwanjèlò wa pa buloba wa ndekeelu pa buloba, Bwàkabuulwibwà 10.7. Nwamònù anyì? “Ne mu matùkù à dyela dyà mpungi wa Mukenji wà mwanjèlò wa ndekeelu, mwanjèlò wa mwandamutekète, bwalu busokoka bwà Nzambì bùvwa ne cyà kujika mu cikondo aci.” Aci, nènku ki cyôcì cikondo citùdì ne mwoyi eci.

⁷⁶ Twêtù bônsò tudi bamanye ne tudi ne mwoyi mu Cikondo cyà Laòdikiyà. Kakwàkwikalakù cikwàbò cikondo cisàkidila ku eci to. Kacyèna mwà kwikalakù to. Pa nànkú, tudi ne mwoyi mu Cikondo cyà Laòdikiyà. Ne Bìtampì Mwandamutekète bìvvwa bilame Mukàndà awu ebi, mbwalu busokoka bantu, bìvvwa ne cyà kukàngùdiibwa mu diine ditùkù adi. Cyôcì aci ki cyàkalaya Yè. Mpindyewu, kacyàkwikala cintu kampànda nànsha címwè pambèlu pàà Dìyi nànsha, bwalu kwêna mwà kusàkidila ku Dìyi anyì kuumushila ku Dìyi to. Bìdi bìkèngela bwà kushààlacì misangu yônsò ànu Dìyi. Kàdi bìdi bìkèngela bwà dibuulula kubuululadì Bulelèlè bwàDì, cìdì Dyôdì adi, bwà kuDivwija dikùmbànàngàne ne mikwàbò Mifùndu. Nènku pa díbà adi Nzambì ùdi ùshìndika aci ne ki Bulelèlè. Nwamònù anyì?

⁷⁷ Nzambì kêna dijinga ne muumvwiji nànsha umwe to. Yéyè udi Mudyumvwijidi wa Yéyè mwine. Yéyè ùdi uDyenzela Yéyè mwine dyumvwija pa kwenza ne maalu àdììYe mwâmbé ènzekè. Bu mùvwâbi ne, ku cibangidilu, Yéyè wàkamba ne: “Bukénkè bwìkalèku,” ne bukénkè bwàkiikalakù. Aci kacyèna cìkèngela dyumvwija kampànda nànsha. Cyàkashindikiibwa.

⁷⁸ Mpindyewu, Yéyè wàkalaya bintu kampànda mu ditùkù dyà ndekeelu edi, mu Mifùndu. Mòna’s, s’ki byôbì abi.

Mùshindù awu ki ùvvà Yesù mwikale Mwânà wa Nzambì. Yéyè ngwâkalaya bwà kuMutùma. Pavwà Ye mu matùkù Èndè à panu pa buloba, ne bantu kabàyì mwà kuMwitabuuja to, Yéyè wakamba ne: “Kenkètaayi Mifùndu, bwalu mu Yoyì ayi ki munùdì nwela meeji ne nudi ne Mwoyi wà Cyendèlèlè, kàdi pààyì Yoyì ayi ki yìdì yìmfidila Mémè bujaadiki. Piìkalàbi ne Ncyéna ngenza byenzedi byà Taatù Wanyì to, díbà adi kanùNgìltàbùùjì to. Kàdi panwikalà kanùyì mwà kungiitabuuja Mémè, itàbùùjaayi byenzedi bîNdi ngenza abi, bwalu byôbì mbidì bifila bujaadiki bwà ne Mémè ndi Nganyì.”

⁷⁹ Èè, díbà adi, mu cikondo cyà Wesley, byenzedi byàkenzàye’s ki bìvvà bifila bujaadiki bwà ne yéyè ûvwa nganyì.

Mu cikondo cyà Luther, cyà dilongolola, mònà’s, cyà bushùwà, s’cyàkafila bujaadiki bwà ne yéyè ûvwa nganyì.

⁸⁰ Mu matùkù à beena Mpenta, dyalujulula dyà mapà, dyalujulula dyà mapà, dyakula dyà mu myakulu ne diipata dyà badémons, ne mapà, mònà’s, cyôcì aci’s ncyàkafila bujaadiki. Kakùvvwa dyela dyà bilèlè pa bwalu abu nànsha. Bantu bàvvwa bàmba, díbà dyàkajuukàbi bwà musangu wà kumpàla... Ntu mubale mikàndà pa maalu-malonda a Mpenta. Bààkamba ne: “Kacyàkunèngakù to. Necìbütukè butubutu.” Cìcidi ànu citeema’s. Bwà cinyì? Bwalu kanwâdyàkucijimaku to. Nzambì ngwâkamba ne necììkalèku. Ncitùpà aci cyà Dîyì, nènku kwêna mwà kucijìmakù to.

Nènku díbà adi pàdì Mukàjì-musèla munkaci mwà kubììkidiibwa bwà kupàtuka, neùcìjìmè munyi? Ndibuulula dyà dimwènèshiibwa dyà Dîyì divwijìibwe dilelèlè. Ne twétù tudi ne mwoyi mu diine ditùkù adi; butùmbi bwìkalè kùdì Nzambì; dibuulula dyà bwalu busokoka bwà Yéyè mwine.

⁸¹ Mpindyewu, Dyambwibwa didi ànu... Dyambwibwa diine ditùdì twamba edi, didi ànu bwà Mukàjì-musèla nkààyendé. Vùlukààyi ne, Bible mmwâmbé ne: “Ne bafwè bakwàbò kabààkiikala ne mwoyi to munda mwà bidimu cinunu.” Dyambwibwa dinène edi! Piìkalàbi ne kakwènaku Dyambwibwa to, balunda bàànyì, tudi penyì? Citwènza ncinganyì? Mmu cikondo kaayi mutùdì ne mwoyi emu? Mmulayi kaayi utùdì twétù naawù’s? Nekwìkalè Dyambwibwa. Bible udi wàmба ne nedììkalèku. Ne nedììkale ànu bwà Basungula

nkààyaabò, Inábànzà Musungula awu, Mukàjì-musèla mu ditùkù edi, udi mukòkìibwe mupàtula, Èkèleeyiyà.

⁸² Mwak-... mwaku mwine, èkèleeyiyà, udi wumvvija ne “mubiìkìdiìbwe pambèlu pa.” Ànu mwàkabììkila Môsà cisàmbà pambèlu pàà cisàmbà amu, Nyumà Mwîmpè ùdi munkaci mwà kubììkila Mukàjì-musèla pambèlu pàà èkèleeyiyà; Èkèleeyiyà pambèlu pàà èkèleeyiyà; bidimba, bifùmina mu dìngumba ne dìngumba dyônsò, biikale byenza Mukàjì-musèla, mucì-Mukàjì-musèla. Cidi mu—mu mukàbà wà mèyì, *Muci-Mukàjì-Musèla*. Mukajì-musèla wenda ùpàtuka, dibììkila, ne yéyè awu ki udi... mucì-Mukàjì-musèla ngudi, Mukajì-musèla’s wè, ki yéyè awu wíkala mu Dyambwibwa; awu, nkààyendè, kaciyì cìngà cintu to ànu Mukàjì-musèla, basungula badyanjila kumanya kùdì Nzambì kacya ku cibangidilu, mitòlokù yà mu nyumà yà Taatù.

Lekelaayi ngänji kwimanaku mwaba ewu katancì kakesè. Kàdi ndi ànu ntÙngùnuka ne kupampakana, pa kwela meeji ne nênnùlamè, nnulama ntàntà mupitepite bule.

⁸³ Kàdi, mònaayi, tàngilààyì, muntu ne muntu wa kunùdì aku. Nutukù bamanye ne, bidimu kumpàla kwà wéwè kuyì mwaniyì kulediibwa to, uvwa munda mwà tatwèbè bu mùtòlokù anyì? Ncyà bushuwà. Civuba, dimiinu, dìvwa munda mwà tatwèbè; difumine ku mubidi wa bulùme, kí nku mubidi wa bukàjì to. Nwamònu anyì? Mubidi wa bukàjì ùdi utwàla diyi, budimi bwà dyela mamiinu. Kàdi civuba cìdi cìfùmina kùdì taat-... Mpindyewu, twàmbè ne, munda mwà tatwanyì mêmè...

⁸⁴ Anyi, mwànàanyì wa balùme udi musòmbe apa ewu, pâncìvwà ne bidimu dikumi ne bisambòmbò, mwànàanyì wa balùme ewu ûvwa munda mwànyì. Ncìvwa mumumanye to, kàdi ûvwamù. Mpindyewu, kupicila ku budimi bwà dyela mamiinu, kupicila ku nsòmbelu wa cijila wa bantu baselangane, ùdi ùlwà mu cimfwànyì cyànyì. Nkaadi mumumanye. Ndi mwà kubwela nendè mu bwobùmwè. Nènku mmufike ànu pa dìbà mene dìvwàbi ne ki dìbà menemene adi.

⁸⁵ Mpindyewu, ki mùvvwàbi kàbìdì bwèbè wéwè, pawìkalà ne Mwoyi wà Cyendèlèlè, uvwa... munda mwà Nzambì kumpàla mene kwà kwikalaku dyulu ne buloba. Wéwè udi citùpà, mwânà wa balùme wa Nzambì, cyambiìbwà cyà Nzambì. Yéyè ûvwa mumanye cikondo mene cyûvwà mwà kulwa. Kudyànjila Yè kukulongolola bwà cyôcì cikondo aci, bwà wéwè kwangata kaaba aku, ne muntu mukwàbò nànscha umwe këna mwà kukàngataku to; nànscha kwikale ditentula ne bikwàbò bintu bûngì munyi. Bidi bikèngela ànu wéwè wíkale mwaba awu, bwalu Yéyè ùkaavwa mumanye ne wéwè ki wíkalapù. Mpindyewu udi mumwènèshìibwe. Mpindyewu udi mwà kubwela Nèndè mu bwobùmwè, ne ciine aci ki cìdi Yè muswè. Yéyè udi ujinga bwobùmwè, bwà kukuukudiibwa. Kàdi piìkalàbi ne mwoyi wèbè kawùvwà... kwônsò akù ànu

cyambiìbwà munda mwà Nzambì to, udi wêwè ànu mutentudi wa bwena Kilistò cyanàànà. Nwamònù anyì? Nekwìkalè bâà nànkù mìliyô ne binunu byà mìliyô, bôbò nebìikale ànu batentudi bâà bwena Kilistò.

⁸⁶ Dîyî dîmvwà mwambe ànu àbìdì àdì pansi aa. Mvwa ntàngila Mwanèètù Demos Shakarian udi pààpa wàwa, pàvwàbo benza disopakaja dyà mamiinu à ngombe, ntàngila tulangi twà disangishila bivuba ne mayi, ne bikwàbò, pàvwàbo bàbyàngata kùdì bangàngàbukà bâà nyama, ne ntàngila biine bintu ebi.

⁸⁷ Mu dipatula diine dyà bivuba byà nyama mulùme, mùdi bivuba bitwè ku mìliyô mujimà bìdi bìpàtukà kùdì nyama mulùme awu ku musangu wônsò. Ne mayi matwè ku mìliyô mujimà àdì àfùminà kùdì mukàjì ku—ku musangu ùmwèùmwè awu. Kàdi nukààdikù bamanye ne, mu tuubivuba twônsò tukesè tûdì twàtwà eku twàtwà eku atu, mìliyô mujimà watù awu, kùdì ànu kàmwèpelè kàà ku twôtò atu kàdì kalongolwela mwoyi, ne kùdì diyi ànu dîmwèpelè dìdì dyà bufukà anyì? Nènku kaacivuba kakesè aku nekàdikoke kënda kàbànda kapicila mu tuubivuba tukwàbò twônsò tukesè atu, kapicila buludi kumutù kwà kaacivuba ne kaacivuba kakesè kônsò kàdì kafwàñangane ànu naaku menemene aku, ne kapicila kumutù kwa kàka ne kapicila kumutù eku, nènku kalwa kusangana diyi dìdì dyà bufukà adi kàdi kudikoka e kubwelamu. Ne pashìishe bikwàbò byônsò bìdì bìshààla abi bìdi bifwà. Mòna's, nwènù bàdì bàkùlù bwà dilediibwa dyà kùdì virgo, kaa, kadyéna nànscha cyàbìbìdì cimwè cyà bwalu busokoka bwà dilediibwa dyètù dyà mu mubidi edi to, müşhindù üdidi didyànjila kuteeka, didyànjila kulongolola kùdì Nzambi!

⁸⁸ Mpindyewu, ku cibangidilu, kale wàwa, kale kukaadi bidimu ne bidimu kumpàla kwà bikondo kubangabì, wêwè, pawikalà mwena Kilistò mulediibwe cyàkàbìdì, dilòòlò edi, uvwa munda mwà Nzambì kwônsò ne kwônsò eku, Tatwèbè. Ki bwà cinyì, pawàkalwà mu mwoyi wà pànwàpà ewu ne ujikula bwena Kilistò, èè, maalu ônsò ènda ànu lubòkò, ukaadi mudikonkekonke ne mbwà cinyì bìdi nùnku, ne byônsò ebi. Cyôcì aci, ukaadi mudyélèèle nkongo pa bwalu abu. Kàdi, dîngà ditükù, Cintu kampàndà e kukulengaci. Cìvwa ncinyì ciine Aci? Mwoyi ûvwa munda amu awu, kacya ku cibangidilu. Nènku piìkalaci...

⁸⁹ Byenze bu kaamuyiiki kàànyì kàà mukanku aku, ùmupeta, mamwâkù upeta mukanku awu's. Nukààdi bangumvwe nyiisha pa cyôcì aci, mùvvà kânà kàà mukanku aku bakàtooyile mu cyâdì cyà nzòolo wa cikuka. Kàdi nzòolo awu, byèndè biibidilu byà kuteeta kudìusha twâñà twà nzòolo atu—atu, kânà kàà mukanku aku kakàvwakù mwà kubìdfa kabiyì bikàsaamisha to, bwalu kakàvwva kazòolo to, kwine kwônsò aku. Kàdi, kàvwa kasanganyiibwa mu lupangu lwa nzòolo amu pàmwè ne twâñà twà nzòolo atu, kënda kalonda cikuka aci. Kàdi cikuka aci cìvwa

mwà kwenda kukala mu lupangu lwà nzòòlo amu ne bikwàbò, kàdi kaamukanku aku kakàyikù mwà kubìtwàla to. Kàdi dìbà dyônsò dìvwa cikuka aci ànu mwà kutuuta cyokò-cyokò ne bikwàbò adi, ne twânà twà nzòòlo twônsò atu tuyaku, ne kôkò kàyakù pààkù's. Kàdi dîngà ditùkù . . .

⁹⁰ Mamwákù ùvwa mumanye ne ùvwa mwele mayi àbìdì, kî ndimwépelè to. Kùvwa ne cyà kwikala dikwàbò, mwaba kampànda. Kuyaye wenda ukebangana naadi, wenda ùpaapala eku ne eku, ùnyünguluka. Ndekeelu wa byônsò kuya kafikaye too ne kuulu kwà lupangu lwà nzòòlo alu, ne kusanganaye kânà kèndè aku, ne kukèèlayè lubila lukolè. Cìvwa ndiyì, mu mùshindù wà ne, kôkò aku kufikakù ku dyumvwa ne ki cintu cìvwà cikùmbànangane aci. Ki cìvwàko kèkeba ncyôcì aci, nwamònù's, ki kufikakù ku dyumvwa ne kakàvwa kazòolo to. Kàvwa kaamukanku.

Nènku ki mùshindù ngwôwò awu, mwena Kilistò yônsò udi muledìibwe cyàkàbìdì ewu, paùdì ulwa. Màngumba àukaadi mubwelebwèlè nànsha mikale bûngì kaayi, bûngì bwà ménà, bûngì bwà mikàndà mûkaadì mukafundefunde dînà dyèbè anyì nî mbinganyì, pàdì ànu Dîyì dilelèlè dyà Nzambi adi dishìndikiibwa ne divwijiibwa dilelèlèà kumpàla kwèbè mùshindù awu, udi umanya ne wêwè udi mukanku, ànu mwaba awu. Bwalu, cyokò-cyokò yônsò yà cikuka cyà nzòòlo ya ne: "Shààla mwena cikampànda ne shààla mwena cikansanga, ne nda mùshindù kampànda ne mùshindù kansanga" eyi, bìdi ànu ndukutukutu. Cìdi ne bwalu ndisakidila dilelèlè, dyà Dîyì ku Dîyì.

⁹¹ Pàdì civuba cibwela munda mwà-mwà mukàjì, kabyèna bìkèngela . . . Wêwè, kwêna mulwè civuba cyà buntu cyà kùdì tatwèbè, ne pashìshe cintu cìdi cilondà wêwè kushààla civuba cyà kùdì mbwa, ne cintu cìdi cilondà ciikale cyà kùdì mpuusu, cintu cìdi cilondà ciikale cyà kùdì nzòòlo to. Cyônsò cìvwa ànu civuba cyà mutnu pa cyôcì.

Ne Mubidi wà Yesù Kilistò, Mukàjì-musèla, neikale citùpà cyà Mubidi Wèndè Yéyè. Newikale . . . Yéyè ùvwa Dîyì, nènku nebikèngèle bwà Mukàjì-musèla ikale Dîyì; Dîyì disàkidila ku Dîyì, kusakidila ku Dîyì. Dibingishiibwa dyà Luther, dijidiibwa dyà Wesley, dibatiiza dyà Nyumà Mwîmpé dyà beena Mpenta, dyalujulula dyà mapà, ne bikwàbò byônsò byà Dyôdì adi abi, bìdi byènda naaDì pàmwè. Nwamònù anyì? Bidi bìkèngela ciikalè Dîyì dyambakaja pa Dîyì, civuba cyambakaja pa civuba, Mwoyi mwambakaja pa Mwoyi, bwà kupàtula cipidi cijimà cyà Mukàjì-musèla wa Mukalenge Yesù Kilistò. Mpindyewu, wavùluka ne wêwè ùvwa cyambìibwà.

⁹² Nènku mpindyewu, cintu cìdiku cìdi ne, paanyimà pàà twêtù bamane kujandula bintu ebi, byà ne Kilistò ùdi ùvwila Mukàjì-

musèla Wendè, mpindyewu tudi tubwela mu Mukàjì-musèla awu mùshindù kaayi? S'ki lukonko ndwôlò alu.

Bààbûngì batu bàmba ne: “Shààla mwena disangisha dyètù twêtù.” Dìmwè dyà kùdìwu diikale diswè mùshindù kampànda wà dibatiiza. Dikwàbò diswè kwenza *cikampànda* anyì *cikansanga*. Dikwàbò ndyâmbé ne: “Udi ne cyà kwakula mu myakulu, bwà cyanàànà kwêna muMupetè to.” Dikwàbò pààdì ndyâmbé ne: “Kabyéna bikèngela bwà wêwè kwakula mu myakulu to.” *Edi* nünku dyàmba ne: “Udi ne cyà kujà maja mu nyumà.” *Edi* nünku dyàmba ne: “Udi ne cyà kwela mbila.” *Edi* nünku ne: “Petà disaluka kampànda.” Byônsò abi's bìdi ànu bilenga, kàdi pashiishe, nànsha nànku, byônsò mbyà mashimi.

Mmunyì mùdì muntu mulùme udi...anyì mukàjì, anyì mwânà wa Nzambì, udi mulediibwe kùdì Nyumà wa Nzambì, mufwànyîne kuvila Dîyì dyà Nzambì? Pàdìbí ne, Nzambì Yéyè mwine údi ùmvwija Dyôdì adi wàmба ne: “Edi ki Dyôdì. Mêmè ngwâkaDìlaya. N’Dyôdì edi,” uleeja Dyôdì adi bitoóke tòò ne mwàDì mwônsò. Mònà’s, s’bàdi ne cyà kuDìmònà. Nwamònù anyì? Mmunyì mùdì Kilistò mufwànyîne kuvila Dîyì Dyèndè Yéyè mwine? Ne pìikalàbi ne Kilistò ûdi munda mwèbè, Aci kacyèna mwà kuvilaku Dîyì Dyèndè Yéyè mwine to.

⁹³ Dìbà adi tudi tubwela mu Mubidi ewu bishi? Kolintò wa Kumpàla 12: “Ku Nyumà umwe tudi bônsò babàtijìibwe mu Mubidi ewu, ku dibatiiza dìmwè dyà Nyumà Mwîmpè.” Aci, wêwè muswè kucifunda, n’Kolintò wa Kumpàla 12.13. “Ne ku Nyumà umwe nkutùdì bônsò babàtijìibwe.” Ne Nyumà m’Mwoyi wà Kilistò. Ncyà bushùwà anyì? Mwoyi wà Kilistò! Ne mwoyi wà dimiinu kanà dyônsò edi...Bu mùdìbí ne, Yéyè ùvwa Dimiinu-Dîyì, ûdi ûfikisha Dimiinu ku Mwoyi. Nwacyúmvù anyì? Pìikalàbi ne—pìikalàbi ne Mwoyi awu udi ùsanganyiibwa mu Dimiinu, ne dibatiiza dyà Nyumà Mwîmpè edi dilwa pa Dyôdì, s’didi ne cyà kutwàla Mwoyi-Dimiinu awu.

⁹⁴ Ànu mûmvwà munwâmbile, mu Phoenix emu, ànu àbìdì àdì pansiì aa. Mvwa nyikilangana ne Mwanèètù John Sharrit. Mvwa nsanganyiibwa kuntwaku, kundeejaye mucì kampànda, mucì wà didimà. Yéyè—yéyè mmukùne mici yà madimà yàbûngì. Ki kundeejaye mucì ùmwépelè, ùvwa wôwô mukwàme bimuma byà mìshindù mwandamukùlù anyì citèèmà mìshìllàngàne. Ki mêmè kwamba ne: “Mwanèètù Sharrit, awu mucì ngwa mùshindù kaayi?”

Yéyè ne: “Mucì wà orange.”

Mêmè ne: “Bwà cinyì mùdiku bimuma byà mpusu, ne tundeleenyi, ne byà orange wa mutwile mbidi, ne byà mbòmà?”

Yéyè ne: “Byônsò abi mmadimà. Mmasomeka.”

“Kaa,” mûngààkambà, “ngümvù. Mpindyewu, cidimu cilwalwà, s’newùkwamè wônsò ànu oranges bwal-...”

⁹⁵ “Kaa, to. Muci ne mucì newùkwamè bimuma byàwù sungsunga. Ditàmbà ne ditàmbà nedìkwamè bimuma byàdì sungsunga.”

⁹⁶ Bâàbûngì bèènù bâtù bàkwàmishà bimuma mbamanyè aci, muneemu mu cibandabanda cyà mici yà madimà emu. Nedìkwamè bimuma byàdì sungsunga. Paùdi usomeka ditàmbà dyà mucì wà bimuma byà mpùsù ku mucì wà orange, nedìkwamè bimuma byà mpùsù, bwalu nngiikadilu wa didimà. Kàdi, kadyàkukwama cimuma cyà ku cibangidilu aci to.

Nènku ki citùdì twêtù benze ncyôcì aci. Tudi basomekemu, babwejemu twitàbabàayi, ne bikwàbò, ne babìsomèkè mu cyónsò ne cyónsò, apa. Mmunyì mùdì ba-Méthodistes mwà kukwàma cîngà cintu cîdì kaciyì mwânanà wa ci-Méthodiste? Mmunyì mùdì dîngumba kanà dyónsò edi mwà kukwàma cîngà cintu cîdì kaciyì mwânanà wa cyena màngumba?

⁹⁷ Kàdi mucì awu wôwò ànu mudìdìngé mupàtule ditàmbà dyà ku muji, adi nedìkwamè bimuma byà orange.

Ne pashìshe bu Nzambì mwà kwenzaku nî ncinyì nî ncinyì mu Èkèleeyiyà, aci necìkale cyà ku muji, pàmwè ne Dîyì cyàkàbìdì. Mmwômò menemene. Bikèngela biikkalè nànku, bwalu Mwoyi ùdi mu Muci awu, ne Wôwò ùdi ùkwàma mamuma à mùshindù wà Wù sungsunga.

⁹⁸ Mpindyewu, patùdì tujandula, mpindyewu, kùdi èkèleeyiyà munène awu udi mutantémùke, mundà mwà bikondo, ùkwàma mamuma èndè. Kàdi pàdì matàmbà alekela kukwàma mamuma, bâdi bâasònza. Mu Ýone Munsantu 15, kabààkasònzhakù Muci wà mvinyò awu to. Yéyè wàkasònza matàmbà, kuàkòsa, bwalu kaàvwa àkwàma mamuma to. Nènku—nènku twêtù . . .

⁹⁹ Yesù mmuswè mamuma, Bwèndè Yéyè mwine. Mukaj’Èndè udi ne cyà kulela bânà bâà mùshindù ùdi Ye Yéyè awu.

Nènku, yéyè kàyì ùlela bânà to, bânà-Mukajì-musèla, bânà-Dîyì, dîbà adi mmwânà wa cyena màngumba. Nènku, dinanga dyendè dyà kumpàla, dyà maalu à pa buloba ne dîngumba adi, ki kukaadiye mwalükile. Nènku kêna mwà kulela mwena Kilistò mulelèlè, mushùwashùwàlè, mulediùbwé cyàkàbìdì to, bwalu kakwèna cintu nànsha cìmwè mwaba awu bwà kuMulela to.

¹⁰⁰ Bidi ànu bu mûdì mwà kwangata ditàmbà dyà mucì wà bimuma byà mpùsù ne kudìpayika muntwamu, nedìkwamè cimuma cyà mpùsù, kàdi kadìyì mwà kukwàma orange to, bwalu kavwamù ku cibangidilu to. Kàdi bu ne divwa didyànjila kuteeka kacya ku cibangidilu, didyànjila kumanya kùdi Nzambì, didyànjila kulongolola ne dilediùbwé, dìdi ne cyà kukwàma orange. Kadyèna mwa kukwàma cîngà cintu to.

¹⁰¹ Ki mùshindù ùdibi ne Èkèleeyiyà wa Nzambì udi ne mwoyi, pàdì dîbà dìlwa. Muntu yônsò . . . Nzambì àdidìngè ànu àbangè kwenza cintu kampànda, muntu ne muntu ùdi wàngata

ndundu ùumba uya. Nwamònù anyì? Bìtu misangu yônsò ànu mùshindù awu.

Mvwa mbala mu maalu-malonda, pa bìdì bìtàngila Martin Luther, ànu àbidi àdì pansi aa. Mbâmbé ne: “Kùdì... Kabìvvwa bikolè menemene bwà kwitabuuja ne Martin Luther ùvwà mwà kutontolola èkèleeyiyà wa Kàtòlikè ne kubenga kunyooikiibwa bwà bwalu abu to. Kàdi,” mbâmbé ne, “cintu cyà pabwàcì, cìvvwa mmwàkapetaye mùshindù wa kushàala kacya wàmbulula mutù kumutù kwà dikolesha dyônsò dyà maalu dyákalandà ditabuluja dyèndè adi, kàdi kushàala ànu kacya wimanyina kamungulu pa dibingishiibwa dyèndè adi.” Nwamònù anyì? Ànu bintu byônsò, ditentula ne byônsò, byàkamulonda.

¹⁰² Tàngilààyì Mandamu Semple McPherson, Aimee Semple McPherson, uvwa ne ntèmpelu ewu kaaba aka awu. Inábànzà muyiishi yônsò ùkaavwa ne mapwâpwà awu, ne ùvwa wambula Bible mùshindù ùmwèùmwè awu, ànu—ànu ditentula dyà mu musunya’s!

Kabèèna mwà kwikala bàà ku muji to. Mùshindù awu ki udi maékèleeyiyà kâyi mwà kwikalaku to. Èkèleeyiyà umwe àdídìngè ànu àpete cintu kampànda mu cimenga, èkèleeyiyà mukwàbò kêna mwà kucìtwàlaku to. Bàdi bàcipeta ànu pààbò. Nwamònù anyì? Kabàcyena bàà ku muji kàbìdì to.

Dìyì dyà Nzambì ndyà ku muji. N’Dìyì, ne Dìdi ne cyà kulelangana bilondeshile mùshindù wàDì; mùshindù wàDì mu muvù wàDì, disungula, didyànjila kulongolola kùdì Taatù, Nzambì.

¹⁰³ Mpindyewu tudi tubwela mu Èkèleeyiyà ewu mùshindù kaayi? “Ku Nyumà umwe tudi bônsò babàtijìlbwe mu Mubidi ùmwè, Mubidi wà Kilistò,” ùdì mwikale Mukàjì-musèla, Dìyì. “Babàtijìlbwemu ku Nyumà Mwîmpè.”

¹⁰⁴ Mpindyewu tùmonààyibì ní tudi mu cikondo cyà ndekeelu, anyì kí mmutùdì. Mpindyewu tudi tusangana, twêtù babuulule mu Genèsè, lwà ku, kaa, lwà ku nshapità mwi5, nudi kàbìdì mwà kubuulula mu Luuka ne kujandula ne, Henoka ùvwa wa mwandamutekète kuumukila ku Noa. Henoka.

Bìdi bìleeja dimiinu dyà nyòka’s. Bwalu, piìkalàbi ne Kaayina ùvwa mwânà wa Abèlè, pa nànku’s yéyé nguvwa wa mwandamukùlù. Nwamònù anyì? Kàdi mwaba nànsha ùmwè mu Bible kabàtukù bâmbé ne Kaayina ùvwa mwânà wa Abèlè... anyì ne Kaayina—anyì ne Kaayina ùvwa mwânà wa Adàmà to. Bwalu, aci, Bible mmwâmbé ne: “Yéyé ùvwa wa mubì awu.” Kàdi Adàmà pèndè kí nyéyè uvwa mubì awu to. Nwamònù anyì? “Yéyé ùvwa wa mubì awu.”

¹⁰⁵ Mpindyewu tudi tusangana kaaba aka ne Henoka ùvwa wa mwandamutekète kuumukila ku Noà, cìvvwa ciikale cimfwànyì cyà bikondo byà èkèleeyiyà. Mpindyewu, bantu bakwàbò bàsambòmbò abu, kumpàla kwèndè yéyé, bàkafwà, kàdi Henoka

yéyè wàkatentemunyiibwa. Henoka yéyè wàkambwibwa, wa mwandamutekète awu, bileeja ne cikondo cyà mwandamutekète cyà èkèleезија aci ki cìdì cyàngaciibwa mu Dyambwibwa. Mpindyewu, kakwèna mpatà nànsha ya kânà to, twêtù mbàdi mu cikondo cyà mwandamutekète cyà èkèleезија. Twêtù bônsò kaayi tudi bacimanyè.

¹⁰⁶ Mpindyewu, cikondo cyà mwandamutekète cyà èkèleезија ncidi cyàngaciibwa mu Dyambwibwa. Bàà mu bìsambòmbò bikwàbò byônsò abi bààkafwà. Kàdi Henoka yéyè wàkatentemunyiibwa, bwalu: “Yéyè kabààkamusangana to. Nzambì wàkamwangata.” Kàdi Henoka, mwambwibwe, cìvwa cimfwànyì cyà bakwàbò bônsò bàvwà benda bafwà abu. Kàdi Mukaji-musèla wa ci—cikondo cyà nshììkidilu neàbììkidiibwe pambèlu pàà... Dyambwibwa, kakuyì lufù to, nebàbììkidiibwe pambèlu pàà cikondo cyà mwandamutekète cyà èkèleезија, cyôci cikondo citùdì twêtù tufidila bujaadiki aci. Kaa, ekèlekèle! Twánjàayi kuumbula mpindyewu, mu ndondo menemene. Nwamònou anyì?

¹⁰⁷ Mpindyewu, mwaba ewu, kàbidi, cimfwànyì cyà bikondo mwandamutekète byà èkèleезија, bìdi ne, mu Bwàkabuulwibwà 10.7, bìvwa bìkèngela bwà bwalu busokoka bunène bwà Mukàndà bùvùnguludiibwè kùdì Mukenji wa mwanjèlò wa mwandamutekète.

¹⁰⁸ Mpindyewu, kùdì Mùsànjeejà muulu, misangu yônsò, ne mùsànjeejà pa buloba. Mwaku ewu *mwanjèlò* wa mu Anglais ùdi ûswa kwamba ne “mùsànjeejà.” Nènku mu Mukenji wà mwanjèlò wa mwandamutekète, pàvvàye munkaci mwà kwenza ditangalaja dyèndè adi apu, mudimu wèndè wà bwambi, “dibà adi pààkabangaye kwela mpungi wa mudimu wèndè wà bwambi,” kí mpàcivvaye ùbangilakù to.

Yesù, pàcìvvà Ye ùbangilakù, Wàkabanga ne dyondopa dyà babèèdì ne beena ntàtu. “Kaa, Laabì munène wàwa! Yéyè's m'Mupròfetà.” Muntu ne muntu ùvwa ùMujinga mu èkèleезија wendè.

Kàdi pààkasòmba Ye pansi dìngà ditùkù, kwambaye ne: “Mémè ne Taatù Wanyì tudi Umwe,” aci kàdi kushììlanganaci’s. Aci kàdi kushììlanganaci’s. “Ne nwènù kanuyì badyè munyìinyì wà Mwâñà wa muntu, ne kanuyì banwè Mashi Èndè to, kanwèna ne Mwoyi munda mwènù to.”

“Mòna’s, Yéyè's mmukishi munù wa mashi à bantu!” Nwamònou anyì? Nwamònou anyi? Aci kàdi kushììlanganaci’s.

Yéyè kààkacyùmvwijkù to. Bôbò’s bàkaavwa bamane kumòna dimwèneshiibwa, dishindika dyà Dîyì dyà Nzambì bwà cikondo Cyèndè, divwjìibwe dilelèlà ne dibàjaadìkile ne Yéyè ki uvwa Mùsànjeejà awu wa cikondo aci. Nènku kabivwa bìkèngela bwà Yéyè kuumvwija kantu nànsha kàmwè to.

¹⁰⁹ Bayidi abu bàvwa bafwànyìne kwikala kabàyì bakùmbàne mwà kuCyùmvwija to. Kàdi bôbò bààkaCììtabuuja, nànsha bôbò bafwànyìne anyì kabàyì bafwànyìne kuCyùmvwija to. Bààkashààla ànu bapùwe kàdi baCítàbùùje. Mmunyì mùvvwàbo mwà kwamba ne nebàdye munyiinyi Wèndè ne kunwà Mashì Èndè? Mònà's, kabivwakù mwà kwenzeka bwà kucyènzabò to. Kàdi bààkaCììtabuuja, bwalu bàkaavwa balongolola. Yesù wàkamba ne Yéyè "wàkabàsungula kumpàla kwà difùkà dyà dyulu ne buloba." Nwamònú anyi? BààkaCììtabuuja. Nànsha byôbì ne bàvwa mwà kuCyùmvwija, anyì to, bàvwa batùngùnùke ànu ne kuCììtabuuja.

¹¹⁰ Mpindyewu tàngilààyì, mpindyewu, mu cikondo cyà mwandamutekète cyà èkèleeyiyà: "Pààbangà mwanjèlò wa mwandamutekète kwela mpungi, maalu masokoka à Nzambì àvwa ne cyà kumanyishiibwa ànu mwaba awu," Bítampì's.

Aci, balongolodi bàvvà...bu bôbò biikàle ne dîbà diine's. Luther kààkashààla ne mwoyi ntàntà bule bukùmbàne to, nànsha Wesley kààkashààla ntàntà mule to. Bikondo kabivwa bishààle ntàntà bule bukùmbàne to, balongolodi abu. Bàvwa ne mukenji wàbò wà ditùkù adi, ne bantu bàvwa bàwùbakula kàdi kuwuvwija dìngumba. Kàdi ncinyì aci?

¹¹¹ Kwêna mwà kupitaku bufùki bukolè to. Bufùki bùtu misangu yônsò ànu bùfila bujaadiki. Nzambì ùdi wènda mu ntùngùnukilu pàmwè ne bufùki. Ki cìdì ne cyà kwenzeka.

Bu mùdì dîbà. Dîbà dìdi dijuuka mu dîndà, mmwânanà mukesè muledìibwe. Dicìdi ditekète, kàdiyi ne muunya wa wòsha bikolè to. Pa dîbà dikumi jaajaaja, dikaadi dipàtuka mu cilongelu cibàndile. Pa dîbà mujaalamu, dikaadi dibwela mu maalu àdì àtàngila mwoyi. Pa dîbà isàtù jaajaaja wa mapingaja, dikaadi dyènda dikulakaja. Pa dîbà itaanu jaajaaja, dikaadi dipùnga ne lufù. Dikulakaji ne diikale cyàkàbidi ditekète, dyalukila ditangile ku lukita. Awu ki ndekeelu wadì anyi? Didi dijuuka cyàkàbidi, pàdibù bùcyà mu dîndà. Nwamònú anyi?

¹¹² Tànglìàayì micì, mùshindù ùdiyi yisampila, byônsò bìdìyi yenza abi. Mpindyewu tudi tusangana ne, mabeji adi apòòpoka ku muci, àpingana. Ncinyi? Mwoyi ngudi upweka kwinshì ku muji wà muci. Awu ki ndekeelu wawù anyi? Ùdi wàlukila cyàkàbidi mu muvù ùdì ûlondà wa bintu bítòloka awu, mwikalé ne mwoyi mupyamùpyà.

¹¹³ Mpindyewu tànglìàayì maèkèleeziyà, mùdìku kwenzeke cintu cìmwècimwè aci mu Dilongolola. Ncibànde. Lutete lwà blé alu lwàkamata mu buloba ne lwàkafwà, mu dikengesha dyà mu cikondo cyà mîdimà aci. Lwàkabwela mu buloba. Bìvwa bìkèngela kufwàlu. Muntu yônsò, wetù wa nyumà ewu, ùdi mwà kuumvwa aci. Cyà ne, dimiinu adi dyôdì kadìyi difwè ne dibole to, didi dishààla nkààyaadi. Nènku bìvwa bìkèngela kubweladi mu buloba, mu cikondo cyà mîdimà aci. Dyàkashààlamu, e

kuboladi. Ne kupàtukadi mu tubeji tukesè tùbìdì twà èkèleeziyà wa ba-Luthériens. Mu èkèleeziyà wa ba-Luthériens amu, dyôdì kupàtwilamu tubeji tukwàbò twàbûngì, Zwingli ne bakwàbò. Kuumukila ku aci dyôdì kubànda ne kubwela mu mwepu, ùvvà John Wesley, cikondo cinène cyà mudimu wà ba-missionnaires. Dyôdì kupona cyàkàbìdì. Mwômò amu kupàtukamu cikondo ciseeswishinganyi aci, cikondo cyà beena Mpenta aci. Lutete lwa blé alu, lùvvà . . .

¹¹⁴ Kùdiku muntu, kaaba aka, ukààdikù mudime blé anyì? Tàngila blé awu paùdì umutàngila apu. Paùdì upàtuka kwaka, udi wamba ne: “Ngààpecì blé.” Mbyenze ànu bu ne udi ne blé mwaba awu’s. Anji pandà munda ànu bîmpè bîmpè menemene kàdi ùtàngile. Kwêna ne blé mwine to nànsha kakesè. Cyûdì naaci’s ncizubu. Yesù kààkatudimwijaku, mu Maataàìyì 24.22 . . . ne inaayi anyì? “Mu matùkù à ndekeelu, ne, nyumà yibidì ayi neyilikale mifwànàngane menemene, mu mùshindù wà mifwànyine kuseeswisha too ne blé musungula mwine bu ne bìvwa mwà kwenzeka.” Nwamònou anyì? Mpindyewu tàngilààyaaku. Ncyambudi.

¹¹⁵ Mpindyewu, Mwoyi wàkapàtukà mu Luther ki wôwò awu wàkenzà Wesley. Mwoyi wàkapàtukà mu Wesley ki wôwò awu wàkenzà Mpenta. Mwoyi ùdì ùpàtuka mu Mpenta ngwôwò awu ùdì wenza blé. Kàdi byôbì abi’s mbiyambudi. Nwamònou anyì? Mwoyi mulelèlà ùdì ùpicilamu. Mukenji udi ùpicilamu, kàdi Wôwò ùdì wenda ùbànda ùkabwela mu blé. Ki bwà cinyì blé awu udi ùbànda ne ùkatwàla cintu cyônsò mu kaabujimà mu Dyambwibwa, lwà kuulu ku lusongo elku. Mukàjì-musèla, Yéyè mwine, ùdì ûfùmina mu cikondo ne cikondo cyônsò. Kàdi cikolakola cyà cyena màngumba aci cidi cifwà, cyùma ne cifwà. Nukaavwaku bamònè, mu matùkù à ndekeelu aa, mùkaadici cibange kudikoka cyumuka mpindyewu amu anyì? Pàkaadì blé awu ubanga kukola, díbà adi ci-cizubu cidi cìbanga kulamunuka ku Yéyè.

¹¹⁶ Pingaja ànu mêsù ùmonè mu kaablé kakesè aku paùdì ukàtangila apu. Ùkàbùlùle mùshindù ewu, nènku ùkàtangile munda mwàkù amu kàdi ùmonè. Udi ne kaalutònga kakesè kàà blé munda mwàmwa. Bikèngela wàngatè cyamu cyà tulondù tukenkeci cyà bukolè bùdi budyundisha misangu makumi àsàtù bwà kutangilamu, bwà kumònà kaalutònga kakesè kaa blé kàdi munda mwàmwa aku. Nwamònou anyì?

Kôkò aku kàdi mwàmwa menemene, kàdi Kàdi kabanga kukola. Mpindyewu, cizubu aci bìkengela ciìkale ànuku, bwà kuKákùba, bwà kuKápëësha mpùngà wa kupàtuka pambèlu. Kàdi pashiishe pâkaadiKu kabanga kukola ne Mukenji ùbangà kutangalaka, díbà adi cizubu cidi cìbanga kudikoka ne kushiyangana naaKu. Ne Mwoyi udi ùpatuka buludi mu cizubu aci, ubwela buludi mu blé. Udi utÙngunuka! Mùshindù awu ki ùdì cikondo ne cikondo cyônsò cyenze. Kacyènaku-kacyènaku

mwà kupita bufuki bukolè to. Cidi . . . Aci's ki ntùngunukilu wa Nzambì nyéyè awu, mùshindù ùdì Ye wenza bintu.

¹¹⁷ Nènku mpindyewu ki cikondo citùdì twêtù ne mwoyi mpindyewu mene ncyôcì aci, cikondo cyà mwandamutekète cyà èkèleeziyà. Mpindyewu, bìkèngela byônsò abi bìmwèneshiibwe mu lutete lwà blé ku ndekeelu, dyalukila dikwàbò. Mpindyewu, bu nwénù mwà kwangata Luuka nshapitâ wa 17 ku mvensà wa 30, Yéyè wàkamba ne: “Ànu mwàkadibi mu matùkù à Sodoma, ki mwíkàabi kàbìdì ku dilwa dyà Mwânà wa muntu, pààbanga Mwânà wa muntu kuDibuulula.” *Kubuulula* ncinyi? Kwenza dibuuludiibwa Dyèndè dyà cidiYe mu ditùkù edi. Kubuulula, kubuulwila bantu, Dîyî dìdî dimanyishùbwé bwà ditùkù adi. Kubuulula, kubuulwila bantu, ku dimwèneshiibwa dyà Nyumà Mwímpè mwikale wenza ne Yesù ikale ne mwoyi munkaci mwètù. Nènku, vùlukààyi ne, Yéyè ûvwa muleejìbwé kwàka mu muntu. Muntu's! Wàkamba ne: “Ànu mwàkadibi . . .” Mpindyewu, Yéyè ûvwa ûbala ànu Bible umwèumwè utùdì tubala ewu, Genèsè. Mpindyewu, tudi tumònà mu nshapitâ wa mu Genèsè awu, pàvwà Yesù wàkula bwà cyôcì aci apu.

¹¹⁸ Tudi tusangana mwaba awu, ne, mu cyôcì aci, mwikale ne nyimà Wendè mukoma ku ntentà awu, ne Sarah mu ntentà amu. Yéyè kwamba, Yéyè kwela lukonko. Byà bwalu mukàjì awu kàvvakù mwele meeji ne cìvwà ne cyà kwenzeka aci cìvwa cifwànyìne kwenzeka to. Yéyè kwamba ne: “Mpindyewu, Abraham, Nénkumwènèkèlè bilondèshile cikondo cyà mwoyi.” Nwamònù anyi? Kàdi Sarah, mu ntentà amu, kucisekaye. Yéyè kwamba ne: “Sarah mu ntentà, waseki bwà cinyi, wàmba ne: ‘Ebi bintu bìdi mwà kwenzeka munyi?’”

¹¹⁹ Yesù mmulaye. Ne Ùvwa n'Yéyè. Abraham wàkaMubìikila ne, “Elohim,” wa Bukolè bwônso. Ùvwa n'Yéyè. Mpindyewu, Bible ùdi ùdyanjila kwamba ne necyàlukile cyákàbìdì mu matùkù à ndekeelu. Yesù ngwâkamba nànku. “Ne panwàmònà bintu ebi bìbanga kwenzeka,” vùlukààyi ànu ne, pàkààdi eci cibanga kwenzeka mùshindù awu pa dìbà adi, ne, “nudi numanya ne cikondo cìkaadi pabwípì ku ciibi.”

¹²⁰ Tàngilààyi buloba bwôbò bwine. Tàngilààyi buloba, Sodoma, pììkalabi ne kùkaadiku Sodoma wètù ewu. Tàngilààyi mùdì bantu ne maalu makùdimika mu dikùdimikiibwa dyà kacya edi. Meeji abo mmakùdimika. Bôbò kî mbamanyeku cidi nsòmbelu wa kaneemu wètù ewu to. Tàngilààyi numònè bangondavi. . . [Katùpà kàà mukàbà wà mèyì munda mutupu—Muf.] . . . babàkyanganyi bàà balùme ne balùme ne bikwàbò byônsò.

Kàdi tàngilààyi bakàjì bëètù, ditomboka dìdici cyêenze. Tàngilààyi numònè ditomboka mu dipanga dyà nsòmbelu wa kaneemu, nsòmbelu wa masandi munkaci mwà bakàjì bëètù. Ne kî ng'ànú bëètù . . .

Nudi nwamba ne: "Abu's mba-Méthodistes." S'nné beena Mpenta, kàbìdì. S'ncintu cyônsò mu kaabujimà's.

¹²¹ Tàngilààyi balùme bëètù. Bôbò, pamutù pàà kwela nzadi mu Díyì dyà Nzambì, mbakeele nzadi mu kaacilèlè kakesè kàà cyena màngumba. Mbashààle kacya bëèlamù nzadi, pamutù pàà kupàtuka pàdìbo bamòna Nzambì ùDimanyisha ànu menemene. Kabingila kàdi ne, mbampofo. Kabèènakù mwà kuCimònà to. KabaàdyékuCimónakù to.

Mpindyewu tàngilààyaaku nùmonè cìdì cyènzekà mu cyôci eci, patùkaadi tulwijakaja apa.

Ngéela meeji ne inábànzà wàwa ukaadi ukeba bwà twétù kuumuka. Ngámònu uléeja ne cyanza, cintu kampànda bwà ne mmuswe bwà twétù kupatuka, pa nànkù bìdi bikengela bwà twétù kulwijakaja.

¹²² Pa nànkù mpindyewu mónaayi Henoka, cimfwànyì cyà Èkèleeziyà. S'ki yéyé ewu muleejìibwe kàbìdì mu cimfwànyì mu cikondo cyà mwandamutekète cyà èkèleeziyà. Nudiku mwà kukwelela meeji anyì? Cikondo cyà mwandamutekète cyà èkèleeziyà! Mònaayi. "Ku mwadi wà mpungi wà . . ."

¹²³ Mbanganyì bàdì biitabuuja ne nkulwè baamisànjeelà mwandamutekète bwà èkèleeziyà mwandamut- . . .? Kaa, tudi bônsò tuciìtabuuja, patwikalà twitabuuja Bible. Patwikalà katuyì twitabuuja Bible, mu bushuwà bwa bwalu, nwamònu's, katwèna tuciìtabuuja to. Kàdi, mbalwé.

¹²⁴ Mpindyewu tudi ne mwoyi mu cikondo cyà mwandamutekète cyà èkèleeziyà. Ne pàdì Bible mwambe nànkù apu, cikondo cyà mwandamutekète cyà èkèleeziyà eci ne: "Pààbanga mùsànjeelà wa cikondo cyà mwandamutekète cyà èkèleeziyà kwela mpungi wa Mukenji wèndè, maalu masokoka à bintu byônsò bìvvwàbò bakónyàngajekónyàngaje, munda mwà cikondo, neàbuuludiibwe pa diine dìbà adi." S'ki twétù bàdì bacimona aba, Mwânà wa mutu ûlwa munkaci mwà bantu Bèndè ne wènà ànu menemene, ûshindika Mukenji Wèndè bu mùvvwàYe mwambe ne Neénzé. S'ki twétù bàdì bàcísangana aba, mu cikondo cyà ndekeelu eci.

¹²⁵ Mpindyewu, ne bilù mwandamutekète, bu mùdì bilù mwandamutekète, bìvvwà kampànda mulwè abi, Kààkalwa mu cilù cyà kumpàla, ciibidì, ciisâtù, ciinâyì to, kàdi wàkalwa mu cilù cyà mwandamutekète. Ùvwa ng'Henoka, wa mwandamutekète awu, wâkatentemunyibwa. Nènku Noà, mwikale cimfwànyì cyà bàshààdilè bàà beena Yuda, byàkakèngela bwà bàmwambùlè bàmwelè dyàmwàmwa. Mpindyewu, mu bikondo byà Bible, twàkule bwà bilù. Ne bufùku kabùvwa bukòsolola mu mèbà to, mu cikondo cyà Bible.

¹²⁶ Mpindyewu tèèlejààyi ne ntémà. Bwalu, nêndwijakajè mpindyewu, bwalu bàkaadi dijinga ne cibambalu eci. To. Bible kàvwa mukòsolola, anyì—anyì . . .

¹²⁷ Bufuku kabuvwa bukòsolola mu mèbà to, mu cikondo cyà Bible. Buvwa bukòsolola mu bilù. Kuvwa bilù bisàtù. Mpindyewu, cilù cyà kumpàla cìvwa cìbangila pa dìbà citèèmà too ne pa dìbà dikumi ne ibidi. Cilù ciibidi cìvwa cìbangila pa dìbà dikumi ne ibidi too ne pa dìbà isàtù. Ne cilù ciisàtù cyà bufuku cìvwa cìbadiibwa kubangila pa dìbà isàtù too ne pa dìbà isambòmbò. Mpindyewu tudi ne isàtù, isàtù isàtù, yìdi yènza citèèmà, nomba udi kàyi mupwàngàne to. Dìbà adi tudi twalukila ku mwandamutekète bwà Dyambwibwa, dììkalà mwà kwenzeka, ngeela meeji, pankaci pàà dìbà isambòmbò ne dìbà mwandamutekète jaajaaja...anyì pàà dìbà isambòmbò ne dìbà citèèmà jaajaaja, dìndà kampànda. “Bwalu mpungi wa Mukalenge neàdilè.”

Mu dìndà adi dyà dibàlakana ne kadiyì mavuba dyàbìikà bafwè mu Kilistò,
 Biikale bààbanyangana butùmbì bwà dibìikà Dyèndè dyà ku lufù;
 Pààdisangishà basùngìdìibwè Bèndè mu bisòmbedi byàbò byà dyàmwamwa dyà dyulu abi,
 Pààbìikilàbo dyàmwamwa muulu,
 nêngììkalèku.

¹²⁸ Mwâku *dyambwibwa*, mu Bible, kî mmutèèdìbwemu mene to nànsha kakesè. Twêtù mbadi beeemu mwaku awu cyanàànà. Bible udi wàmaba ne, “bangaciìbwe muulu; biikale bangaciìbwe muulu.” Tudi tubala mwaba ewu mu Tesàlònìkà Mwibidi... Anyì, Tesàlònìkà wa Kumpàla, cìdi ndilondangana dyà Dyambwibwa dinène edi dììkalà mwà kwenzeka mu matùkù à ndekeelu. Tèelejààyi eci mwaba ewu. Netùbangile mwaba ewu ne mvensà wa 13:

...Ncyéna muswè bwà nwénù...nupange to, bânà bëètù, pa bìdì bitangila aba bàdì balààle tulù, bwà nwénù kanwìkadi mu cinyongopelu, bu mùdì bakwàbò bàdì kabàyì ne ditèkemena.

Bwalu patwìkalà twitabuuja ne... Kilistò wàkafwà ne wàkabìika cyàkàbìdì ku lufù, byà mwomùmwè kàbìdì aba...bàdì balààle tulù mu Yesù Nzambi neàlwè naabò pàmwè nendè.

Bwalu tudi tunwàmbila bwalu ebu ku dîyì dyà Mukalenge ne twêtù bàdì ne mwoyi ne bàdì bashààle too ne ku dilwa dyà Mukalenge katwàkupangisha... (Mwâku awu kupangisha ùdi ùswa kwamba ne “kucyàmakana.”)...aba bàdì balààle tulù to.

Bwalu Mukalenge yéyè mwine neàtuulukè...

Mpindyewu tèelejààyi ne ntèmà:

...Mukalenge yéyè mwine neàtùùluke mu maulu ne lubilà, kàbìdì ne dîyì dyà mwarkanjèlò, ne...mpungi

wa Nzambi: ne bafwè mu Kilstò nebàbiike ku lufù dyàmbedi: . . .

¹²⁹ Mpindyewu ndi muswè bwà numònè cintu cinènè cìdì munkaci mwà kwenzeka mwaba ewu mpindyewu. Eci kacìnùpicikù to. Nwamònù anyì? Mpindyewu mònaayi. Dìyì dìdi dyàmba mwaba ewu, mu Tesàlònìkà Mwibidì emu ne, kùdì bintu bisàtù. Mònaayi. Kuumukila ku mvensà wa 13 too ne ku wa 16, kùdì bintu bisàtù bìdì ne cyà kwenzeka kumpàla kwà Mukalenge Yéyè mwine kumwènekaye. Lukasalukasa mpindyewu, bwà twamònà mwà kwoya. Nwamònù anyì? Cintu cyà kumpàla cìdì cyènzekà . . . Mònaayi: lubilà, dìyì, mpungi. TuCibalààyi mpindyewu bwà kumònà ní ncyà bushùwa. Nwamònù anyì?

Bwalu Mukalenge yéyè mwine (mvensà wa 16) neàtùlule mu dyulu ne lubilà, kàbìdì ne dìyì dyà mwarkanjèlò, ne . . . mpungi wa Nzambi: . . .

¹³⁰ Bintu bisàtù mbidì byènzekà: Dìyì . . . Lubilà, dìyì, mpungi, bìkèngela byènzekè kumpàla kwà Yesù kumwènekaye. Mpindyewu, lubilà . . . Yesù ùdi wènza byônsò bisàtù abi pàdìYe—pàdìYe—pàdìYe—pàdìYe wènda ùtùluka apu.

Lubilà, lubilà alu ncinyì? M'Mukenji mwikale ùpàtuka, dyàmbedi, Dyâmpà dyà Mwoyi dìdì ne mwoyi diikale dìpàtula Mukàjì-musèla.

¹³¹ Mpindyewu, Nzambi ùtu ne mùshindù kampànda wà dyenza maalu. Ne Yéyè kàtu ùshintululaku ngenzèlù Wendè nànsha. Yéyè kàtu ùshintululakù Wendè ngenzèl—. . . Yéyè ùdi Nzambi utu kàyì ùshintuluka. Mu Amòsà 3.7, Yéyè mmwâmbe ne Yéyè kàvwa mwà kwenza cintu nànsha cìmwè pa buloba Yéyè kàyì mwanji kucibuwlila dyàmbedi basadidi Bèndè baprófetà nànsha. Ne ànu mùdìbi bulelèlè ne Yéyè wàkacìlaya amu, Yéyè neàcyenzè.

¹³² Mpindyewu, tudi bapícile mu bikondo byà èkèleeyìyà. Kàdi mbatùlayè mu matùkù à ndekeelu, bilondèshìle Maalàkì 4 ne, nekwikale cyàkàbìdì dyalukila, dyà mupròfeta kampànda mu ditunga. Aci's ncyà bushùwà. Mònaayi ngiikadilu wendè, cìkkalaye. Yéyè ùtu misangu yônsò . . .

Nzambi ùdi ùkwàta mudimu ne nyumà awu misangu yìtaanu: musangu kampànda mu Eliyà; mu Elìshà; mu Yone Mubàtiji; kubìikila kwà Èkèleeyìyà bwà kupàtuka; ne bwà bàshààdilè bàà beena Yuda. Misangu yìtaanu, "ngâsà," J-e-s-u-s [Yesù—Muk.], f-a-i-t-h [diitabuuja], ne cìdi nomba wa ngâsà. Nwamònù anyì? Èyo.

¹³³ Mpindyewu, nwavùlukaayi ne, Mukenji mmulayìbwè. Ne pàkaavwà maalu masokoka ônsò mamana kuswikakajangana pàtupu kùdì musùmbà wa balombodi bàà ntèndeleelu, nebikèngele mu—mupròfetà wa ûfùmina buludi kùdì Nzambi bwà kuCibuulula. Nènku aci's ki cyôcì menemene cyàkalayà Ye bwà kwenza. Nwamònù anyì?

¹³⁴ Mpindyewu, vùlukààyi ne: “Dîyì dyà Mukalenge dìtu dìlwa kùdì mupròfetà,” kí nkùdì mwena tèoloji to. Mupròfetà, yéyè mmuleeji wa Dîyì dyà Nzambì. Kêna mwà kwamba cintu nànsha cìmwè to; kêna mwà kwamba èndè meeji sungasunga to. Ùdi mwà kwamba ànu cìdì Nzambì ubuuulula. Nànsha mene mupròfetà Baalàmà pààkateeciibwaye bwà kusumbishiibwa, bwà kusumbishaye bukenji bwèndè, wàkamba ne: “Mmunyì mùdì mupròfetà mwà kwamba cintu kampànda cìdì Nzambì kàyì mutèèke mukana mwèndè?” Ncintu cìdì Nzambì wènza, mu mùshindù wa kùyì mwà kwambaku cìngà cintu nànsha cìmwè to. Ne wêwè udi mulediibwe mùshindù awu. Ànu mùdìbi ne kwêna . . .

¹³⁵ Bu wêwè mwà kwamba ne: “Ncyêna—nkyêna—nkyêna mwà kutabala to,” pèèbè munkaci mwà kutàngila. Nwamònou anyì? Kwêna mwà kucyènza to. Ne kwêna mwà kwolola cyanza to, pèèbè ne mùshindù wà kucyòlolà. Nwamònou anyì? Kwêna mwà kwikala mbwa paûdi muntu to. Nwamònou anyì? Udi mwenjiibwe ànu mùshindù awu.

Ne Nzambì pèndè’s ukaadi ànu mwenzenze, misangu yônsò, munda mwà bikondo, kupicila ku Yeshààyì, Yelèmiyà ne bônsò abu, Eliyà, mu bikondo bïkaadi bipite abi. Pàvwa cisùmbù cyà balombodi bàà ntèndeleelu cifwànyìne kubwejakajangana bintu byônsò, Yéyè ùvwa mwà kutuma mupròfetà, umujuula mwikale úfùmina ku mwaba kawùyì mumanyike to. Yéyè kàvwa wa mu maalu àbò àvwa enzeka awu to, kàdi ùvwa wamba Dîyì Dyèndè. Ubìikidiibwa bwà kuumuka mu cyalu, uya, mwikale ànu muntu mukàyàbale mwikale ne Bulelèlà bwà Nzambì. Kàbìdì kùtu misangu yônsò ànu mùshindù wà kumumanya. Yéyè wàkamba ne: “Kwôkò kwikale muntu kampànda munkaci mwènù udi wa nyumà anyì mupròfetà . . .”

¹³⁶ Mpindyewu, baprófetà. Kùdi cintu bu mùdì “dipà dyà ciprófetà” mu Èkèleeyìyà; kàdi mupròfetà yéyè mmudyànjila kulongolola ne mudyànjila kutèèka bwà díbà adi. Nwamònou anyì? Èyowa’s, mukalenge. Mpindyewu, ciprófetà cyôcì cipàtuke, bïkèngela bantu bàbìdì anyì bàsàtù bàsombè ne bâlumbulwishes bwà kumanya ne ncyà bushùwà anyì kí ncyà bushùwà, kumpàla kwà èkèleeyìyà kucyàkìdilaye.

¹³⁷ Kàdi muntu nànsha umwe kàvwa ùkasòmba kumpàla kwà mupròfetà to, bwalu kakùyì mpatà to yéyè ùvwa—yéyè ùvwa Dîyì dyà Nzambì. Yéyè ùvwa Dîyì adi mu ditùkù dyèndè. Nudi bamònou Nzambì údileeja mu cimfwànyì. Mpindyewu, Nzambì ùtu mulaye bwà kututumina cyàkàbìdì cyôcì aci mu matùkù à ndekeelu, bwà kupàtula Mukàjì-musèla mu cimvundu cyà bukwàntèndeleelu aci, mu mùshindù ùmwèpelè ùdici mwà kwenjiibwa awu.

¹³⁸ Kacyàdyàkwenjiibwaku to; èkèleeyìyà kêna mwà kwakidila Kilistò to. Twêtù, beena Mpenta aba, katwènakù mwà

kutùngùnuka ne Mukenji ewu mu ngiikadilu udi èkèleeziyà ùsanganyiibwa leelù ewu to. Mmunyì mutwàkumbajà cikondo cyà nshìkidilu mu ngiikadilu udibo leelù ewu, pàdibo muntu ne muntu ùlwishangana ne mwìnendè, ne bikwàbò byônsò, ne biine abi mu mùshindù wa ntèndeelu? Kaa, luse webè luse! S'ncimvundu's. Cikaadi cimane kubwela mu màngumba. Ne pa díbà kanà dyônsò... Ndi ndomba mulongi wa maalu-malonda ní nganyì ní nganyì bwà—bwà—bwà kwambaye ne kî mmwômò. Musangu wônsò ùvvà mukenji ùpàtuka pa buloba, ne pàvvwàbo bawuvwija bulongolodi, ùvwa ùfwìla ànu piine apu. Ne Mpenta mmwenze cintu cìmwècimwè cyàkenzàbo bônsò aci, Mpenta ùvwa mucpàtuke awu's.

¹³⁹ Nwêñù, beena Assemblées de Dieu aba, pààkapàtuka bankambwa bëènù balùme ne bakàjì mu malongolodi miine awu kale wàwa, mu Nsangilu munène wa kale wa Bantu bônsò awu, bààkeela mbila ne bààkatùmbisha Nzambì, ne bààkaakula balwishangana ne bintu abi. Kàdi nwêñù nukudimuka, “ànu mùdì mbwa wàlukila ku bilùshì byèndè, ne ngulube ku bitoci byèndè,” kàdi nwêñù kwenza ànu cintu cyôcì cìmwècimwè cyàkenzàbo bôbò aci. Nènku mpindyewu nukààdi batèndeeli bâà mu ùmwè, mu mùshindù wa nukààdi bakànge ne myoyi yènù yà luse. Bìkèngela kwikala ne karta kàà buumambàla kumpàla mene kwà kuswikakana neenù, bikolè be.

¹⁴⁰ Nwêñù, ba-Unitaires, Nzambì kunùpa mukenji wà mùshindù awu, kàdi pamutù pàà nwêñù kuya kumpàla, ne kushààla balame didipwekesha ne kuya kumpàla, kukèngelabì bwà nwêñù kutekesha mwonji kàdi kuvwija cisùmbù cyènù bulongolodi. Kàdi nukààdi penyì nwêñù bônsò? Mu bwâtù bùmwèbùmwè abu. Aci's mmwômò.

Kàdi Nyumà wà Nzambì, mutùngùnuke wènda uya. “Mêmè Mukalenge ngudi muCìkune. Mêmè ngwaCimyamina mâiyì, muunya ne bufùkù. Bwà muntu kàlù...” Yéyè ngwâkatèèka bwà bintu ebi kwenzekabi, ne Yéyè ûdi ne cyà kutùma Cyôcì eci.

¹⁴¹ Cintu cyà kumpàla cìdì cìlwa, pàdìYe ùbunga kutùùluka mu Dyulu, kùdi lubìlì. Ncinyì aci? M'Mukenji, bwà kusangisha bantu pàmwè. Mukenji ûdi upàtuka, dyàmbedi. Mpindyewu, cikondo cyà kulongolola kwà myêndù: “Juukaayi nulongolole myêndù yènù.” Cìwwa ncilù kaayi aci? Cyà mwandamutekète, kî ncisiisambòmbò to. Cyà mwandamutekète ne: “Mònayi, Mubaki nyawù ùlwa. Juukaayi nulongolole myêndù yènù.” Ki kujuukabò. Bàmwè bâà kùdibo kusanganabo ne kabàvwa nànsha ne Maanyì mu myêndù yàbò to. Nwamònu anyì? Kàdi's ncikondo cyà kulongolola kwà myêndù.

Ncikondo cyà Maalàkì 4. CìwwàYe mulay-... N'Lüuka 17. Cìdi—cìdi n'Yeshà-... Bipròfetà byônsò abi bìdìCi mwa kuteeka ànu menemene mu dilondangana bwà ditùkù edi, mu Mifùndu abi, tudi tubìmòna ne mwoyi ànu mwaba awu. Kakwènakù...

¹⁴² Môna mùdì bintu ebi byènzekwa, wêwè mwanèètù wa balùme munanga, wêwè mwanèètù wa bakajì munanga. Pàdìbi ne, Nzambì mu Dyulu mmumanye ne ndi mufwànyîne kufwila pa cibùmbà cyà ku cyambilu eci ànu patùdi twakulangana apa. S'bivwa bikèngela wêwè—wêwè kwanji kwendakanaku eku ne eku katancì. Cìdi ànu... Mbilenga byà dikèma, panùdì numònà Nzambì ûfùma mu Dyulu, wìmana kumpàla kwà bisùmbù byà bantu, ne wìmana mwaba awu, ùdileeja Yéyè mwine ànu mùkààdiYe mwenzènzhè. Ne aci's m'Bulelèlè, ne Bible ewu mubuulula. Nwamònu anyì? Cyà bushùwà. Tukààdipù.

¹⁴³ Ne ndongolwelu wa cyena màngumba mmufwè. Bwèndè bukaadi butùuke kujikè. Kààdyàkujuukaku cyàkàbìdì to. Newòshiibwè. Aci's ki cinùtù nwenza ne bizubu mu budimi. Munyeemaayi. Bwelààyì mu Kilistò. Kanwàmbi ne: "Ndi wa mu ba-Méthodistes. Ndi wa mu ba-Baptistes. Ndi wa mu beena Mpenta to". Bwelààyì mu Kilistò.

Pawìkala munda mwà Kilistò, kakwènakù Dîyì difùnda Mwômò emu Dyûdì kùyì witabuuja to. Cìdì nî nganyì nî nganyì mukwàbò mwambe nànsha ciikale cinyì. Ne pashiìshe Nzambì ùdi ùmwènesha cintu aci. Bwalu, wêwè, pàdìYe ùpongolola Nyumà pa Dîyì, cìdì cyènzekà ncinyì? Bìdi ànu bu kwela kwà mâyì pa dimiuñu dikwàbò kanà dyônsò edi. Nedìikale ne mwoyi, ne Dyôdì nediuvlangane bilondeshile mùshindù wàDì.

¹⁴⁴ Wêwè udi wamba ne: "Ndi mupete dibatiiza, Nyumà Mwîmpè." Aci kacyèna ciswa kwamba ne udi musÙngidìibwe nànsha, nànsha kakesè.

¹⁴⁵ Tàngilà kuneeku. Wêwè udi muntu pàsàtù. Ki cyûdì. Munda mwà mwânà mukesè udi apa *ewu* mùdi musùùkà, cìdi cilondà cidi nnyumà, ne cìdì cilondà cìdi mmubidi. Mpindyewu, wêwè udi ne byumvwilu bitaanu mu mubidi ewu, bwà kwikala kupetangana ne cisòmbelu cyèbè cyà pa buloba. Byôbì abi kabyèna bìpetangana ne bikwàbò byàcì to. Udi ne byumvwilu bitaanu byà nyumà, *apa*: dinanga ne kondo kàà mwoyi, ne bikwàbò, byà cyôcì aci. Kàdi munda *emu* ki mûdi wêwè musòmbèle. Ki cyûdì ncyôcì aci.

¹⁴⁶ Yesù kààkambaku ne: "Mvula ùtu ùlokela bîmpè ne babì anyì"? Tèéka mpoopu mwaba ewu, ne blé pààpa nàka, kàdi ubîmyamîne mâyì, ne ubìlame mu mwaba wa bufukè ne bintu byà mùshindù awu, byônsò bìbìdì abi kabyàkwikala ne mwoyi ku mâyì àmwèàmwè awu anyì? Bushùwà's. Èè, ncinyì aci? Cimwè cyà kùdibi necìkwamè mpoopu, bwalu ki cyônsò cìdiye yéyè. Mpoopu neélè byanza muulu ne neélè mbila mùshindù ànu ùmwèùmwè ne blé.

¹⁴⁷ Bible kêna wàmbaku ne: "Mu matùkù à ndekeelu, nekùlwé ba-Kilistò bàà mashimi anyì"? Kaciyyì "ba-Yesù bàà mashimi to," mpindyewu. "Ba-Kilistò bàà mashimi," beela maanyì, beela

maanyì bàà mashimi pa bìdi bítàngila Díyì; beela maanyì bàà cyena màngumba, kàdì kabàyì bàà Díyì to.

Bwalu, Díyì nedidifidile Dyôdì diine bujaadiki. Kadyèna ne dijinga dyà cintu cikwàbò nànsha cìmwè to. Nedidifidile Dyôdì diine bujaadiki.

“Nènku nekùlwe beela maanyì bàà mashimi.” Nudi ne mukàbà wànyì wà mèyì pa cyôcì aci. Ne adi dilaabiib- . . .

Kaa, bu wêwè mwà kubìikila umwe wa kùdibo, kwamba ne: “Kaa, wêwè, udi Yesù anyì?”

“Kaa, ncyà bushùwà ne ncyêna aci to.” Kî mbafwànyìne kutwàlakù aci to.

¹⁴⁸ Kàdì pàkaadibi bikafika ku ne “Kaa, butumbì’s wè! Mêmè ndi mupete dilaabiibwa!” Diine adi’s ndilaabiibwa ànu dyètù dyà cyà bushùwà edi. Vùlukàayi ne, Kaayifa ùvwa naaDi, yéyè pèndè, ne wàkamba cipròfetà. Nànsha Baalama pèndè’s ùvwa naaDi, ne wàkamba cipròfetà.

Kàdì aci kacyèna ne dipetangana ne *eci*, cìdì munda eci to. Amba ànu aci ciikale dimiinu dyà Nzambì, mutoloku Wèndè kacya ku cibangidilu, mudyànjila kulongolola, bwà cyanàànà kwèbè nkujike. Nànsha wêwè mwelè mbila munyì, mwakule mu myakulu, munyeemàkane, mwelè mbila. Aci kacyèna ne dipetangana naaci to.

Mpoopo ùdi mwà kudibala ànu mùdì bikwàbò abi amu. Mêmè nkaadiku mumònè bampàngaanù bajuuka, beela mbila, ne bààkula mu myakulu, kàdì–kàdì bânwina mashi mu kabalubalu kàà mutù wà muntu, kàdì kusoka dyabùlù. Nwamònú anyì? Pa nànkü kwêna . . . Dyônsò dyà ku masaluka awu ne bikwàbò, ùbipwe mwoyi.

Cìdì ne bwalu mmwoyi wèbè wêwè mu Díyì adi, ne cyôcì aci ki Kilistò. Udibweje Dyôdì adi munda amu, kàdì ùmònè mùdìDi diDimanyisha, mùshindù ùdìDi dikanguka ànu mùdì dimiinu dikwàbò dyônsò edi amu, ne diDileeja bwà cikondo cìdìDi ne mwoyi.

¹⁴⁹ Luther kàvwa ne cìvwàye mwà kutwàla to pa kuumusha lutonga. Bakwàbò aba bàvwa mwà kutwàla bikwàbò bintu ebi. Tukaadi twêtù mu cikondo cyà blé mpindyewu.

Bìvwa bìkèngela bwà beena Luther bashùwashùwâle bàà Luther kutwàlabò Luther mushùwashùwâle. Bìvwa bìkèngela bwà mpenta mushùwashùwâle kutwàlayè mpenta mushùwashùwâle. Kwàjikì. Kàdì twêtù tukààdi bapìte aci cikondo, twenda tutùngunka.

¹⁵⁰ Nudi bamanye ne, èkèleezìyà wa Kàtòlikè, yéyè awu, wàkabanga ne cyena mpenta anyì? Nènku bu èkèleezìyà wa beena Mpenta mwà kushààla kacya wìmana munda mwà bidimu binunu bìbidi, mmufwànyìne kwikala mu mùshindù mubiìpe kupìta cìdì Kàtòlikè mpindyewu eci. Aci’s mmwômò. Bândi

ngàmbila ciine aci abu's nnwénù bâna bëètù bàà balùme, bâna bëètù bàà bakàjì, bândì munange. Ne Nzambì mmumanye cyôci aci. Kàdi vùlukààyi, nwénù balundà bàànyì, nebikèngele bwà nkawìlangane neenù ku Cilumbulwidi kwàka. Ne kwine aku kùdi mwà kwikalà kakùyì ntàntà mupìtepíté bule to. Bìkèngela bwà mfile bujaadiki bwà cìdi Bulelèlè.

¹⁵¹ Pângààkapàtukà kuya neenù bwà kwenza masangisha, ngènda nsambidila babéèdì, apu kaayi bìvwa bilenga. Kàdi, pândì ndwa ne Mukenji! Piìkala Mukenji kanà wônsò ùpàtuka, wôwù mMukenji mulelèlè . . .

Cyôci ciìkale bishimà bilelèlè, bishùwashùwâle byà Nzambì, kàdi kacya byàshààdila ànu mu bulongolodi abu, s'nudi numanya ne kî mbyà kùdi Nzambì, bwalu cintu aci ncimana kwamba patòòke.

Yesù wàkapàtuka ne wàkondopa babèèdì, bwà kukoka ntèmà yàbò, yà bantu, pashiìshe Mukenji Wèndè. Ncyà bushùwà.

Bìkèngela Wôwò awu wilakè ne cintu kampànda ciìkalà Nzambì mwà kubweja. Yéyè ùdi ànu . . . Dyondopa dyà kùdi Nzambì, bishimà Byèndè mùshindù awu, bìdi ànu bìkòka ntèmà yà bantu cyanàànà. Cyà mushinga cyàCì m'Mukenji. Ki mwaba ngwôwò awu, cìdi cifùminà munda *emu*. Yéyè ùdi ùteeta kulengeleela bantu, bwà kusòmbabò ne kuMutèèleja, nwanmònù's, bwalu kùdi bàmwè bàà munkaci mwàbò amu bàdi balongolwela Mwoyi.

Yimwè yà ku ntete, yà blé ayi, yàkamata pansi, nyuunyi yàkayìzòkola. Ne mikwàbò yàkamata munkaci mwà mêbà. Ne mikwàbò yoyì, yàkaya mu buloba bulongolola, buloba budyànjila kulongolola, ne yàkakwàma.

¹⁵² Mpindyewu, ki cintu cyà kumpàla ncyôci aci, mmwadi wà mpungi. Cintu cyà kumpàla mmpungi ne . . . anyì dìyì . . . Lubila; ne pashiìshe dìyì; ne pashiìshe mpungi.

Lubila: mùsànjeelà munkaci mwà kulongolola bantu.

Ciibidì ndiyì dyà dibiisha dyà ku lufù: dìyì dìmwèdìmwè adi, dìvwà, dìyì dikolè mu Yone Munsantu 11.38-44, dyàkabiìkilà Lazàrô bwà kupàtukaye mu lukità adi.

Kukungwija kwà Mukàjì-musèla; ne pashiìshe dibìsshà dyà bafwè, nwanmònù's; bwà kwangaciibwa Nendè muulu. Mpindyewu tàngilààyi bintu bisàtù bìdi byènzekà abi. Cìdi cilonđà ncinyì? Civwa mmpungi. Dìyì . . . Lubila; dìyì; mpungi.

¹⁵³ Mpindyewu, cintu ciisâtù, mmpungi, yéyè, misangu yônsò, ku Difesto dyà Mpungi, ngutu ubììkila bantu ku difesto. Nènku aci ki ciìkalà Didyà dyà dilòòlò dyà Mukàjì-musèla, Didyà dyà dilòòlò dyà Mwânà wa mùkòòkò ne Mukàjì-musèla, mu dyulu. Nwanmònù anyì?

¹⁵⁴ Cintu cyà kumpàla cìdi cipàtukà m'Mukenji Wèndè, ùbììkila Mukàjì-musèla bwà kudikùngwija. Cintu cìdi cilonđà

ndibììshiibwa dyà Mukàjì-musèla udi mulààle tulù; aba—aba bàdì bafwè, mu bikondo bikwàbò bìdì bishààle byàbya, badi babàkùngwija. Ne mpungi, Difesto mu maulu, mu dyulu. Mòna's, ki cintu cìdì cyènzechaka ncyôcì aci, balundà bàànyì.

¹⁵⁵ Ànu mwaba awu mene ngutùkaadiku, badìlongolole mpindyewu. Cintu cimwépelè, Èkèleeziyà udi upàtuka awu, bikèngela ashààle mutèèka kumpàla kwà Mwâna, bwà àbobe.

Katùmbà kanène kàà dinowa naakù nekàlwé, paanyimà pàà katancì. Blé newòshiibwè, bikolakola's, kàdi ntete yôyì neyikungwiibwe mu diyeebà dyàCi. Nwamònú anyì?

¹⁵⁶ Nwénù kanwena bampofo to. Nudi—nudi bantu bàà luumvu.

Kàdi bu ne mvwa mwimane mwaba ewu ngàmba bintu abi bwà kunùtàpa ku mwoyi? Ndi nCyàmba bwalu Cìdi Mwoyi, bwalu ndi mwambule bujitu bwà kùdì Nzambi bwà kuCyàmba. Nènku ndi ne cyà kuCyàmba. Ne Mukenji wànyì... Dìbà dyônsò mwikale mumanye, kale wàwa mu dyondopa ne bikwàbò byônsò mùshindù awu cìwva ànu bwà kukòka ntèmà yà bantu cyanàànà, mumanye ne Mukenji ùwwa ùlwa. Kàdi's ki Wôwò ewu. Ne Bìtampì Mwandamutekète abi byàkakànguka, maalu masokoka awu, ne kuleeja ne bantu abi ki bìdì byenzéke. Ncìvwa mucìmanyè to.

¹⁵⁷ Kàdi kùdi bantu biimane mwaba ewu mpindyewu mene, bàvvà biimane ànu pàmwè naanyì menemene. Dìbà adi, nwénù bônsò nuwwa bangumvwe pàmvwà muyiishe diyiisha adi dyà ne: *Bakalenge, Tudi Dìbà Kaayi?* Mu dìndà adi, ànu menemene mwaba ùvvàCi cyàmbe ne neCìkkale awu, ki Banjèlò mwandamutekète mbôbò abu biimane mwaba awu mene, bafùmine mu Dyulu. Ne pààkabàndàBo muulu apu, ne mvunda ùbànda naaBo muulu mwàmwa, twétù biimane, tutàngila mùvvwàBo bënda baya amu, beena maalu à mamanya kuCìkwàtabò fòtô, mu ditùnga dijimà amu, too ne mu Mexique.

¹⁵⁸ Ki mwaba awu, pàmvwà ntàngila apu, dìngà ditùkù, pangààkabangà kuyiisha *Bikondo Mwandamutekète Byà Èkèleeziyà* ebi, ki mêmè kubìlkila Jack Moore, mwena tèòlòji munène, mêmè kwamba ne: "Jack, ewu Muntu udi mwimane mwaba wàwa Nganyì? 'Pàdi Kampànda mufwànàngane ne Mwâna wa muntu mwimane mwaba awu, ne nsuki mitòòke bu myôsà yà mùkòòkò.'" Mémè ne: "'Ùwwa Nsongààlùme, mmunyì mùvvwàYe mufwànyìne kwikala ne nsuki mitòòke bu myôsà yà mùkòòkò?'"

¹⁵⁹ Yéyè ne: "Mwanèètù Branham, awu ùwwa mmubidi Wèndè mutùmbishìibwe." Aci kacyàkumvwika bu cyôcì to.

Kàdi pangààkabwelà mu cibambalu ne mêmè kubanga kusambilà, Yéyè kummanyisha cìvwàci. Nwamònú anyì?

¹⁶⁰ Nkaadi misangu yônsò muyiishèyìishe ne Yéyè ùwwa Nzambi, kàyì ànu muntu pàtupu to. Yéyè ùwwa Nzambi

mumwènèshìibwe mu mubidi: Nzambì, cyambiìbwà cyà Nzambì, cyà dinanga aci; byambiìbwà binène byàkatùùlukà, byàkaleejiibwà panu pa buloba, byà Nzambì abi. Yesù ùvwa ndinanga dyà Nzambì, dìvwà diibake mubidi ùvwa Yéhowàh Yéyè mwine musòmbèlemù awu. Yéyè ùvwa kaabujimà kàà Bunzambì mu ngiikadilu wa mubidi. Cìvwà Nzambì aci, Yéyè wàkacileejila mu mubidi awu. Bivwa bìkèngela bwà mubidi awu ùfwé, bwà Yéyè kumònà mwà kusukula Mukàjì-musèla ne Mashi Èndè—Èndè—Èndè.

¹⁶¹ Kàdi mònaayi ne, Mukàjì-musèla kêna ànu musukùdìibwe, mufwìdìibwe luse cyanàànà to, kàdi mMubingìshìibwe. Nwamònù anyì? Nukaadiku bateete kumònà mwâku ewu *mubingishìibwe*, bwà kumònà ne cìdìwu ûswa kwamba ncinyì anyì?

Mpindyewu, cileeji lu, bu Mwanèètù Green muumvwé bàmba ne mêmè mvwa munkaci mwà dinwà maala, munkaci mwà dyenza bintu bibì, pashìishe yéyè kulwa kusangana ne ncyéna mubyénzè to, kàdi kulfawaye, kwamba ne: “Ngààkufwìdi luse, Mwanèètù Branham.”

¹⁶² “Umfwila luse? Kacya ncìtu mucusézèku to. Alu luse lûdì umfwila ndwà bwalu kaayì?” Nwamònù anyì? Kàdi byôbì ne ndi mupiìle, dîbà adi’s ndi mwà kufwìdiibwa luse; kàdi ncyena ànu mwakàne to, bwalu’s nyàwù ndi mucusézè.

Kàdi mwâku ewu *mubingishìibwe* ùdi wùmvwija ne “byenze bu ne kùtu mucusézèku kacya to, nànsha kakesè.” Mubingishìibwe’s! Ne pa dîbà adi Mashi à Yesù Kilistò àdi àtukezula ku mpékaatù mu mûshindù wà ne, mmwedìibwe mu Mukàndà wa cipwàmwoyi cyà Nzambì. Yéyè ki Nkààyà udi mwà kucuséza.

¹⁶³ Twêtù katwèna mwà kucuséza to. Twêtù tudi mwà kufwà luse kàdi katuyì mwà kupwàku mwoyi to. Mêmè ndi mufwànyìne kukufwila luse, kàdi ndi ànu mvùluka misangu yônsò ne ùtu mwenze bintu bibì ebi. Pa dîbà adi, kwêna mwakàne to; udi mufwìdìibwe luse.

Kàdi, ku mêsù kwà Nzambì, Mukàjì-musèla mmubingìshìibwe. Katu mwanji kucusézakù to, kacyakacya. Amen. Mwimane mwaba awu, musedìibwe kùdi Mwânà wa Nzambì mulenga kàyì kadyuwu; kàyìku mwanji kwenza mpékaatù to, kacyakacya. Bwà cinyì? Yéyè ùvwa mudyànjila kulongolola. Ùvwa mubàkùdìibwemù pèndè nànku. Nènku mpindyewu paalu Yé kuumvwa Bulelèlà ne kupàtuka, ki Mashi ku Mukezelawù. Nènku Yéyè mmwimane mwaba awu, mulenga kàyì kadyuwu. Nwamònù anyì? Yéyè, kàyì ne mpékaatù pambidi Pèndè to, nànsha kakesè.

¹⁶⁴ Ki bwà cinyì, Mukenji ùdi ubììkila Mukàjì-musèla ku didikùngwija, nwamònù’s, lubila.

Nènku mpungí...

Umwèumwè awu, Yéyè, mwikale ne díyì dikolè, Wàkasàma ne kwela kwà lubila alu ne díyì, ne wàkabiìsha Lazàrò. Ne díyì dikolè Yéyè kwela lubila ne: “Lazàrò, pàtukà.” Nwamònù anyì? Nènku díyì dìdi dibiìsha—dibiìsha Mukàjì-musèla udi mulààle tulù awu, bafwè bàdì balààle tulù abu.

¹⁶⁵ Nènku mpungi, “mwikàle ne mwadi wà mpungi.” Nènku, pàdiye wènza nànkú apu, ùdi ùbììkila. Misangu yônsò, mpungi ûwwa ànu ùbììkila Izàlèèlè ku Difesto dyà Mpungi. Nwamònù anyì? Bu mùvwàbi ne, divwa n’Difesto dyà mpenta, Difesto dinène mu dyulu; ne Difesto dyà Mpungi. Nènku, mpindyewu, ncyà bushùwà ne mpungi ùtu ùmanyisha dibììkila dyà didikùngwija ne: “Lwâyi ku Difesto.” Nènku mpindyewu aci cìdi—cìdi Didyà dyà dilòòlò dyà Mwâna wa mùkòòkò mu dyulu.

Mpindyewu tàngilààyi: Didikùngwija; ne Mukàjì-musèla; Difesto dyà Mpungi; Didyà dyà Dibanjì. Tukààdi bacimòne mu bimfwànyì. Mpindyewu tàngilààyi ànu katancì kakesè cyanàànà kumpàla kwà twétù kwoya. Mônaayi. Tukààdi bacimòne mu bimfwànyì.

¹⁶⁶ Mpindyewu, nwêñù baswè kubala mu Maatààyì 18.16, mMwambe ne: “Kùdi bàsàtù bàdì bàfila bujaadiki,” nwamònù’s, mu Munsantu...mu Yone wa Kumpàla 5.7, ne bikwabo. Ìsàtù ùtu misangu yônsò ànu bujaadiki. Ncyà bushùwà anyì? Ndishindika, cintu kampànda cìdi cijaalame. Bantèmù bàsàtù bàdì bujaadiki. “Mukana mwà bantèmù bàbidì anyì bàsàtù, díyì dyônsò dijaadikiibwe.”

¹⁶⁷ Mpindyewu mònaayi. Tudi bapete bantèmù bàsàtù. Ìsàtù yìtu ntèmù. Mpindyewu, tukààvwa bamane kupeta dyambwibwa misangu yìsàtù mu Dipungila Dikulukulu. Nuvwa bamanyè aci anyì? Bu ntèmù. Mpindyewu tàngilààyi. Henoka ûwwa umwe; Eliyà ûwwa mukwàbò; ne Yesù ûvvwa mukwàbò.

Yesù, mwikale Dibwe dyà ntwangeenu, mpindyewu, Yéyè mmufile bujaadiki. Nwamònù anyì? Yéyè ûvvwa Dibwe dyà ntwangeenu pankaci pàà Dipungila Dikulukulu ne Dipyadípyà, bwalu bivwa bikèngela bwà Yéyè kwanji kufwà dyàmbedi kàdi pashiìshe kwambwibwa. Yéyè wàkafwà; kwalukila ku mwoyi ne kwendakana neetù pànwàpa; ne pashiìshe kwambwibwa. Bwalu, Yéyè uûvvwa Dibwe dyà ntwangeenu divwà diswikàkaje bibidì abi pàmwè. Paanyimà pàà dibììkà ne dyambwibwa Dyèndè...Tàngilààyi. Paanyimà pàà Yéyè mumane kwenza cyòci aci, ne mujaadike cyòci aci, Dipungila Dikulukulu adi. Tudi bamanye twétù bônsò ne Henoka wàkatentemunyibwa. Tudi bamanye ne Eliyà wàkangaciibwa muulu kùdì mvùnda, ncyà bushùwà, mu dikalu dyà Kapyà. Ne Yesù wàkafwà, wàkajijiibwa, wàkabiìka ku lufù ne wàkiikala ne mwoyi pa buloba apa, ne pashiìshe wàkambwibwa, Dibwe dyà

ntwàngeneen adi. Mbôbò abu bâsâtù, bwà kufila bujaadiki. Ncyà bushuwà anyì?

¹⁶⁸ Mpindyewu, kùdi dyambwibwa dìmwèpelè dìkaadì dipìte. Nudi bamanye aci anyì? Aci, twánjì tûmonààyibi ne katwena mwà kucibalaku, lukasalukasa. Twàngataàyì Maatààyì, nshapitâ wa 27. Nènku twàngacilààyì lwà ku mvensà wa 45 wa Maatààyì, nshapitâ wa 27. Twänjì tûmonààyibi ne katwenaku mwà kupeta aci lukasalukasa, ne kumònà ni-ní katwènakù mwà kupàtula ànu ndambù cyanàànà mu cyôcì eci, mufwànyìne kutukwâcishaku, lukasalukasa. 27.45, ngeela meeji, wündì mufunde kaaba aka. Tùbalààyaaku.

Mpindyewu kubangila pa dîbà diisambòmbò kwakalwa mîdimà mu ditunga dijimà too ne pa dîbà dyà citeèmà . . .

Nènku lwà pa dîbà dyà citeèmà Yesù wàkeela lubilà lwà dîyì dikolè, wàmبا ne: Eli, Eli, lama sabach- . . .? mbwena kwamba ne: . . . Nzambi wanyì, wândekèdì bwà cinyì?

Bàmwè bâà ku bâvwa biimane mwaba awu abu, . . . pààkuumvwâbo aci, ke kwambabò ne: Muntu ewu ùdi ùbìikila . . . Elìyà.

Nènku dyàkàmwè umwe wa kùdibo wàkaya lubilu, ne wâkangata musukulampampa, ne wâkawuuja ne mvinyyò wa bwanji, ne wâkawàsa ku dilengà, ne wâkamupèeshayè bwà kunwàye.

Bakwâbò abu bâàkamba ne: . . . lekelabi tumòne Elìyà ni wàlwa bwà kumusùngila.

Yesù, pààkeelaye lubilà . . . lwà dîyì dikolè, wâkakùùla . . .

“Dîyì dikolè.” Dîyì dikolè! Tàngilààyi.

Yesù, pakààvwàye ûfwa, pààkeelaye lubilà lwà dîyì dikolè, wakakùùla mwoyi.

Nènku, mònayi, cilàmbà cikudika cyà mu ntempelu cyàkapandika bipese bìbìdì kubangila kuulu too ne kwinshi; ne buloba bwàkakanka, ne mbwebwe yâkапandika;

Ne nkita yâkabuululuka; ne yâbûngì yà ku mibidi . . . bansantu bâvwa balâale tulù yâkajuuka,

Ne bâàkâpàtuka mu nkita paanyimà pàà dibììka dyèndè dyà ku lufù, ne bâàkabwela mu musòkò wà cijila, ne bâàkamwènekela bantu bâabûngi.

¹⁶⁹ Dyambwibwa dìmwèpelè dyäpici.

Àsàtù àkaadi menzèke mu Dipungila Dikulukulu, bwà bâvwa bâdilongòbole, bâvwa Dîyì dyà Mukalenge dilwè kùdibo abu. Nwamònù anyì? Dîyì dyà Mukalenge dyâkalwa kùdì

Henoka. Dîyì dyà Mukalenge dyàkalwa kùdì Elìyà, mupròfetà Wendè. Nwamònú anyì? Dîyì dyà Mukalenge divwa n'Yesù. Nwamònú anyì?

¹⁷⁰ Tàngilààyi mu Dipungila Dikulukulu, bansantu bàà Dipungila Dikulukulu abu mpindyewu, pààkenzekà dyambwibwa edi bwà musangu wà kumpàla. Tàngilààyi mvensà wa 50. Dîyì Dyèndè dikolè adi dyàkabìisha bansantu bàà Dipungila Dikulukulu mùshindù ànu ùmwèùmwè menemene ùvwà dîyì dikolè adi dibììshe Yesù... anyì dibììshe Lazàrò awu. Nwamònú anyì? Dîyì dikolè adi ki dyàkabìishangana.

Ne diibidì ndyûle mu Tesàlonika Mwibidì, nshapità mwi4. Twänjààyi kubala, kucibala. Twäfumu ku dibala, kukaadi ànu tusunsa tukesè cyanàànà. Nwamònú anyì?

...Ncyéna muswè bwà nwénù...nùpangè to, bâna
bèètù, pa bïdi bitàngila aba...bâdi balâale tulù, bwà
nwénù kanwikadi mu cinyongopeelu, bu mùdì...

Awu n'Tesàlonika wa Kumpàla 4.12 too ne ku 18. Aci, aci necììkalè Dyambwibwa diibidì. Dyambwibwa diibidì nedììkalè dibàkudiibwa dyà Mukàjì-musèla ne diya nendè.

¹⁷¹ Bansantu bàà Dipungila Dikulukulu bàkaadi bakabwele mu Bwikadi Bwèndè, mpaladiizo bamuumushe. Nènku bansantu bàà Dipungila Dikulukulu bààkabànda, ku dîyì Dyèndè dikolè adi, pààkeelaYe lubìlà lukolè ne kukùùlaye mwoyi apu; bwalu (bwà cinyì?) Mulàmbù, difuta dyà cibawu bwà mpèkaatù yàbò, divwàbo bindilendile adi, biikale biitabuuja ne Mwânà wa mùkòòkò mupwangane awu ùvwa ûlwa. Bâvwa balàmbùle Mulàmbù, Mwânà wa mùkòòkò. Nènku pààkafwàYe ne kukùùla mwoyi, Wàkeela lubìlà lwà dîyì dikolè, ki bansantu bàà Dipungila Dikulukulu kubiìkabò.

Tàngilààyi lubìlà ne dîyì kaaba aka, cintu cìmwècìmwè aci ku Dilwa Dyèndè. Nwamònú anyì?

"Wàkakùùla mwoyi." Ne pààkenzàYe aci, Mulàmbù ùvwa mupwangane, ne mpaladiizo wàkashààla munda mutupu. Nènku bansantu bàà Dipungila Dikulukulu bààkalwa cyàkàbìdi pa buloba, bààkendakana pa buloba, ne bààkabwela pàmwè Nendè, díbà dyà dyambwibwa Dyèndè.

¹⁷² Davìdì mmwambe, mwaba awu ne: "Ambulukaayi, nwénù biibi byà kashidi; ne ikalaayi bambùlùke." "Wàkakwàta bupika ku bupika, wàkàpà bantu mapà," nènku bansantu bàà Dipungila Dikulukulu bààkabwela pàmwè Nendè.

¹⁷³ Kwambabo ne: "Mfùmù wa bwakàne ewu nganyì?"

¹⁷⁴ "Mukalenge wa Butùmbi, wa bukolè mu cilwilu." Cilwilu cyà bukolè, ki bôbò bâlwàlwà aba, bènda bènda lwèndu lwà mìndòlòlooci. "Yesù wàkakwàta bupika ku bupika," nènku ki Yèyè ulwàlwà ewu, mwìkàle ne bansantu bàà Dipungila Dikulukulu. Ki kuyaYe mu biibi bipyabìpyà byà muulu

Mwàmwa, ne kwamba ne: “Ambulukaayi, nwénù biibi byà kashidi; ne ikàlaayi bambùlùke; ne shiilaayi Mfùmù wa Butùmbi mwaba abwelè.”

Dîyì kufùminadi lwà munda mwàmwa dyàmba ne: “Mfùmù wa Butùmbi nganyì?”

¹⁷⁵ “Mukalenge wa bukolè mu mvità.” Biibi kudikùpa e kuunzulukabi. “Nènku Yesù, Mucìmunyi, wàkakwàta bupika ku bupika,” aba bàvwà baMwitàbuje, ne Dîyì dilwè kùdibo abu. Mwaba awu, bansantu bàà Dipungila Dikulukulu abu biikale balààle mwômò amu, bindile: “Wakakwàta bupika ku bupika; wàkabànda Muulu,” kwangata bansantu bàà Dipungila Dikulukulu abu ne kubwelaye. Kí Dyambwibwa dìmwèpelè ndyôdì adi, dìkaadì dimane kupità.

¹⁷⁶ Dyambwibwa didì dilondà didì dyènzekà dìdi (Tesàlonika Mwibidì) bwà Èkèleziyà, Mukàjì-musèla udi ne cyà kubìika ku lufù, bwà kwambwibwa mu Butùmbi. “Twêtù bàdì ne mwoyi ne bàdì bashààle,” ayi mmibidi yìdì mishààle pa buloba, “katwàkupangisha anyi kucyàmakana bàdì balààle tulù to. Bwalu mpungi wa Nzambì neàdilè dyàmbedi, ne bafwè mu Kilistò nebàjuukè.” Nwamònou anyi? “Ne twêtù bàdì ne mwoyi ne bàdì bashààle netwàngaciibwe muulu pàmwè naabò.”

¹⁷⁷ Ditùkù dikwàbò, mvwà mwimàne mu disangu dyà njila. Nènku mvwa—mvwa mwimàne mu—mvwa mwimàne mu disangu dyà njiila mwikàle mbandila cibìlù cyà lwendo lwà mìndòlolooci lwà Ditùkù dyà Ditalala. Ne pàkaavwalu lwènda lùbànda, lwènda lùbànda ne mùsèèsù, mvwa mwimàne mwaba awu ne mwanàànyì wa balùme mutekète, Joseph. Kwàkalwa, dyàmbedi, tutùmbà twà mvità yà kumpàla twà kale atu ki twàkalwa mwaba awu, tutùmbà twà mvità tukesè twà kale. Paanyimà pàà aci kwàkalwa tutùmbà tunène twà mvità twà Sherman twà mvità mipyamipyà, twikale ne mbungu minène ne mishìku yàyì yà dipyapijilangana naayì midilu ayi, ci—cijiku cyà mushìku wà lubungu ciikàlepù, ne bikwàbò.

Paanyimà pà aci, kulwaku bàsàalaayì; bàà—bàà—baamaamù bàà Mùtootò wa Ngôlò abu. Ne pashiìshe kulwaku cishinyishinyi ciikale ne... kwinshi aku... Èè, kwinshì aku kulwaku cishinyishinyi kampànda, ne lwà kumpàla kwàcì aku kùvvwa mushèètè wà bafwè bafunde ne, “bwà mùsàalaayì udi kàyì mumanyike.” Nènku kuvva kwimane mu—mùsàalaayì mwimane mwaba awu, mulami wa ku lukità. Kùvva kwimane mwaba awu mùsàalaayì wà pa mazuwa à mâyì ku luseke lukwàbò aku, ne mwendeshi wa mazuwa ku lúngà luseke. Nènku kùvvwa cilàmbà cikudika cikòka. Ne ku luseke lukwàbò kùvvwa maamù wa Mùtootò wà Ngôlò musòmbekù. Ùvwa mufwishe mwanèndè wa balùme. Kùvva mukàjì mutekète mwimàne mwaba awu, ne mutù muteeka pa mèèsà, ùdila mwadi. Kânà kàà balùme

katekète kavwàle mbondya kasòmbe ku luseke aku; ne binsonji bikitunkumuka mu mèṣù. Kàvwa kafwìshe papa wakù.

Mêmè kudyambidila ne: “Dibungama kaayi’s wè! Nyéwù ndi mwimane apa ntàngila, mbàmònà, bàsàlaayì bakulumpe bàba, ànu ndambù mukesè cyanàànà mbàvvà bashààle; bënda lwendu lwà mindòlolooci kwáka, balema ne bakulumpe, mùshindù wàwa, bavwàle bilàmbà byàbò byà kùmwékùmwè abi, kàdi biikàle bábileeja patòòke ne maleela ônsò ànu ne bwalu mbeena Amèrikè.”

Mêmè kudyàmbidila ne: “Kaa, Nzambi wanyì!”

¹⁷⁸ Ditùkù dikwàbò, nekùlwe dikùbakùba difùmina mu Dyulu: “Ne bafwè mu Kilistò nebàbiike dyàmbedi.” Bansantu bàà kale bàà Dipungila Dikulukulu bàdì dyàmwamwa abu, bàdì bindile abu, nebàlwe bu dikùbàkùbà ne nebàpatukemu dyàmbedi, ne nebàbwele mu dibììkà dyà ku lufù. Netùbwele buludi mu mulongo awu, tuya tukabwela mu dyulu; mibidi mikulakaji yà cifwàkà eyi mishintùlùke ne mivwijiibwe mifwànàngane ne mubidi Wèndè Yéyè mwine wà butùmbi awu. Ndwendo kaayi—kaayi lwà mindòlolooci’s wè lwikalà mwà kwenzeka pààbangàlu kuya lutàngile mu dyulu, dìmwè dyà ku matùkù àdi panshì aa, mu cikondo cyà dyambwibwa cìdì cisanganyiibwa kumpàla eku eci, kaa, biikale baleeja patòòke ne maleele ônsò Mashi à Yesù Kilistò pa byàdì byàbò, Mukenji wa Nzambi wa mu ditùkù divwàbo ne mwoyi. Ki dìbà ditùdì bindile ndyòdì adi, mwanèètù.

¹⁷⁹ Tàngilààyi, ànu bwà kujikija mpindyewu. Dibììka dyà ku lufù diibidì, ônsò... Dyà kumpàla dikaadi dipìte. Diibidì dikaadi pabwípi, mpindyewu mene, nediseemene mpindyewu.

¹⁸⁰ Mpindyewu, diisâtù ndyà bantèmù bàbìdì bàà mu Bwàkabuulwibwà 11.11 ne 12 abu. Bidi ne, bôbò aba ki bìikàlà mwà kwalukila, ne Nyumà wa Kilistò, bwà kufila bujaadiki kùdì beena Yuda, bu mwàkafila Yòzefù kùdì bânà bààbò. Kàdi vùlkààyi ne: “Mibidi yàbò mifwè ayi yàkashààla milààdika panshì mu mùsèsù, munda mwà matùkù àsatù ne citùpà. Pashìshe nyumà wa mwoyi wàkabwela munda mwàbò, ne bààkambwibwa, bangàcìibwe muulu mu Dyulu.”

Ki mambwibwa ènù àsàtù à Dipungila Dipyadìpyà ngôwò awu.

Mambwibwa àsàtù à Dipungila Dikulukulu; ônsò awu mamane kupìta.

¹⁸¹ Mpindyewu tudi badilongolole, bindile mambwibwa, Dyambwibwa dyà bansantu. Byàmanyì kwambiibwa, nènku nebyènzekè nànnku. Pàdì Nzambi wàmба cintu kampànda: “Maulu ne buloba byônsò nebijimine, kàdi Dîyì adi kadyàdyàkupangilaku to.”

¹⁸² Pààkambà Nzambi, kale wàwa mu Genèsè 1, pààkambà Ye ne: “Bukènkè bwìkalèku” apu, nènku kuvwa kufwànyìne

kwikalala kupite nkàmà yà bidimu kumpàla kwà kaabukènkè kampànda kwikalaku. Yéyè kwamba ne: “Dibwè dyà ngajì dìikalèku. Mucì wa nsanga wìkalèku. Cipèèlì cììkalèku. Mukùnà wìkalèku. *Cikampànda cììkalèku.*” Yéyè ngwâkacyàmba, nudi numònà’s. Nènku bu mùkaavwàci ànu cimane kupàtuka mukana Mwèndè, mu Dîyi kampànda, cìvwa ne cyà kumwèneshiibwa. Cìdi ne cyà kwikalaku. Pàvwa . . .

¹⁸³ Pashìlshe ditùkù kampànda, Yéyè wàkabìikila cisàmbà Cyèndè bwà kupàtùkaci. Nènku Yéyè ùkaavwa mwakùle ne muntu dìnà dyèndè Môsà, ku Dikunji dyà Kapyà, Bukènkè; Kapyà kàà Cijila, Kansantu. Ne Môsà kàvvwàku mufwànyine . . . Bantu kabàvwa bafwànyine kwitabuuja Môsà to, ki Yéyè kwamba ne: “Pàtukà naabò ùbafikishè ku mukùnà ewu.”

¹⁸⁴ Mu dìndà adi, mukùnà uvwa wônsò mûle tèntè ne Kapyà, ne kuvwa mikenyi ne mikungulu mùshindù awu. Ki bantu kwambabò ne: “Nzambì kaakulu to. Môsà akule yéyè,” nwamònù’s, “bwà katùlu kufwà.”

¹⁸⁵ Nzambì kwamba ne: “Mêmè necyàkwakula kàbìdì naabò mùshindù ewu to, kadi Némbàjuudilè mupròfetà. Nenku Mêmè nêngààkwilè kùdiye yéyè, ne cyàmbaye yéyè aci necyènzekè. Pa dìbà adi, nuCiteelejaayi, bwalu Mêmè—Mêmè ndi nendè.” Mpindyewu, Yéyè ngwâkamba aci. Wàkamba ne necyènzekè.

¹⁸⁶ Tangilaayi mupròfetà ewu, Yeshààyì, mwimàne mwaba awu; muntu wetu ewu, muntu wa meeji, muntu ùvvwàbo bâtwà mushinga, ee, kudi mfùmù, bwalu ùvwa musòmbe ne Uziyà. Mfùmù awu, mwikale muntu munène, wàkateeta bwà kwangata kaaba kàà muyiishi, musangu kampànda, nènku yéyè kubwela, kukwàcikaye nsudi.

Ki cyòcì aci cîmvwà mwambìle beena kantu-ku-byanza. Kuteeciku kwangata kaaba kàà muyiishi to. To, mukalenge. Shààla wêwè kaaba kaùdi aku. Nwamònù anyì? Enza wèbè mudimu, cìdi Nzambì mukutèèkèle, mukwambìle bwà wêwè kwenza aci. Pawikalà munu, kwêna mwà kwikalaku dici to. Pawikalà dici, kwàdyàkwikalakù dyûlu to, dyûlu anyì dísù to. Nwamònù anyì? Shààla wêwè ànu pa kaaba kèebè.

¹⁸⁷ Nuvwa bumvwé Diyiisha adi, ditùkù adi, ku tudyòmbà ne: *Kuteeta Bwà Kwenzela Nzambì Mudimu.* Davìdì, mfùmù mwela maanyi. Bantu bônsò beela mbila batuuta mikobolo ne: “Cìvwa cîmpè.” Kàdi yéyè kàvvakù mukonke mupròfetà wa Nzambì to. Kàdi muntu kufwàye, ne cintu cyônsò e kunyangukaci. Kuteeci bwà kwambulwisha Nzambì to. Indila too ne piìkalaci cikùmbànàngane ne mishìngà yà Nzambì. Lekela cilwe mu Wèndè mùshindù wà dicienza. “Nêmbangè cintu cinène kampànda. Necyènzè cikansanga.” Watàpa ntààlà wadimuka, mwanèètù.

¹⁸⁸ Mpindyewu, Davidi’s ùvwa mumanyè bîmpè bitàmbe aci. Natànà uvwa mu ditùnga amu, mu diine ditùkù adi. Kabàvvwakù

nànsa bamukonke to, nànsa kakesè. Nwamònù anyì? Yéyè wàkakonka tùpîteena twà mäsàlaayi nkàmà ne twà binunu. Bantu bônsò kwelabò mbila, ne kutuutabò mikobolo, ne kujàbo majà. Pamutù pàà...Bavwa bônsò ne bikemu byà ntendeleelu abi, kadi aci kabìvwa mu njila ne ndongamu wa Dìyì dyà Nzambì nànsa, ki kupangilaci.

Cintu cikwàbò kanà cyônsò, pàdici kaciyi mu njila ne ndongamu wa Dìyì dyà Nzambì to, necipangile. ànu Dìyì dya Nzambì ki dyàshààla kashidi. “Maulu ne buloba nebìjimine, kadi bwà Dìyì Dyanyi to.”

¹⁸⁹ Monaayi Yes'hààyì, nsongaalume wa meeji awu mwimane kaaba aku. Dyàkàmwè, Nyumà kumulenga. Yéyè kàvwàkù mwà kwamba bishiilangane to. Ùvwa muprøfetà. Kwambaye ne: “Monaayi, nsongaakaji virgo neìmítè difù.” “Mbatûlelele Mwânà wa balùme; mbatûlelele Mwânà, Mwânà wa balùme mmufidibwe. Dînà Dyèndè nedibiikidiibwe ne Mubedyanganyi, Mfùmù wa Ditalala, Nzambì wa Bukole, Taatù wa Kashidi. Ndekeelu wa...Bwèndè bukalenge nebwikalè pa makaaya Èndè. Ndekeelu wa...Kakwakwikala ndekeelu ku Bwèndè bukòòkeshi nànsa.” Mmunyì mùvvà muntu awu mufwànyìne kwamba ne meeji wônsò mùvvà nsongàkàjì virgo mufwànyìne kwimita difù?

Muntu ne muntu kwindilaye bwà kucimòna. Cikaavwa cimana kwamba. Civwa ng'EMU MMUDI MUKALENGE WÀMBA. Civwa ne cyà kwenzeka, bwalu civwa n'Diyì dyà Nzambì. Byà mwomumwe ànu ne mùvvabi mu Genese, pààkakùna Ye mamiinu awu mwinshi mwà mbû amu, muvwa “buloba kabuyi ne mbungakeenu, bwikàle butupu; ne mâyì pamutù pàà ndondo.” Nwamònù anyì? Civwa ne cyà kwenzeka. Ki díngà ditükù, bidimu nkàmà mwandamukùlù bimane kupita, difù dyà nsongàkàjì virgo kwimitadi Dimiinu dyà Nzambì, Dimiinu difùkùibwe. Yéyè kulela Mwânà wa balùme.

¹⁹⁰ Mwânà wa balùme umweumwe awu e kwimana pààpa, díngà ditükù. Kwamba Ye ne: “Lazàrô, pàtukà.” Ki muntu uvwa mufwè kukaavwa matükù anaayi, mubole, dyùlù dyèndè dimane kubèètelela, dyupuke, kupatukaye. Kwamba Ye ne:

Kanukemi bwà eci nànsa: bwalu dîbà dilwalwa,
(Amen.) *dìikalà bwônsò bàdì mu lukìtà mwà kuumvwa*
dìyi dyà Mwânà wa Nzambi,

Pa nànku, cikaadi cimane kwambiibwa. Cidi ne cyà kwenzeka mùshindù awu. Nekwikale Dyambwibwa. Kaa, ekèlekèle!

¹⁹¹ Ndi mvuluka, ànu Diyiisha dyànyì dyà ndekeelu mu Californie, mùmvwà ndyambidila ne ncyàdyàkumwàlukilaku kàbìdi to, pâmvwà mudyànjile kwamba ne: “Los Angeles neàtukinè mwinshi mwà mbû. EMU MMUDI MUKALENGE WÀMBA.” Neàtukinè. Kwèndè nkumanè kujika. Mmumane

kukupudiibwa. Bwèndè mbutùùke. Ndîbà kaayi diine adi? Ncyêna mumanye ne ndîbà kaayi to, kadi yêyè neatukijiibwe. Dyâkàmwè paanyimà pàà cyôcì aci, dikanka dyà buloba kubangadi kunyukusha bikole ne kubendamija.

¹⁹² Vulukààyi, bààbûngì bàà kunùdì biimane ànu mwaba awu, lubwebwe alu, ditùkù adi pàvvà Mwanjèlò awu mutùùluke mwaba awu apu. Ne Bukénkè abu ne Kapyà bimata bifumina mu Dyulu, ku nyungulukilu wa lubwebwe lutùvvà biimanyinepu alu. Mbwebwe yituuka ku mikùnà, ne yimata kwônsò aku. Cyôcì kutuuta makùbâkùbà misangu yisatù, makole. Mêmè kwamba ne: "Dilumbulwisha neditùutè Côte Ouest." Matùkù àbìdì paanyimà pàà ciine aci, Alaska kwambaye kutükina mu mâyì.

¹⁹³ Vulukaayi ne, Nzambì umwèumwè udi mwambe cyôcì aci awu, mmwâmbe ne: "Los Angeles ngwa kabùtù." Ne kwèndè nkujike. Ncyêna mumanye ne ndîbà kaayi to. Ncyêna mwà kunwàmbila to.

¹⁹⁴ Mêmè ncìvwa mumanye ne ndi mwambe ciine aci to. Kàdi mwanèètù wa balùme ewu, ngeela meeji ne cìvwa... To. Umwe wa ku bakwâ-Mosley, ngeela meeji, uvwa naanyi pambèlu pààpa mu mùsèsù kampànda. Ncìvwa mumanye ne civwa ncinyì to too ne pângâàlu kukenketa. Mêmè kukenketa mu Mifundu.

Ne Yesù ùvwa mwâmbe ne: "Kaapenuma, Kaapenuma, mmisangu bûngì kaayi... Wêwè udi mudibandishe awu..." (eyowa's we) "...too ne mu Dyulu, neüpwekeishiibwe too ne mu iferno. Bwalu byenzedi byà bucole bidì byenjìlbwe mwèbè emu ebi, bu byenjìlbwe mu Sodoma, nunku's mmushâàleku too ne leelu ewu." Nenku bidimu bitwè ku lukàmà ne makumi ataanu kuumukila kwine aku, (Sodoma ukaavwa, mu buloba) pashiìsche Kaapenuma ukaadi mu mâyì, yêyè pèndè, leelu ewu.

¹⁹⁵ Ne Nyumà umwèumwè wa Nzambì udi mwâmbe bintu byônsò ebi, ne mwenze bintu byônsò ebi awu, n'Yéyè wâkamba kwâka awu ne: "Kaa, wêwè cimenga, Kaapenuma, udi mudînyike dînà dyà Banjèlo awu, Los Angeles, mùshindù mwine wûdì mudibàndishe too ne mu dyulu's we! Muji mene ne nkwaswa wa Sataana," (Nwamònou anyì?) "udi mudibandishe."

¹⁹⁶ Bambi anyì, s'ki mu yàbò nkita mmwômò amu. Bantu bîmpè bàyaayamù ne bàkafwìlamù bu mpùku. Dinyangakaja kaayi dyà maalu's we!

¹⁹⁷ "Wêwè udi mudînyike dînà dyà Banjèlo awu; bu byenzedi byà bucole ebi byenjìlbwe mu Sodoma, bidì byenjìlbwe mwebe wêwè emu ebi, nunku's mmushâàle too ne leelu ewu. Kadi dyèbè dîbà dyákànyì."

Nutangilaayi bwà nùmonè. Cyôcì kaciyi aci to, ndi muprófetà wa mashimi. Nwamònou anyì? S'ki yêyè awu. Ùkaadi mulààlemù.

¹⁹⁸ Ndi mvuluka dilòòlò adi, kumpàla kwà mêmè kumònà ciine aci, ngâkamònà didyànjila-kumònà dyà Mukàjì-musèla. Mvwa mwimane mwaba awu ne mêmè kumònà inábànzà mutekete mulenga kwísù, muvvale mvwadilu ànu mujaalame, ne bikwàbò, wènda lwendu lwà mindololooci uya mu *nunku*. Kuvwa Kampànda mwimàne ku luseke lwànyì, mu cikeena-kumònà amu. Ki mêmè kumònà. Bààkamba ne: “Didyànjila-kumònà dyà Mukàjì-musèla.” Mêmè kuMumònà upicila ku luseke lwànyì aku. Bàvwa balwila ku *elu* luseke, biikale bàya banyùngùlùke.

¹⁹⁹ Mêmè kucyùmvwa cilwa cyènda cibànde, èkè-èkèleeziyà miikale yènda yibànda yùmukila ku luseke lukwàbò *elu*. Ki èkèleeziyà wa Asie ulwàlwa wàwa. Kaa, nwénù bàmbambà bwà bukooya's we! Ki èkèleeziyà wa beena ku Mputù ulwàlwa ewu. Kaa, kèlekèleee! Ki pashìishe mêmè kuumvwa mijiki yà bidündadùndà yènda yìlwa, yìvwa m'Mandemwazele Àmèrikè, èkèleeziyà, wa bwalu kayiku ne bilàmbà pambidi nànsha byà kânà to. Ùvwa ne mabeji, bu mùdì bibejibeji, bikunzubile, bikwacila lwà kumpàla kwèndè aku, wènda ùja majà a bidündadùndà; Mandemwazele Amerike, èkèleeziyà.

²⁰⁰ Mvwa mwimane mwaba awu mu Bwikadi Bwèndè. Mêmè kudyàmbidila ne: “Éyì Nzambì, mêmè bu mwambi, piìkalabi ne ki cyôcì aci cidi citàmbe bwímpè citùdì pèètù bafwànyìne kwenza? Kaa! Kaa!” S'udi ànu mumanye mùdì udyùmvwa. Pashìshe mêmè kudyàmbidila ne: “Nzambì, nsokòkèku. Ngîkalakù nànsha ànu ne mùshindù wà kuumuka mwaba ewu. Piìkalèbi ne cyônsò citùdìku benze, ne cyônsò citùvvwaku ne cyà kupàtula ncyôcì aci, piìkalabi ne ncyôcì aci?”

²⁰¹ Ne pashìishe pààkapìcilà bakàjì abu mwaba awu, biikale bwônsò benza bintu byà bâtwà kumpàla bâtwà paanyimi abi ne bikwàbò, ne nsukì mîpì, ne kwísù kulaaba bilaabu aku. Ne pàvvàbo bàpicila mwaba awu mùshindù awu apu, paabo's bâvwa ne cyà kwikalà baavirgo bwà Kilistò. Nènku pààkapìcilaye mwaba awu mùshindù awu, mêmè kutùma mpàla kwà nàka, nudi bamanye's, mwikale ne *eci* cikwàcila lwà kumpàla kwànyì. Bivwa—bivwa byà bundù be, nyimaà wabò awu. Nènku ki bôbò abu's, bënda baya mùshindù awu. Ki mêmè kutùma mpàla mu cisuku, mufwìle mu mwadi, mùshindù *ewu*.

²⁰² Mêmè kwamba ne: “Ncyêna—ncyêna mufwànyìnekù kucitwàla mwômò amu to. Yéyè mwimàne apu, ne mêmè mumanyè ne mêmè ewu, mwambi wa Èkèleeziyà, ne ki cîndìku mupaaatûle bwèndè Yéyè ncyôcì aci.” Mêmè ne: “Éyì Nzambì wa yààyà, ncyêna mwà kucitàngilakù to. Ndekèlèku mfwe. Ndekèlèku—ndekèlèku njimine,” nenku mùshindù awu.

²⁰³ Nènku pàvvàci ànu ne cyäpàtuku cyàyi, musangu wônsò ùvvà yônsò wa kùdibo ùlwa awu, bàvwa bàpàtuka baya mu

mwaba kampànda, ne pashìshe bápàtuka bàkapona. Mvwa ànu mwà kuumvwa mwadi wà cyôcì aci pàvvàci ciya apu.

Pashìshe mémè kuumvwa cintu kampànda bu cyà ne *Ndàayi Kumpàlà, Mâsàlaayì À Beena Kilistò*. Mémè kutangila, kadi ki musumbà wa nsongààkàjì ya cijila ayi ùlwalwà ewu ànu menemene mùshindù ûvvàbo kumpàla awu, bàvwàle bwônsò mvwàdilu mujaalame, nsukì yàbò mibàlembeelete paanyimà. Bakàlàngà, baà mankenda, bênda bênda mùshindù *ewu*, mu dikàsà dyà Èvànjeeliyò. Yéyè uvwa Dîyì. Bàvva ne mmwènekelu wa umwe wa ku ditunga ne ku ditunga dyônsò. Mvwa ncítangila pàvvàbo bapicila mwaba awu apu, ne mémè kubàmona pàwàbo bâpicila mwaba awu. Pamutù pàà kupwekabò batàngile pansi, bôbò e kubanga dibànda muulu.

Mémè kumònà umwe wabò ùteeta, bàbìdì anyì bàsàtù bàà kûdibo, bâteeta kupaàtuka mu mulongo. Mémè kwela lubilà lukole ne: “Shààlaayi mu mulongo!” Ki cikeenakumònà kunguumukaci. Nènku mvwa mwimàne mu cibambalu amu, ngeela mbila ne: “Shààlaayi mu mulongo!” Mulongo, cyôcì aci . . .

²⁰⁴ Ndi ndikonka ne, ncifwànyìne kwikala cipite anyì? Mukàjì-musèla mmufwànyìne kwikala mumane kubììkidiibwa anyì? Ki cyôcì citùdì munkacì mwà kupicila leelu ewu eci anyì?

Bidi bikengela Yéyè ikale mufwimba ne mwenza mu cimfwànyì cyà Kilistò, ne Kilistò n'Dîyì. Ki cintu címweèpelè ncyôcì aci. Nwamònù anyì? Cìdi Mwômò amu, mu Dîyì amu. Cìdi an . . . Nwamònù anyì? Kakwèna mwà kwikala kantu nànscha kàmwè kasàkidila to. Kacyèna mwà kwikala muntu mu—mukàjì mwikale ne cyanza bu muntu, kadi cikwàbò cyanza ciikale dikamà bu dyà mbwa to. Bìdi bìkèngela cìikale ànu menemene Dîyì dyà Mukalenge, bu mùdìYe Dîyì. Mukàjì-musèla ùdi citùpà cyà Mubàki. Mukàjì ùdi citùpà cyà bàyendè, bwalu mmupâtùdiibwe mu bàyendè awu. Eva ûvwa citùpà cyà Adama cyangàciibwe mu lubadi lwèndè. Nènku ki mùdì kàbìdì Mukàjì-musèla, kàyi mwangàciibwe ku dìngumba nànscha, kàdi mwangàciibwe mu cyâdì cyà Dîyì dyà Nzambì bwà ditùkù edi.

²⁰⁵ Dyambwibwa!

Mpungi wa Mukalenge neàdile, bafwè mu
Kilistò nebàjuuke,
Ne bààbanyangana butùmbi bwà dibiìshiibwa
Dyèndè;
Pààdisangishà basungùdùbwe ku Cisòmbelu
cyàbò dyàmwamwa dyà dyulu.
Pààbìkilabo ménà mwàmwa muulu,
tùteetàayi bônsò bwà kwikala Mu, nwènù
balundà bàanyì.

²⁰⁶ Nzambì anùbenèshe. Cyàmanyì kwambiibwa, cidi ne cyà kwenzeka, necyènzeke. Nènku tukese...[Katùpà kàà mukàbà wa mèyi munda mutupù—Muf.]

Bantu wetù, kakwèna muntu nànscha umwe udi muswè kufwà to. Kakwèna muntu nànscha umwe udi muswè ku—kujimina to. Ndekelayi nnwàmbilè. Cyônsò cyûdì wêwè wenza... Mùshindù wûtù uya mu èkèleziyà nànscha mwikale mulenga wà bishi, ne wûtù ne lulamatu kùdi èkèleziyà. Aci's cidi címpè; kakwéna cilumbu bwà cyôcì aci to. Bidi bikèngela wêwè kwikala uya mu èkèleziyà. Ikàlà wenza nànku. Tungùnukà ne kwikala kuya mu èkèleziyà. Kàdi, nànscha nànku, imànscha ànu bilèlè byèbè abi kule, ne tungùnuka nda ànu kumpàla ùbwelè mu Kilistò. Bwalu, mpungi neàdilè dimwè dyà ku matùkù àdì pansi aa, ne neùpapuke ukàadi ne cimanyinu cyà nyama wa lwonji cikutwà, ne kùyì umanya ne ncinyì ciine aci to too ne piìkalà dîbà dimanè kupita. Aci's ncyà bushùwà menemene.

²⁰⁷ Nzambì ànùbènèshè. Nwamfwilaayikù luse bwà mündì munùlamè. Kàdi vùlukààyi. Ndi mubalamè pààbò ntàntà mupitèpítè bule mwaba ewu. Ncyà bushùwà. Nènku mulàmbù unùdì bansangìshile awu... Wa bwalu, ncìvwa mulombe bwà nwènù kwenza nànku to, mwanèètù. Aci's, ekèlekèle, aci's nngenzelu wa maalu wa bukàlàngà. Angàtà yoyì ayi ùfutè nzùbu wa cilààla-beenyì ewu bwà mèbà a—a pamutù awu, bwalu mêmè ngudi muàpicishe. Ncìcivwa ànu ne ndambù wa maalu mwaba ewu. Ncicìdi ànu ne mabèji makwàbò matwè ku mwandamukùlù anyì dikumi pa bwalu bwà Dyambwibwa adi, kàdi ncì—ncìvwa ànu ne dîbà dyà kubyàmba to. Nzambì ànùbènèshè.

²⁰⁸ Nudi banange Mukalenge Yesù anyì? Twànjì twimanyaayi ànu kuulu bapùwe bwà katancì kakesè cyanàànà mpindyewu, ne ditalala dyônsò, ne kaneemu kwônsò, bwà kuvùlukaku bìngàmbì ebi. Vùlukààyi ne, tudi mu mèbà à ndekeelu.

Matùnga aa àdi àkòsoloka, Izàlèèlà ùdi
ùtàbuluka,
Bimanyinu byàkadyànjilà Bible kwamba;
Matùkù à bâà Bisàmbà byà bendè mabala,
mûle tèntè ne bintu byà bikwàcisha bwôwà;
“Alùkilaayi, Nwènù bâdì batangàlaké, nuyè
kwenu nwènù.”

Ditùkù dyà bupikudi dìkaadi pabwîpì,
Myoyi yà bantu yìdi yàmba kwimana bwà
bwôwà;
Ûjiibwayi ne Nyumà, myêndù yènù
milongolola ne misukula,
Bandulukààyi! Bupikudi bwènù bukaadi
pabwipì.

Nudi bamanye aci anyì?

Baprófetà bàà mashimi bàdi báshima, bàdi
bávila Bulelèlè bwà Nzambi,

Twétù tudi bamanye ne byónsò abi mbilelèlè. Kî mmwômò
anyì? [Katùpà kàà mukàbà wà mêtì munda mutupù—Muf.]

Ndi muMunange, ndi muMunange
Bwalu Yéyè wákannanga kumpàla
Ne wàkampetela lupàndu
Pa mucì wà Kàlvariyo.

²⁰⁹ Mbanganyì bàdì baMunange bulelèlè? Ela cyanza cyèbè
muulu. Mpindyewu, ndi muswè ne wêwè, patùdi twimbulula
cyôcì aci apa, úlabùle mutu kampànda udi pabwîpì neebè awu
ku cyanza. Amba ne: “Nzambi àkubènèshè, mwena lwendu.”
Twétù aba’s tudi beena lwendu. Kî mmwômò anyì? Beena lwendu
ne beenyi.

Ndi muMunange,
Ki mùdibi nànkú, ànu dyàmwamwa dyà mèèsà adi.

Ndi muMunange
Bwalu Yéyè wákannanga kumpàla
Ne wàkampetela lupàndu
Pa mucì wà Kàlvariyo.

²¹⁰ Nudi baswè kuya mu Dyambwibwa anyì? Mbanganyì bàdì
diya dyà mu Dyambwibwa disànkisha? Ambàayì ne: “Nzambi,
ndi muswè kuyamu, ne mwoyi wànyì wônsò.”

Kwàta Ku Cyanza Cyà Nzambi Cìdì Kaciyyì Cìshintuluka,
nutu bamanye musambu awu anyì? Udi muwùmanye anyì,
mwanèètù wa bakàjì? *Kwàta Ku Cyanza Cyà Nzambi Cìdì Kaciyyì Cìshintuluka*. Nyéna mumanye cìdì... Cyona cìdi bìshi, bwà
awu awu? Huh?

Kwàta ku cyanza cyà Nzambi cìdì kaciyyì
cìshintuluka!
Kwàta ku cyanza cyà Nzambi cìdì kaciyyì
cìshintuluka!
Ibakila ditèkemena dyèbè pa bintu byà
Cyendèlèlè,
Kwàta ku cyanza cyà Nzambi cìdì kaciyyì
cìshintuluka!

Nudi banange aci anyì?

Pìikalà lwendu lwètù lukaadi lujikè,
Pawikalà ne lulamatu kùdì Nzambi,
Cisòmbelu cyèbè cilenga cyà cìbàlakana mu
Butumbi,
Ki cyàmònà musùùkà wèbè mwambwibwe
awu's!

Kwàta ku cyanza cyà Nzambì cìdì kaciyì
cìshintuluka!
 Kwàta ku cyanza cyà Nzambì cìdì kaciyì
cìshintuluka!
 Ibàkila ditèkemena dyèbè pa bintu byà
Cyendèlèèlè,
 Kwàta ku cyanza cyà Nzambì cìdì kaciyì
cìshintuluka!

Ndi muswè bwà nwìnyikè mitù yènù katancì kakesè
cyanàànà mpindyewu.

Kwàlakanyi mabanji à pàtupù à buloba ebu,
 Âdì ànyanguka lùkàsà aa to,
 Keba bwà kupeta cibucilu cyà mu Dyulu,
 Abi kabiyàkujiminakù to!

Kwàta ku cyanza cyà Nzambì cìdì kaciyì
cìshintuluka!
 Kwàta ku cyanza cyà Nzambì cìdì kaciyì
cìshintuluka!
 Ibàkila ditèkemena dyèbè pa bintu byà
Cyendèlèèlè,
 Kwàta ku cyanza cyà Nzambì cìdì kaciyì
cìshintuluka!

²¹¹ Ne mitù yènù miinyika, bìikale ne cyòcì eci mu meeji, bamanye ne tudi twinyika mitù yètù bayitangije ku lupwishi kutwàkangaciibwà, dìngà ditùkù ki kutwàpingana, mwikale mumanyè ne udi ne musùùkà munda amu wìkalà ne cyà kuya kalumbulula kùdi Nzambì. Nénku pawìkalà udìyùmvwa ne kwêna ànu mudilongolole bwà Dyambwibwa adi to, bu Dyôdì mwà kulwa dildòlò edi, kàdì mwikale ujinga bwà bàkuvùlùkè mu disambila, ela wêwè ànu cyanza cyèbè muulu cyanàànà. Katwéna ne kaaba kàà kwenzela dibìikila dyà ku cyoshelu to. Cyoshelu cyèbè ciidi munda mwà mwoyi wèbè amu, nànsha nànnku. Ela cyanza cyèbè muulu. Nzambì àkubènèshè, wêwè, wêwè. Ekèlekèle!

“Ndi ndiyumvwa ne ncyéna mudilongolole to, Mwanèètù Branham. Ndi—ndi, mu bushuwà bwà bwalu, ndi—ndi—ndi muswè kwikala mwena Kilistò. Ndi muteete kwikala nànnku, kàdì kùdi ànu misangu yônsò cintu kampànda cipangike. Ndi—ndi mumanye ne ncyé—ncyéna ànu mwaba ùvwa ùkèngela bwà mêmè kwikala to.”

“Mfwileku luse, Nzambì. Nyéwù ngeela cyanza cyànyì muulu. Ikalaku naanyì luse.”

Mpindyewu, byanza bitwè ku makumi àbìdì anyì makumi àsàtù, bikaadi byedììbwé muulu, mu kasùmbu kakesè aka. Bikwàbò nyawu byènda byèdiibwa muulu.

²¹² Nzambì munanga, Wêwè ngudi mumanye cìdì paanyimà pàà cyanza aci, munda mwà mwoyi amu. Nyewu ndomba,

Nzambì munanga. Kudi cintu ànu cìmwèpelè cíndì mêmè mwambule bujitu bwàcì, ncyà ne, kwamba Bulelèlè. Nènku, Nzambì munanga, bôbò mbaswè kusungidiibwa. Mbaswè nànku, cyà bushùwà. Bôbò—bôbò kî mbaswè cintu kampànda cidi ànu disaluka pa cyôcì eci nànsha, cintu kampànda cikwàtakaja, ndongolwelu kampànda wa cyena màngumba, twìtabààyi kampànda, dîyì diswika kampànda dìdìbo basàkìdile. Bôbò mbùmvwe, Taatù, ne bìdì bìkèngela Dîyì dyà Nzambì dikezuke, kadìyi disambakaja to. Bikwàbò byônsò nebìjimine, nànsha maulu ne buloba, kadi Dyôdì kadyàkujimina to. Nenku twêtù biikale Dîyì adi, buloba nebuojimine mwinshi mwà makàsà ètù, kadi twêtù katwèna mwà kujìmnakù to, bwalu tudi Dîyì adi, Mukaji-musèla wa Mubàki.

²¹³ Ndi ndombela muntu ne muntu, bwa Wêwè kubènzelaku nànku, Taatù, ki disambila dyanyì dyà meeji matòòke ndyôdì adi. Nènku ùmfwìleku luse, Taatù, bwà diikala mubìndùlùke bikole dilòòlò edi, mulwè mwaba ewu pashiìshe, ne—ne mwikalé nzakalala, ne ngàmба mèyì makosolokangane ne miikale tutùpà tutùpà. Mu mùshindù kampànda anyì kansanga, Nyumà Mwîmpè munene, waàtwàngajakù mu Webè mùshindù Wêwè wà Nzambì awu, ne waàfila mu myoyi yà bantu, wùùmukila mu wànyì mwoyi, ne kabingila ne kiipacila kândì mêmè naaku mu mwoyi wànyì kûdì Wêwè. Kwêna Wêwè mwà kuswàku nànku anyì, Mukalenge? Nènku sungilaaku udi mwà kusungidiibwa awu. Ùmukòke kûdì Wêwè, Mukalenge. Ne swàku bwà twêtù kwikala badìlongòlole bwà dìbà dyà dyambwibwa dìdì pabwîpì menemene adi. Bwalu ndi ndòmba nànku mu Dînà dyà Yesù. Amen.

Nzambì ànùbènèshè.

Mpindyewu, mulombodi wa ci—cibilu.



DYAMBWIBWA LUA65-1204
(The Rapture)

Diyiisha edi nya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo dilolo, mu matuku 4 a ngondo wa dikumi ne mwibidi, cidimu cya 1965, bwa didya nya Bwobumwe bwa Buloba bujima bwa Beena Kantu-ku-Byanza baa Evanjeeliyo mu Kaabujima ku Ramada Inn mu Yuma, Arizona, U.S.A. Ndyumusha pa mukaba wa mèyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmuntuuta ku cyamu ne mwabanya kùdì Voice Of God Recordings.

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org